

# TNÚHU NÍ CHÍDÓ TNÙNÍ TÉ JUÀÁ

*Déhe Yá Ndiöxí ní cuu-gá ññá yiu*

<sup>1</sup> Cùmání-gă ngáva ñuyíú, te sa ndècu ndihì Yá Ndiöxí Déhe-gá. Te ññ-ni xĩcuu-gá. Te Déhe-gá-án ññ cuu-gá dàtná ññ tnúhu, chi ní cachí tnúhu-gá nàcuáa càa Tátá-gă Dútú Ndiöxí. <sup>2</sup> Te sa ndècu-gá ndihì Dútú Ndiöxí te ní ngáva ñuyíú. <sup>3</sup> Te ññ-ni tnúhu mee Dútú Ndiöxí ní cuu ní cadúha Déhe-gá nchaa sá ió ñuyíú. Te núu ñá túú Dèhe-gá ñá, te ñá túú nă coo ñuyíú-a ni cùu. <sup>4</sup> Te ññ-ni Déhe-gá quídé-gă ndécú-ó, te ní dáyèhé-gá iní-ó nàcuáa cundecu-o. <sup>5</sup> Te tnúhu-gá ní xíté nuu-xi núú ndécú nchàa ññá yiu ññhu ichi cuehé ichi duha. Te ññá yiu-án cúy-yu dàtná cue ññá yiu ndècu ññ núú néé, te ññ-ni-yu cachí iní-yu xocàní-yu tnúhu-gá dico vá ndácũ-yu.

<sup>6-7</sup> Te ní xíndecu ññ téé ní xínani-dě Juàá, te téé-án ññ táuchíúñ Yá Ndiöxí sá càhá<sup>n</sup>-dé tnúhu-gá núú ññá yiu. Te ní xáha<sup>n</sup>-dě xii-yu sá vèxi Déhe-gá ñuyíú-a, te dandixi túu-gá iní-yu cuendá cutnùnì iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. <sup>8</sup> Te ñá díú mée té Juàá ní dandixi túu-dé iní-yu cuendá cutnùnì iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní cáhá<sup>n</sup>-dé sá Dèhe Yá Ndiöxí véxi-gá dandixi túu-gá iní-yu. <sup>9</sup> Te ndáá ndisa sá méé-gă dándixi túu-gá iní ññá yiu ñuyíú-a cuendá cutnùnì iní-yu nàcuáa ndùu cuendá Yá Ndiöxí.

10 Te ní xíndecu-gá ñuyíú-a, te ñáyiú ñuyíú-a ñá ní cùtnuní iní-yu yoo cùu-gá, te diu-ni mee-gă ní cadúha-gá ñuyíú-a ní quide-gá chiú<sup>n</sup> ní táhú Dütú Ndiöxí. 11 Te ní quixi-gá ñuyíú ní cadúha mee-gă, dico cue ñáyiú ñuyíú-a ñá ní cùu váha iní-yu núú-gă. 12 Dico davá-yu ní sándáá iní ñáhă-yu xii-gá, te ní nduu táhú-yu ní nduu déhe ñaha Yă Ndiöxí xii-yu. 13 Te ñá túú ní nduu déhe ñaha-gă xii-yu sá cúŭ-yu déhe ñáyiú ñuyíú-a, àdi sá ndécú tătă-yu, nănă-yu chi mee Yă Ndiöxí duca<sup>n</sup> ní cuiní-gá cunduu sá ndúú dēhe ñaha-gă xii-yu.

14 Te Déhe-gá ní quixi túu-gá ñuyíú-a, te ní cuu-gá ñ<sup>n</sup> yiqui cùñú ní xíndecu ndihí ñaha-gă xii nchoo cuè ñáyiú ní xica cuu túu ndihí-gá. Te ní xiní-ó să ǐo càhnu cuu-gá cuendá sá ñ<sup>n</sup> dīi dīi-ni-gă cúú-gă Déhe Yá Ndiöxí, te ǐo cùndahú iní ñáhă-gă chíndèe ñaha-gá xii nchoo ñăyiú ndècu ñuyíú-a, te ǐo ndáá càhá<sup>n</sup>-gá. 15 Te duha ní cáhá<sup>n</sup> té Juáa cuendá Déhe Yá Ndiöxí ní xáha<sup>n</sup>-dē xii ñáyiú:

—Cuendá tée iha ni cáhá<sup>n</sup>-í ndéé cǎni-gá ní cachí-í sá quíxí ñ<sup>n</sup> tée quixi. Te tée-án cúnùu-gá-dé, chi dǐhna-gá-dé sa ndècu-dé dàcúúxí yǔhú —duha ní xáha<sup>n</sup>-dē xii-yu.

16 Te ǐo váha iní Yaá-án chi xito ñaha-gá xii-o nchàa-o ñ<sup>n</sup> nduu ñ<sup>n</sup> nduu. 17 Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ǐchi ñaha xii-o nacúaa cundecu-o, dico Déhe-gá Xítohó Jesucristú ní cachí-gá sá ǐo cùu iní ñáhă Yă Ndiöxí xii-o. Te ní cáhá<sup>n</sup>-gá nchaa dava-gá tnúhu ndáá. 18 Te ñá ñ<sup>n</sup> ñăyiú xini túu-yu Yá Ndiöxí. Dico ñ<sup>n</sup>dīi dīi-ni Déhe-gá Yaá ndécú ndihí-gá cǎchí tnúhu-gá nàcuáa càa-gá.

*Té Juàá tée dàcuandute ñaha xii ñáyiú càhá<sup>n</sup> váha-dé  
cuèndá Xítóhó Jesucrìstú*

*(Mt. 3:11-12; Mr. 1:7-8; Lc. 3:15-17)*

<sup>19</sup> Te cue tée isràèl ndécú ñúú Jerusalén ní tendaha-güedě cue dútú ndíhi cue tée cùu levítá cuáhá<sup>n</sup>-güedé núú ndécú tẽ Juàá ndúcú tnũhu-güedé núú-dě nõu ná tée cùu-dé. <sup>20</sup> Te ní cáhá<sup>n</sup> ndáá-dé ní xáha<sup>n</sup>-dě xii-güedé:

—Yúhú, ñá díú Cristú Yaá ní tendaha Yă Ndiõxí véxi ñuyíú-a cùu-í —càchí-dé xăha<sup>n</sup>-dě.

<sup>21</sup> Te ní xáha<sup>n</sup> tùcu-güedé:

—¿Te yoo cùu yohó váí<sup>n</sup>? ¿Á yòhó cúu-n tẽ Èliás? —càchí-güedé xăha<sup>n</sup>-güedě xii-dé.

Te ní xáha<sup>n</sup> tẽ Juàá:

—Yúhú, ñá díú tẽ Èliás cúu-í —càchí-dé xăha<sup>n</sup>-dě.  
Te xăha<sup>n</sup> tùcu-güedé:

—¿Te yòhó cúu-n tẽe ní cachí cue tée ndéé sanaha quìxi cáhá<sup>n</sup> tnúhu Yá Ndiõxí-ă<sup>n</sup>? —càchí-güedé xăha<sup>n</sup>-güedě xii-dé.

Te ní xáha<sup>n</sup>-dě:

—Ni ñà díú tẽe-á<sup>n</sup> cúu-í —càchí-dé xăha<sup>n</sup>-dě xii-güedé.

<sup>22</sup> Te ní xáha<sup>n</sup> tùcu-güedé:

—¿Te ná tée cùu yohó váí<sup>n</sup>?, cuèndá duca<sup>n</sup> nàcani tnúhu-ndí núú cuè tée ní tendaha ñàha xii-ndí véxi-ndí, te cáhá<sup>n</sup> duu<sup>n</sup>-n nõu ná tée cùu-n —cachí-güedé xăha<sup>n</sup>-güedě xii-dé.

<sup>23</sup> Te ní xáha<sup>n</sup> tẽ Juàá:

—Yúhú cúu-í tée xìca cáhá<sup>n</sup> xití yucu nàcuáa ní cáhá<sup>n</sup> ndí Chaiá, chi ndí-á<sup>n</sup> ñí cachí ndí: “Chí dáńá ìchi cuehé ichi duha ndècu-ndo te tñi-ndo ìchi váha, chi véxi Yaá ío cùnuu”, duha ní cachí ndí —càchí tẽ Juàá xăha<sup>n</sup>-dě xii-güedé.

24 Te cue téé ndùcu tnúhu núú tẽ Juàá nõu ná téé cùu-dé, cue téé-á<sup>n</sup> nõ tendaha ñàha cue téé cùu fariséú xii-güedé. 25 Te ní xáha<sup>n</sup> tùcu-güedé xii té Juàá:

—¿Ná cuèndá dácuañdute-n ñáyiu te núu ñá díú Crìstú cúú-n, te ni ñà díú tẽ Èliás, te ni ñà díú tẽ véxi cáhá<sup>n</sup> tnúhu Yá Ndiõxí cúú-n vâi<sup>n</sup>? — cächí-güedé xáha<sup>n</sup>-güedé xii-dé.

26-27 Te ní xáha<sup>n</sup> tẽ Juàá:

—Yúhú ní ngódó núu-í dácuañdute-í ñáyiu. Dico nchìcú<sup>n</sup> ñ<sup>n</sup> téé véxi, te téé-á<sup>n</sup> cùnùu-gá-dé dàcúúxí yùhú, chi yúhú cúu-í ñ<sup>n</sup> téé duu<sup>n</sup> duu<sup>n</sup> ñá túú tàú nandaxi cuèdicó ñ<sup>n</sup> chàú-dé dico quide-í chiu<sup>n</sup>-dé. Te téé-á<sup>n</sup> sa ñùhu tnahá-dé tnuú-ndó dicó-ni sá ñá túú xini-ndó-dẽ — cächí-dé xáha<sup>n</sup>-dẽ.

28 Duha ní cuu ñúú Bètábará ñúú cáá ndàa ingá xio yúte Jòrdán, yàcá<sup>n</sup> ní xindecu té Juàá ní dácuañdute-dé ñáyiu.

### *Jèsús quidé càhnu iní-gá nchaa yíca cuèchi ñáyiu*

29 Te nduu tnéé ní xini té Juàá Jèsús véxi yatni-gá núú ndécú-dẽ ndihi ñáyiu. Te ní xáha<sup>n</sup>-dẽ xii-yu:

—Chí cündèhe téé-ã<sup>n</sup>, chi téé-ã<sup>n</sup> cúu-dẽ Crìstú Yaá ní tendaha Yã Ndiõxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ñ<sup>n</sup> mbéé quiti ío váha iní-xi.

30 Te díu téé-ã<sup>n</sup> ní cachí-í sá cáncñícú<sup>n</sup>-dé quixi. Te cùnùu-gá-dé dàcúúxí yùhú, chi díhna-gá-dé sa ndècu ní cachí-í xii-ndo. 31 Te ni yùhú ñá túú xini-í-dé ní cùu, dico xica cuu-í dácuañdute-í ñáyiu cuèndá nchaa ñáyiu isràél quini ñáhã-yu xii-dé — cächí-dé xáha<sup>n</sup>-dẽ xii-yu.

32 Te ní xáha<sup>n</sup> tùcu-dé:

—Ní xiní-í Espíritú Yă Ndiöxí ní quee-xi andïu vëxi cuu<sup>n</sup>-xi ngúndecu ndihî ñaha-xi xli-dé, te dàtná cáá lõmá cáá Espíritú-á<sup>n</sup> vëxi cuu<sup>n</sup>-xi. <sup>33</sup> Te yúhú ñá túú xiní-í-dé ní cùu, dico Yá Ndiöxí Yaá ní tendaha ñaha xii-í xicá cùu-í dăcuândute-í ñăyiu, Yaá-á<sup>n</sup> nî cachí tnúhu-gá sá tēe na quini-í ngúndecu ndihî Espíritú-gá sá vëxi cuu<sup>n</sup> andïu, te tēe-á<sup>n</sup> taxi-dé Espíritú-gá cundecu ndihî-o. <sup>34</sup> Te yúhú ní xiní-í-dé te xiní ndáá-í sá Dêhe Dútú Ndiöxí cúu-dě. Te xiá<sup>n</sup> cächí tnúhu-í xii-ndo —cächí té Juàá xăha<sup>n</sup>-dě xii-yu.

*Cue tée dîhna nuu xica cuu ndihî Jesús*

<sup>35</sup> Te nduu tněe-á<sup>n</sup> diu-ni xiá<sup>n</sup> ndécú tē Juàá ndihî úú cue tée xica cuu ndihî-dé. <sup>36</sup> Te ní xiní-dé Jèsús ñúhú-gă ichi, te ní xăha<sup>n</sup>-dě xii cue tée xica cuu ndihî-dé-á<sup>n</sup>:

—Chí cündèhe tēe-ă<sup>n</sup>, chi tēe-ă<sup>n</sup> cúu-dě Crìstú Yaá ní tendaha Yă Ndiöxí véxi ñuyíú-a. Te cùu-dé dàtná ì<sup>n</sup> mběé quiti ío váha iní-xi —cächí-dé xăha<sup>n</sup>-dě.

<sup>37</sup> Te sá dúcá<sup>n</sup> nî cáhá<sup>n</sup> té Juàá núú cuè tēe úú ndihî-dé-á<sup>n</sup> nūu ní chinchícú<sup>n</sup>-güedé Jèsús. <sup>38</sup> Te ní nchócótó-gă ndàa sátá-gă, te ní xiní-gá sá nchícú<sup>n</sup> ñáhá-güedě xii-gá. Te ní xăha<sup>n</sup>-gă xii-güedé:

—¿Ná nándücu-ndo? —cachí-gá xăha<sup>n</sup>-gă xii-güedé.

Te ní xăha<sup>n</sup>-güedě:

—¿Nděé ndécú-n, Ràbíí? —cächí-güedé xăha<sup>n</sup>-güedě xii-gá.

Te Ràbíí-á<sup>n</sup> quée-xí Mèstrú tnúhu mee-güedě.

<sup>39</sup> Te ní xăha<sup>n</sup> Jèsús xii-güedé:

—Chí nèhé te quini-ndó —cächí-gá xăha<sup>n</sup>-gă.

Te ní xica-güedé cuáhá<sup>n</sup>-güedé, te ní quexìo-güedé núú quidé vèhe-gá. Te ndècu-ni-güedé ndihi-gá ní cuaa, chi dàtná òré caa cùmí sacuaa ní sáá-güedé.

<sup>40</sup> Te úú cue téé-á<sup>n</sup> nǐ tñi-güedé tnúhu ní cáhán té Juáá, te ní chinchícú<sup>n</sup>-güedé Jèsús. Te núú úú cue téé-á<sup>n</sup>, ñ<sup>n</sup>-dé nání-dě Ndrìxí, te ñaní-dé cúú tǎ Xímú, àdi Pelú chi úú òu-dé. <sup>41</sup> Te té Ndrìxí-á<sup>n</sup> nǐ nanducu-ni-dě ñaní-dé te ní xáha<sup>n</sup>-dè:

—Ní naníhí-ndǐ téé cùu Mesiás —càchí-dé xáha<sup>n</sup>-dè.

Te Mesiás-á<sup>n</sup> quéé-xí Crìstú tnúhu mee-güedě, Yaá ní tendaha Yă Ndiòxí véxi ñuyíú-a. <sup>42</sup> Te ndèca té Ndrìxí ñaní-dé cuáhá<sup>n</sup> núú ndécú Jèsús. Te òré ní xiní ñáhá Jèsús xii té Xímú, te ní xáha<sup>n</sup>-gǎ:

—Yòhó cúú-n tǎ Xímú déhe té Jònás, te vitna danàni ñaha-í Cèfás xii-n —càchí-gá xáha<sup>n</sup>-gǎ.

Te Cèfás-ǎ<sup>n</sup> quéé-xí Pèlú tnúhu mee-güedě.

### *Jèsús ní cáhán-gá té Lìpé ndihi té Natanàél*

<sup>43</sup> Te nduu tnée ní sani iní-gá quíhí<sup>n</sup>-gá distritú Galileá. Te ní naníhí-gǎ ñ<sup>n</sup> téé nàni Lìpé, te ní xáha<sup>n</sup>-gǎ xii-dé:

—Néhe ná quíhí<sup>n</sup>-ó núú quíhí<sup>n</sup>-í-a —càchí-gá xáha<sup>n</sup>-gǎ.

<sup>44</sup> Te té Lìpé-á<sup>n</sup> cúú-dě téé ñuú Bètsaidá. Te òu-ni ñuú yàcá<sup>n</sup> cúú ñuú té Ndrìxí ndihi té Pèlú. <sup>45</sup> Te té Lìpé ní naníhí tnáhá-dě ndihi té Natanàél, te ní xáha<sup>n</sup>-dè:

—Ní naníhí-ndǐ téé dii cuèndú-xi ní chídó tnùnǐ ndíi Moisés ndihi dava-gá cue téé ní xóo cáhán tnúhu Yá Ndiòxí ndée sanaha. Te téé-á<sup>n</sup> nání-dě Jèsús déhe té Chèé, téé ñuú Nazàrét —càchí-dé xáha<sup>n</sup>-dè.

46 Te ní xáha<sup>n</sup> tẽ Natanàél xii té Lìpé:

—¿Te náa ío váha càa ñuú Nazàrét nũu da yàcá<sup>n</sup> quee tée cáhá<sup>n</sup> tnúhu Yá Ndiõxí? —càchí-dé xǎha<sup>n</sup>-dě.

Te ní xáha<sup>n</sup> tẽ Lìpé:

—Néhé ná quíhí<sup>n</sup>-ó te quíní-n —càchí-dé xǎha<sup>n</sup>-dě.

47 Te òré ní xiní Jèsús té Natanàél tá cùyatni-dé cuáhá<sup>n</sup>, te ní cáhá<sup>n</sup>-gá cuèndá-dé te ní cachí-gá:

—Tée véxi-ǎ<sup>n</sup> cúú-dě mei tẽe isràél, te ñá íí<sup>n</sup> ndùu dandahú-dé ñáyiú —càchí-gá xáha<sup>n</sup>-gǎ.

48 Te ní xáha<sup>n</sup> tẽ Natanàél xii Jèsús:

—¿Te nása náquiní ñáhá-n? —càchí-dé xǎha<sup>n</sup>-dě.

Te ní xáha<sup>n</sup> Jèsús:

—Yúhú sa ní xiní ñáhà-í xii-n òré ndécú-gǎ-n càha yutnu ngúxí-ǎ<sup>n</sup> te ni tẽ Lìpé vátá cáná ñàha-gá-dé xii-n òré-á<sup>n</sup> —càchí-gá xáha<sup>n</sup>-gǎ xii-dé.

49 Te sá dúcá<sup>n</sup> ñí cáhá<sup>n</sup>-gá, núu ní xáha<sup>n</sup> tẽ Natanàél xii-gá:

—Mèstrú, yòhó cúú-n Dẽhe Dútú Ndiõxí yíndàha-n ñáyiú isràél —càchí-dé xǎha<sup>n</sup>-dě xii-gá.

50 Te Jèsús ní xáha<sup>n</sup>-gǎ:

—Cuèndá sá ñí xiní ñáhà-í xii-n càha yutnu ngúxí xíǎ<sup>n</sup> iní ñáhá-n, dico cuéhé-gǎ núú sá quíní-n —càchí-gá xáha<sup>n</sup>-gǎ xii-dé.

51 Te ní xáha<sup>n</sup> tùcu-gá:

—Na càchí tnúhu ndáá-í sá sàá nduu, te quíní-ndó nàcaá<sup>n</sup> andiú. Te quíní-ndó cuè espíritú xínú cuèchi núú Yá Ndiõxí sá ndàa nuu-xi quide-xi núú cúndècu yúhú Tée cùu ñaní tnáhá-ndó nchàa-ndo —cachí-gá xáha<sup>n</sup>-gǎ xii-güedé.

## 2

*Vico tnǎndaha íó ñuú Cànaá*

<sup>1</sup> Te nduu úní sá dúcá<sup>n</sup> ñí cuu te ní xóo ñí<sup>n</sup> vico tnǎndaha ñuú Cànaá, ñí<sup>n</sup> ñuú yíndèhu distritú Galileá. Te yàcá<sup>n</sup> ní xíndecu nǎná Jèsús. <sup>2</sup> Te tnàhá Jèsús ndìhi cue tée xica cuu ndìhi-gá ní cáhá<sup>n</sup>-yu cuáhá<sup>n</sup>-gá ndìhi-güedé vico-á<sup>n</sup>. <sup>3</sup> Te òré ní ndìhi vínú, te ní xáha<sup>n</sup> nǎná Jèsús xii-gá:

—Ñá túú-gǎ vínú ndécú ndìhí-yu —càchí-a<sup>n</sup> xǎha<sup>n</sup>-a<sup>n</sup>.

<sup>4</sup> Te ní xáha<sup>n</sup> Jèsús xii-a<sup>n</sup>:

—Nǎá, ñá túú xìni ñuhu-xi da yúhú cúñaha-n cuendá vínú-á<sup>n</sup>, chi vátá tnàhá-gá òré quiní-yu yoo cùu yúhú —càchí-gá xáha<sup>n</sup>-gǎ xii-a<sup>n</sup>.

<sup>5</sup> Te ní xáha<sup>n</sup>-a<sup>n</sup> xii ñáiyu xìnu cuechi:

—Cada-ndo nchàa nacuáa na càhá<sup>n</sup> Jèsús —càchí-a<sup>n</sup> xǎha<sup>n</sup>-a<sup>n</sup>.

<sup>6</sup> Te yàcá<sup>n</sup> nútñí íñú quídi yúu te quée dàtná ñí<sup>n</sup> ciendú lítrú ndute ñí<sup>n</sup> ñí<sup>n</sup> quídi-á<sup>n</sup>. Te ndute-á<sup>n</sup> nándìhi ñáiyu isràél ndáhǎ-yu te nàqueté-yu cóhǒ-yu chí duca<sup>n</sup> tnàhí quidé-yu nàcuáa sàndáá iní-yu Yá Ndiöxí. <sup>7</sup> Te ní xáha<sup>n</sup> Jèsús xii nchaa cue tée xìnu cuechi:

—Nadachítú-ndó ndùte ndì nchaa quídi-á<sup>n</sup> —càchí-gá xáha<sup>n</sup>-gǎ xii-güedé.

Te ní nadachítú-güedé. <sup>8</sup> Te ní xáha<sup>n</sup>-gǎ:

—Vitna te tava-ndo lùha, te canehe-ndo quíhí<sup>n</sup> cuáha-ndo tée quide vico —cachí-gá xáha<sup>n</sup>-gǎ xii-güedé.

Te duca<sup>n</sup> ñí quide-güedé ní tava-güedé luha nèhe-güedé cuáhá<sup>n</sup> ní sáha-güedé tée quide vico.

<sup>9</sup> Te ní xito ndéé tée quide vico-á<sup>n</sup>, te sa ní nduu-xi



vinú, te ñá túú ní xíní-dé ndèé véxi-xi, dico mee cue téé xínu cuechi sa naha-güedé núú ñ tava-güedé. Duca<sup>n</sup> te téé quide vico-á<sup>n</sup> ñ cana-dé téé tnãndaha.

<sup>10</sup> Te ní xáha<sup>n</sup>-dê:

—Nchaa ñáyiú quide vico queñuhú-yu díhna-gá vinú váha. Te sa vâi vinú váha xihí-yu, te dâtnùní queñuhú-yu vinú ndàhú. Te yòhó díhna-gá vinú ndàhú ní queñuhu-n, te ndéé núú ñ ndihí-ná ní queñuhu-n vinú váha —càchí téé quide vico-á<sup>n</sup> xãha<sup>n</sup>-dê xii téé tnãndaha-á<sup>n</sup>.

<sup>11</sup> Te sá ñ nadatiú Jesús ndute-á<sup>n</sup> ñ nduu-xi vinú cúú-xí ì<sup>n</sup> chiu<sup>n</sup> díhna nuu sã vã yõo tnàhí ndàcu cada ní quide-gá ñuú Cànaá, ì<sup>n</sup> ñuú yíndèhu distritú Galiléa, te chiu<sup>n</sup> ní quide-gá-á<sup>n</sup> cúú-xí ì<sup>n</sup> chiu<sup>n</sup> cahnu vihi, núu xíã<sup>n</sup> ní cutnùní iní-yu sá ïo càhnu cuu-gá, te ní sándáá iní ñáhá nchàa cue téé xica cuu ndihí-gá.

<sup>12</sup> Te sátá ñ yáha vico, te ní xica Jèsús ndihí náná-gã, ndihí cue ñaní-gá, ndihí nchaa cue téé xica cuu ndihí-gá cuáhá<sup>n</sup>-yu ñuú Capèrnaúm. Te yàcá<sup>n</sup> ní xíndecú-yu ì<sup>n</sup> úú nduu ndihí-gá.

*Jèsús ñá túú tnàhá iní-gá nàcuáa quide ñáyiú xití veñúhu*

*(Mt. 21:12-13; Mr. 11:15-18; Lc. 19:45-46)*

<sup>13</sup> Te ta cùyatní cada ñáyiú isràél vico pàscuá, te ní xica Jèsús cuáhá<sup>n</sup>-gá ñuú Jerusálén. <sup>14</sup> Te sátá ñ sáá-gá yàcá<sup>n</sup>, te ní xica-gá cuáhá<sup>n</sup>-gá veñúhu càhnu sá ïo cùnuyu, te xití veñúhu-á<sup>n</sup> ñ xíní-gá ndécú ñáyiú dicó-yu ndicutu, mbéé ndihí lõmá, te tnàhá ñáyiú dàma díhú<sup>n</sup> núcõo-yu ní xíní-gá. <sup>15</sup> Te ní quehe<sup>n</sup>-gá ì<sup>n</sup> úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé veñúhu, ndihí

ndicutú-yu ndihi mběě-yu. Te cue ñáyiú dàma díhú<sup>n</sup>-ă<sup>n</sup> ní dǎngöyo-gá díhǔ<sup>n</sup>-yu, te ní dándùá-gá mèsá-yu. <sup>16</sup> Te ní xáha<sup>n</sup>-gǎ xii cue ñáyiú dìco lómá:

—¡Queñuhu-ndo nchàa quitì-a xití veñúhu-a! ¡Vá cǎdá-ndó vèhe núú yǎhu núú cúú vèhe Tǎtà-í Dútú Ndiöxí! —càchí-gá xáha<sup>n</sup>-gǎ xií-yu.

<sup>17</sup> Te xiǎ<sup>n</sup> ní ndacu iní cue téé xica cuu ndihi-gá sá dúcá<sup>n</sup> yòdo tnuní núú tütú-gá, te càchí-xi: “Ío cùyica iní-í chi ñá cuìní-yu canehe ï-yu vehe Tǎtà-í”, duha càchí-xi núú tütú-gá.

<sup>18</sup> Te ní xáha<sup>n</sup> cuè téé isràél xii-gá:

—¿Ná cúú sǎ vǎ yǒo tnàhí ndàcu cada, cada-n cuèndá cutnùní iní-ndí sá cúú dùha taxi tnuní ñáhá-n xì-ndí-í? —càchí-güedé xáha<sup>n</sup>-güedě xii-gá.

<sup>19</sup> Te ní xáha<sup>n</sup> Jèsús:

—Chí dǎngöyo veñúhu-a, te není xití úní nduu te sa nadaxínu-í —càchí-gá xáha<sup>n</sup>-gǎ xii-güedé.

<sup>20</sup> Te ní xáha<sup>n</sup> tùcu cue téé isràél:

—Údico ïnú cuíá ñí xíndecuu-güedé ní sáá veñúhu-a, te yòhó cuìní-n nàdaxínu-n xití úní-ni nduu —càchí-güedé xáha<sup>n</sup>-güedě xii-gá.

<sup>21</sup> Dico sá ñí cǎhá<sup>n</sup>-gá chi ñá díú cuèndá veñúhu ni cǎhá<sup>n</sup>-gá chi cuèndá yiqui cùñú-gá ní cǎhá<sup>n</sup>-gá.

<sup>22</sup> Núu sǎtá ñí xihí-gá, te ní ndoto-gá, te òré-án ñí ndacu iní cue téé ní xica cuu ndihi-gá nàcuáa ní cǎhá<sup>n</sup>-gá, núu xiǎ<sup>n</sup> ní sándáá iní-güedé tnúhu yòdo tnuní núú tütú-gá. Te duca<sup>n</sup> te ní sándáá iní-güedé tnúhu ní cǎhá<sup>n</sup>-gá.

*Jèsús xìní-gá nàcuáa cǎa iní nchaa ñáyiú*

<sup>23</sup> Te òré ndécú Jèsús vico pàscuá, te ío vai ñáyiú ní sándáá iní ñáhá xì-gá cuèndá ío titní sá vǎ yǒo

tnàhí ndàcu cada ní quide-gá ní xiní-yu. <sup>24</sup> Dico Jèsús ñá ní cǎhá<sup>n</sup>-gá nchaa tnúhu ñùhu iní-gá, chi sa ní cutnùní iní-gá sá ñà túú cùu váha iní-yu. <sup>25</sup> Te ñá túú xini ñuhu-gá ì<sup>n</sup> ñáyiú cùñaha nàcuáa càa iní nchaa tnàha ñáyiú-yu, chi mee-gǎ sa nàha ndáá-gá nàcuáa càa iní-yu ncháá-yu.

### 3

#### *Jèsús ndihí té Nicòdemú*

<sup>1</sup> Ní xíndecu ì<sup>n</sup> tée cùu fariséú ní xínani-dě Nicòdemú, te ní cuu-dé ì<sup>n</sup> tée cùnūu núú ñáyiú isràél. <sup>2</sup> Te tée-á<sup>n</sup> ñǎ sáhá<sup>n</sup>-dé niú ní cǎhá<sup>n</sup> ndihí-dé Jèsús, te ní xáha<sup>n</sup>-dě:

—Mèstrú, yúhú ndihí dava-gá-güedé sa nàha-ndí sá Yǎ Ndiǒxí ní tendaha ñàha-gá xii-n vèxi-n dànehé ñáhá-n xii-ndí, chi núu ñá túú Yǎ Ndiǒxí ndécú ndihí-n, te vá ndácú-n càda-n nchaa sá vǎ yǒo tnàhí ndàcu cada quide-n —cǎchí-dé xáha<sup>n</sup>-dě.

<sup>3</sup> Te ní xáha<sup>n</sup> Jèsús:

—Na cǎchí tnúhu ndáá-í xii-n sǎ ncháá ñáyiú vá ná càcu saa tucu, te vá ndǐhu ndaha ñàha Yǎ Ndiǒxí xii-yu —cǎchí-gá xáha<sup>n</sup>-gǎ xii-dé.

<sup>4</sup> Te ní xáha<sup>n</sup> tǎ Nicòdemú:

—¿Te nása cada ì<sup>n</sup> ñáyiú sa ní yì te cacu-ni tucú-yu? ¿Náa ndíhu tucú-yu xití nǎnǎ-yu te cacu tucú-yu xito cùu uú-ǎ<sup>n</sup>? —cǎchí-dé xáha<sup>n</sup>-dě xii-gá.

<sup>5</sup> Te ní xáha<sup>n</sup> Jèsús:

—Na cǎchí tnúhu ndáá-í xii-n sǎ nchàa ñáyiú na ndùu ndoo nduu nine iní-xi cuú-yu ñáyiú ní na càcu saa ndihí ndute ndihí Espíritú Yǎ Ndiǒxí, ñáyiú-á<sup>n</sup> ndǐhu ndaha ñàha-gá xii-yu. <sup>6</sup> Te nchaa ñáyiú càcu ñuyíú-a, chi déhe ñáyiú ñuyíú-a cùú-yu.

Te ñáyiú ní nduu ndoo ní nduu nine iní-xi, ñáyiú-á<sup>n</sup> ñí nduu táhũ-yu Espíritú Yă Ndiöxí te tàxi tnuní ñáhá-nă Espíritú-gá xii-yu. <sup>7</sup> Te vá cúñũhu-n tnũhu ní cáhá<sup>n</sup>-í-a, chi nchaa ñáyiú ní sándáá iní ñáhá xii-í ní nduu ndoo ní nduu nine iní-yu, te ñáyiú-á<sup>n</sup> cúũ-yu dàtná ñáyiú ní nacacu saa. <sup>8</sup> Táchí ndèni xíá<sup>n</sup> tècú dóho-o xico-xi, dico ñá túú xini-ó ndèè ichi véxi-xi, te ni ñà túú xini-ó ndèè ichi cuáhá<sup>n</sup>-xi. Duca<sup>n</sup> sãtnahá-xi cùu Espíritú-gá ndécú ndìhi ñáyiú ní nduu ndoo ní nduu nine iní-xi — càchí-gá xáha<sup>n</sup>-gă xii-dé.

<sup>9</sup> Te dàtnuní ní xicá<sup>n</sup> tnúhú tùcu té Nicòdemú núú-gă, te xăha<sup>n</sup>-dê xii-gá:

—¿Te nása ndùu tnúhu càhá<sup>n</sup>-n dùca<sup>n</sup> cahá<sup>n</sup>-n? — càchí-dé xăha<sup>n</sup>-dê xii-gá.

<sup>10</sup> Te ní xáha<sup>n</sup> Jèsús:

—Yòhó cúú-n ì<sup>n</sup> téè cùtnuní iní-xi, chi dàcuaha-n ñáyiú isràèl, ¿te ñá tècú tnùnì-n tnũhu càhá<sup>n</sup>-í-u?

<sup>11</sup> Te na càchí tnúhu ndáá-í xii-n sã nchũhú càhá<sup>n</sup>-ndí ì<sup>n</sup> sá ñí tecú tnùnì-ndí, te càhá<sup>n</sup> ndáá-ndí cuèndá ì<sup>n</sup> sá ñí xini-ndí. Dico nchòhó ñá tècú tnùnì-ndó tnũhu càhá<sup>n</sup>-ndí. <sup>12</sup> Te ñá sándáá iní-ndó tnũhu càhá<sup>n</sup>-í cuèndá nchaa nàcuáa cùu ñuyiú-a, te uu<sup>n</sup>-gá cada-ndo ñũu cáhá<sup>n</sup>-í cuèndá nchaa nàcuáa cùu andiú.

<sup>13</sup> Vá yõo ì<sup>n</sup> sàá andiú, te cani-xi cuèndú nàcuáa càa. Chi ì<sup>n</sup> dîi díi-ni yúhú véxi cuu<sup>n</sup>-í andiú, te cùu-í ñaní tnáhá-ndó nchàa-ndo. Te diu-ni yàcá<sup>n</sup> ndaa-í cundecu-í. <sup>14</sup> Te dàtná ní ndanehe ndíi Moisés cóo ñí sata caa ndíi-dí xití yucu, duca<sup>n</sup> càda ñaha-güedé cata caa ñaha-güedé núú cùrúxí xii yúhú Téè cùu ñaní tnáhá-ndó nchàa-ndo ì<sup>n</sup> nduu, <sup>15</sup> te duca<sup>n</sup> yăha-í cuèndá nchaa ñáyiú na quìndáá iní ñáhá xii-í

te nduu táhŭ-yu cundecú-yu ndihi Yá Ndiöxí ni caa ni quíhí<sup>n</sup> —càchí-gá xáha<sup>n</sup>-gă xii-dé.

*Yá Ndiöxí ío cùu iní-gá ñáyíu ñuyíú-a*

<sup>16</sup> Te Yá Ndiöxí ío cùu iní-gá ñáyíu ñuyíú-a. Te ì<sup>n</sup>dii-ni Déhe-gá ndécú, te ní tendaha ñàha-gá ní quixi-gá ñuyíú-a, te núu na quìndáá iní ñáhá ñáyíu, te vá cuíta nihnú-yu, chi nduu táhŭ-yu cundecú-yu ndihi-gá ni caa ni quíhí<sup>n</sup>. <sup>17</sup> Te Yá Ndiöxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyíu, chi ní tendaha-gă Déhe-gá ní quixi-gá sá dácăcu nihnu-gá ñáyíu ñuyíú-a núú ùhú núú ndàhú.

<sup>18</sup> Nchaa ñáyíu sàndáá iní ñáhá xì Déhe-gá, te vá cuíta nihnú-yu. Te nchaa ñáyíu ñá túú sàndáá iní ñáhá xì Déhe-gá ñùhú-yu ichi cuáhá<sup>n</sup>-yu núú ùhú núú ndàhú, chi ñá túú sàndáá iní-yu Déhe Dútú Ndiöxí. <sup>19</sup> Chi ní quixi Déhe-gá ñuyíú-a ní dándíxí tŭu-gá iní-yu cuèndá cutnùní iní-yu nàcuáa ndùu cuendá Yă Ndiöxí te tní<sup>n</sup>-yu ì<sup>n</sup> ichi váha ni cùu, te ñá ní tnàhá iní-yu, chi ní cudíí<sup>n</sup>-gă iní-yu nchaa sá cuèhé sá dúhá dăcúúxí să vâha, núú xíă<sup>n</sup> tá xíta nihnú-yu cuáhá<sup>n</sup>. <sup>20</sup> Te nchaa ñáyíu quide nchaa sá cuèhé sá dúhá ñă tnàhá iní-yu cutnùní iní-yu nàcuáa ndùu cuendá Yă Ndiöxí, te ñá tní<sup>n</sup>-yu tnúhu-gá cuèndá yùhú-yu nduu tnùní nchaa sá quídě-yu. <sup>21</sup> Te nchaa ñáyíu ñùhu ichi ndáá cuìní-yu cutnùní iní-yu nàcuáa ndùu cuendá Yă Ndiöxí, te cùtnuní sá chíndèe ñàha-gá xií-yu, chi quide váha-yu.

*Té Juáá tée dàcuandute ñàha xii ñáyíu càhá<sup>n</sup> váha tucu-dé cuèndá Jèsús*

22 Te sáta dúcá<sup>n</sup> ñí cuu, te ní quee Jèsús cuáhá<sup>n</sup>-gá ndihí cue tée xica cuu ndihí-gá distritú Jùdeá. Te yàcá<sup>n</sup> ní xíndecu tnaa-gá ndihí-güedé ní xóo dacuàndute-güedé ñáyíu. 23 Te ndècu té Juàá ì<sup>n</sup> xichi núu nání Ènón yatni ñuú Sàlém dácua<sup>n</sup>ndute-dé ñáyíu, chi yàcá<sup>n</sup> ío váha ñùhu ndute, núu xíá<sup>n</sup> ní xóo quíhí<sup>n</sup> ñáyíu yàcá<sup>n</sup> ní xóo cuanduté-yu. 24 Duha ní cuu cútnàhá vátá ngává-gă té Juàá vecaá.

25 Te ní cacu ì<sup>n</sup> cuèndú ní cáhá<sup>n</sup> cue tée xica cuu ndihí té Juàá ndihí ì<sup>n</sup> úú cue tée israél, núu ndèdacàa sá vâha-gá cada ñáyíu cuèndá nduu ì<sup>n</sup>-yu. 26 Te ní sáhá<sup>n</sup>-güedé núu ndécú tē Juàá ní xâha<sup>n</sup>-güedě:

—Mèstrú, tée ní quixi núu ñí xíndecu-n ndàa ingá xio yúte Jòrdán, tée dii cuèndú-xi ní cáhá<sup>n</sup>-n, tée-á<sup>n</sup> dácua<sup>n</sup>ndute-dé tnàhá-dé ñáyíu. Te ío vâi ñáyíu ní chinchícú<sup>n</sup> ñáhá xii-dé —câchí-güedé xâha<sup>n</sup>-güedě xii-dé.

27 Te ní xâha<sup>n</sup> tē Juàá:

—Te vá yõo ì<sup>n</sup> ndàcu cada ì<sup>n</sup> chiu<sup>n</sup> nacuáa cuu váha iní Yâ Ndiõxí, te núu ñá túú mèe-gá chíndèe ñaha-gá xii-yu. 28 Te nchòhó sa nâha-ndo sá yùhú ní cáhá<sup>n</sup> ndáá-í sá ñà díú Crìstú cúu-í, dico mee Yâ Ndiõxí ní tendaha ñâha-gá yódó nuu-í véxi núu Yàá-á<sup>n</sup>. 29 Te nchòhó xini-ndó sã ì<sup>n</sup> tée tnândaha te xíchí tnândaha ndihí-ná-dé cúndihí-dé. Te tée ní xica ndáhú ìo cùdíí iní-dé ndèdóho-dé nchaa tnúhu càhá<sup>n</sup> tée tnândaha-á<sup>n</sup>. Te duca<sup>n</sup> sãtnahá-xi cùu yúhú, chi ío cùdíí iní-í sá vái ñáyíu ta chinchícú<sup>n</sup> ñáhá xii Jesús cuáhá<sup>n</sup>. 30 Te uu<sup>n</sup>-gá cuita cuu vâi ñáyíu cutnùní iní-xi sá ìo cùnuu-gá, te yúhú cuita ndóo ndee-í quíhí<sup>n</sup> —câchí-dé xâha<sup>n</sup>-dě xii-güedé.

### *Crìstú véxi cuu<sup>n</sup>-gá andïu*

<sup>31</sup> Te ì<sup>n</sup>dìi díi-ni Crìstú Yaá véxi cuu<sup>n</sup> andïu cùn<sup>u</sup>-gá núú ñùyíú-a. Te nchaa ñáyi<sup>u</sup> ndècu ñuyíú-a cùú-yu ñáyi<sup>u</sup> ñuyíú iha, te càhá<sup>n</sup>-yu sá cúú-xí ñùyíú-a. Dico Crìstú Yaá véxi cuu<sup>n</sup> andïu <sup>32</sup> càhá<sup>n</sup>-gá ì<sup>n</sup> sá ñǎ xini-gá, te càhá<sup>n</sup>-gá ì<sup>n</sup> sá ñǎ tecú dóho-gá. Te ñá túú cuini-yu quindáá iní-yu tnúhu càhá<sup>n</sup>-gá. <sup>33</sup> Te nchaa ñáyi<sup>u</sup> tnì tnúhu càhá<sup>n</sup> Yaá véxi cuu<sup>n</sup> andïu-á<sup>n</sup> càhá<sup>n</sup>-yu sá tnúhu Yá Ndiòxí cúú-xí ì<sup>n</sup> sá ndàá. <sup>34</sup> Te Déhe-gá Yaá véxi cuu<sup>n</sup> andïu càhá<sup>n</sup>-gá mee-ni tnúhu-gá. Te ñá ùhú iní-gá ní sáñaha-gǎ Espiritú-gá ndécú ndìhi Déhe-gá. <sup>35</sup> Te Dútú Ndiòxí ío cùu iní-gá Déhe-gá, núu ní xáha<sup>n</sup>-gǎ sá méé-gǎ taxi tnùní-gá nchaandi túhú sá ío. <sup>36</sup> Te nchaa ñáyi<sup>u</sup> na quindáá iní ñáhá xii Déhe-gá, ñáyi<sup>u</sup>-á<sup>n</sup> cundecú-yu ndìhi-gá ni caa ni quíhí<sup>n</sup>. Te nchaa ñáyi<sup>u</sup> vá quindáá iní ñáhá xii Déhe Yá Ndiòxí ío dandòho ñaha-gá xií-yu.

## 4

### *Jèsús ndìhi ì<sup>n</sup> ñaha Sàmariá*

<sup>1</sup> Te ní níhí cue téé cùu fariséú tnúhu sá vài-gá ñáyi<sup>u</sup> ta chinchícú<sup>n</sup> ñáhá xii Jesús. Te duca<sup>n</sup> vài-gá-yu ta dàcuandute-gá cuhá<sup>n</sup> dàcúxí tǎ Juáá. <sup>2</sup> Te cuèi ñá díú mèe-gá dácua<sup>n</sup>ndute ñaha-gá xií-yu, dico cue téé xica cuu ndìhi-gá dácua<sup>n</sup>ndute ñaha-güedé xií-yu. <sup>3</sup> Te ní níhí Jèsús tnúhu nàcuáa càhá<sup>n</sup> cue téé cùu fariséú, núu ní ndee-gá distritú Jüdeá cuánuhú tucu-gá distritú Galiléa.

<sup>4</sup> Te ichi ñùhu-gá ní nayáha-gá distritú Sàmariá.

<sup>5</sup> Te ní sáá-gá ì<sup>n</sup> ñúú nání Sìcár te ñúú-á<sup>n</sup> yíndèhu-xi

distritú Sàmariá. Te xíá<sup>n</sup> cáá yàtni ñuhu núú nǐ sáha táhú ndíi Jàcób déhe ndíi ndíi Chèé. <sup>6</sup> Te yàcá<sup>n</sup> cáá dòco ní cuu cuendá ndíi Jàcób. Te cùu-xi datná cuádava nduu ñuhu Jesús ichi, te ío ní xàú-gá nǔu ní sáá-gá yuhu dòco-á<sup>n</sup> nǐ ngóo-gá ndétátú-gá. <sup>7-8</sup> Te ní xica cue téé xica cuu ndihí-gá cuáhá<sup>n</sup>-güedé xití ñuú Sìcár cuánguaa<sup>n</sup>-güedé sá cáxí-güedé. Te yuhu dòco-á<sup>n</sup> núcõo-gá ní sáá ñ<sup>n</sup> ñadìhí ñaha distritú Sàmariá véxi quéhnu-a<sup>n</sup> ndute, te ní xáha<sup>n</sup> Jèsús:

—Taxi táhú luha ndute na còho-í —càchí-gá xáha<sup>n</sup>-gǎ.

<sup>9</sup> Te ní xáha<sup>n</sup> ñadìhí-á<sup>n</sup>:

—¿Ná cuendá da núu-í xicá<sup>n</sup>-n ndùte coho-n? Te yòhó cúu-n tée isràél, te yúhú cúu-í ñaha Sàmariá —càchí-a<sup>n</sup> xǎha<sup>n</sup>-a<sup>n</sup> xìi-gá.

Te duca<sup>n</sup> nǐ xáha<sup>n</sup>-a<sup>n</sup>, chi ñá túú ndècu váha ñáyiu isràél ndihí ñáyiu distritú Sàmariá. <sup>10</sup> Te ní xáha<sup>n</sup> Jèsús xii-a<sup>n</sup>:

—Ñá cútnùní iní-n nǎ taxi Yá Ndiõxí xii-n, te ni ñǎ cútnùní iní-n yòo xicá<sup>n</sup> ndute núu-n. Te núu dícó xìní-n yòo cuu yúhú á, te da mee-n cǎcá<sup>n</sup>-n ndùte núu-í coho-n, te yúhú taxi-í ndute cundecu ndihí-n nǔú cuáhá<sup>n</sup> núú véxi —càchí-gá xáha<sup>n</sup>-gǎ.

<sup>11</sup> Te ní xáha<sup>n</sup> tùcu ñadìhí-á<sup>n</sup>:

—Tátá, nì sá quéhnu-n ndùte ñá túú nèhe-n, te doco-a cùnú víhí, te ñá túú ndèé quínguehe<sup>n</sup>-n ndùte taxi-n coho-í. <sup>12</sup> Ndíi Jàcób ñani tnáhá-ndí ní xíndecu ndèé sanaha nǐ cadúha ndíi doco-a nǐ tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cúnùu-gá-n dàcúxí ndíi-ǎ<sup>n</sup>? —càchí-a<sup>n</sup> xǎha<sup>n</sup>-a<sup>n</sup> xìi-gá.



13 Te ní xáha<sup>n</sup> Jèsús:

—Nchaa ñáyíu xìhi ndute doco-a, te vá cúú větú dúcá<sup>n</sup> iní-yu chi dayìchí ñáhá-ní tùcu-xi ndute-a.

14 Dico nchaa ñáyíu na còho ndute na cuáñaha-ĩ, te vá íí<sup>n</sup> ndùu-gá dayìchí ñáhá-xí ndùte-á<sup>n</sup> xií-yu, chi ndute cuáñaha-ĩ cúú-xí ndùte váha-gá. Te dàtná quée ñihni ndute xití doco-a, nchaa-ni nduu ñùhu ñá túú yìchí, duca<sup>n</sup> sàtnahá-xi cada-xi chi can-deca-xi iní-yu ñi caa ñi quíhí<sup>n</sup>, te núu na còhó-yu ndute cuáñaha yùhú —càchí-gá xáha<sup>n</sup>-gă xii-a<sup>n</sup>.

15 Te ní xáha<sup>n</sup>-a<sup>n</sup>:

—Tătá, taxi ndute-á<sup>n</sup> ná còho-í cuendá sá vă dáyìchí ñáhá tnàhí-gá-xi ndute. Te vá quíxí-gă-í quixi quéhnu-í ndute doco-a —càchí-a<sup>n</sup> xăha<sup>n</sup>-a<sup>n</sup> xii-gá.

16 Te ní xáha<sup>n</sup> Jèsús:

—Cuàhá<sup>n</sup> cuángàna yìi-n, te quixi-ndo ìha —cachí-gá xáha<sup>n</sup>-gă xii-a<sup>n</sup>.

17 Te ní xáha<sup>n</sup>-a<sup>n</sup>:

—Ñá túú yìi-í —càchí-a<sup>n</sup> xăha<sup>n</sup>-a<sup>n</sup> xii-gá.

Te ní xáha<sup>n</sup> tùcu Jèsús:

—Ndáá càhá<sup>n</sup>-n să ñà túú yìi-n. 18 Dico ní cuu úhú<sup>n</sup> téé cãndeca-n, te téé ndèca-n vitna chi ñá díú yìi-n cuu-dé, te ndáá càhá<sup>n</sup>-n să ñà túú yìi-n —cachí-gá xáha<sup>n</sup>-gă xii-a<sup>n</sup>.

19 Te sá dúcá<sup>n</sup> ñí xáha<sup>n</sup>-gă ñũu ní xáha<sup>n</sup> tùcu-a<sup>n</sup>:

—Tătá, yúhú sání iní-í sá yòhó cúú-n ìí<sup>n</sup> téé càhá<sup>n</sup> tnúhu Yá Ndiõxí. 20 Te cue ñani tnáhá-ndí<sup>n</sup> ní xindecu ndée sanaha ñí xóo cada cahnú-yu Yá Ndiõxí tĩndúú-a, dico nchòhó ñáyíu isràél càchí-ndó să ndée ñuú Jerusàlén cada cahnú-o-gá —càchí-a<sup>n</sup> xăha<sup>n</sup>-a<sup>n</sup> xii-gá.

21 Te ní xáha<sup>n</sup> Jèsús xii-a<sup>n</sup>:

—Ï<sup>n</sup> tnúhu na càhá<sup>n</sup>-í-a, te quindáá iní-n. Sa ta cùyatni sáá nduu sá ñà díú-gǎ mee-ni tìndúú-a, te ni ñà díú-gǎ mee-ni ñùú Jerusàlén cada càhnu-ndo Tátá-ó Dǔtú Ndiǒxí, chi nděni ní cuu cada càhnu-ndo-gá. 22 Te nchòhó cue ñáyiu Sàmariá chi ñá cútnùní iní-ndó ñă cúú sǎ quidé càhnu-ndo, dico nchúhú ñáyiu isràél, chi cùtnuní iní-ndí ná cúú sǎ quidé càhnu-ndí. Chi ï<sup>n</sup> téé isràél véxi-dé dàcácu nihnu-dé ñáyiu cuendá vá quihí<sup>n</sup>-yu núú ùhú núú ndàhú. 23 Te není vitna ngúíta-yu cada càhnu ndisá-yu Tátá-ó Dǔtú Ndiǒxí, te cadá-yu ni yùhu ni iní-yu sá cúú-xí-gǎ, chi mee-gǎ duca<sup>n</sup> cuìní-gá cadá-yu cada càhnú-yu-gá. 24 Te Yá Ndiǒxí chi ï<sup>n</sup> espíritú cúú-gǎ. Te nchaa ñáyiu na càda cahnu ñaha, te cadá-yu ni yùhu ni iní-yu sá cúú-xí-gǎ te cadá-yu dàtná càhá<sup>n</sup> tnúhu-gá —càchí-gá xáha<sup>n</sup>-gǎ xii-a<sup>n</sup>.

25 Te ní xáha<sup>n</sup> ñàdihí-á<sup>n</sup>:

—Xìní-í sá quíxí tēe cùu Mesiás, téé càchí-güedé nání Crìstú. Te téé-ǎ<sup>n</sup> ná sáá-dé, te cachí tnúhu ndáá-dé nàcuáa cuu —càchí-a<sup>n</sup> xáha<sup>n</sup>-a<sup>n</sup> xìi-gá.

26 Te ní xáha<sup>n</sup> Jèsús:

—Dìu téé-á<sup>n</sup> cúú yǔhú téé ndàtnúhu ndihí-n —càchí-gá xáha<sup>n</sup>-gǎ xii-a<sup>n</sup>.

27 Te òré-á<sup>n</sup> ñí ndexìo cue téé xìca cuu ndihí-gá, te ní cuñúhu-güedé sá ndàtnúhu-gá ndihí ñàdihí-á<sup>n</sup>. Dico ni ï<sup>n</sup>-güedé ñá ní xìcá<sup>n</sup> tnúhú-güedé núú-gǎ nǔu ná cuendú ndàtnúhu-gá ndihí ñàdihí-á<sup>n</sup>.

28 Duca<sup>n</sup> te ní dándöo ñàdihí-á<sup>n</sup> yoó ndute-a<sup>n</sup> xíá<sup>n</sup>, te

ní xica-a<sup>n</sup> cuánuhú-a<sup>n</sup> ñuú cútnũhu-a<sup>n</sup> ñáyiu cuendá Jèsús. <sup>29</sup> Te ní xáha<sup>n</sup>-a<sup>n</sup>:

—Chí nèhé ná quihí<sup>n</sup>-ó, chí quiní-ndó nă cúú ì<sup>n</sup> téé núcóo yuhu dòco-á<sup>n</sup> nũu ñá díú Crístú Yaá ní tendaha Yă Ndiõxí véxi ñuyíú-a cùu-dé nũu ní cáhá<sup>n</sup> ndáá-dé nàcuáa cùu ndecu-í —càchí-a<sup>n</sup> xăha<sup>n</sup>-a<sup>n</sup> xii-yu.

<sup>30</sup> Te sá nĩ níhí ñăyiu ñuú-á<sup>n</sup> tnũhu, xiă<sup>n</sup> ní xicá-yu cuáhá<sup>n</sup>-yu. <sup>31</sup> Te òré vátá sàá-gá-yu xía<sup>n</sup> nĩ xáha<sup>n</sup> cuè téé xica cuu ndihi-gá xii-gá:

—Mèstrú, cudèhñu na cudehñu-o —cachí-güedé xăha<sup>n</sup>-güedě xii-gá.

<sup>32</sup> Te ní xáha<sup>n</sup>-gă:

—Ndècu ì<sup>n</sup> sá cáxì-í, ì<sup>n</sup> sá ñà túú xìní nchòhó —càchí-gá xáha<sup>n</sup>-gă xii-güedé.

<sup>33</sup> Te cue téé xica cuu ndihi-gá xitnàha-güedé:

—Váa ió ñáyiu ní quixi nehe sá nĩ xexi-gá nũu duha càhá<sup>n</sup>-gá —càchí-güedé xitnàha-güedé.

<sup>34</sup> Te ní xáha<sup>n</sup>-gă:

—Dàtná cuiní-ndó cùu vétú iní-ó òré xéxí-ó, duca<sup>n</sup> cùu vétú iní-í quidè-í nchaa nàcuáa ní cáhá<sup>n</sup> Yă Ndiõxí Yaá ní tendaha ñàha xii-í véxi-í ñuyíú-a, te chiú<sup>n</sup>-gá ío cùdí iní-í dandìhi-í. <sup>35</sup> Te nchòhó càchí-ndó să cùmání cǔmí-gă yóó te cuu itú. Dico yúhú càchí-í sá cundehe-ndo ñáyiu-ă<sup>n</sup>, chí sa ndècu túha-yu, dàtná cúú-nă itú sá sà ní cuu-ná natahu-o cùú-yu, chí sa ndècu túha-ná-yu cundedóho-yu tnúhu-í. <sup>36</sup> Te dàtná cúú ñăyiu nàtahu itú chí sa cúhu<sup>n</sup> yáhu-yu, duca<sup>n</sup> sãtnahá-xi cùu ñáyiu na càhá<sup>n</sup> tnúhu-í, chí cuãñaha-ĩ sá ndúú tãhũ-yu na sàá nduu. Te nchaa ñáyiu na tñi<sup>n</sup> tnúhu-í te nduu táhũ-yu cundecu-í ndihí-yu ni caa

ni quíhí<sup>n</sup>. Te dàtná cúú ñǎyiu ní chihi tatá-xi, ndíhi ñáyiu ní natahu ítú-xi cùdíí-nǎ iní-yu. Duca<sup>n</sup> sǎtnahá-xi cùu ñáyiu na càhá<sup>n</sup> tnúhu-í. <sup>37</sup> Chi ndáá quée-xí nàcuáa cuáhá<sup>n</sup> ì<sup>n</sup> cuèndú sá càchí-xi: “Tucu téé ní chihi tatá, te tucu téé ní natahu”, duha cuáhá<sup>n</sup> cuèndú-á<sup>n</sup>. <sup>38</sup> Te yúhú tendaha ñaha-í xii-ndo quíhí<sup>n</sup>-ndó cǎhá<sup>n</sup>-ndó tnúhu-í núú sà ní yáha-güedé ní cáhá<sup>n</sup>-güedé tnúhu-í. Te nchòhó quíhí<sup>n</sup>-ndó dìcò-nǎ nduu cuèndá-ndó chiú<sup>n</sup>-á<sup>n</sup> — càchí-gá xáha<sup>n</sup>-gǎ xii-güedé.

<sup>39</sup> Te ío cuéhé ñáyiu ñuú-á<sup>n</sup> ñí xíndedóho-yu cuèndú ní cani ñadìhí-á<sup>n</sup> nǔú-yu sá Jèsús ní xáha<sup>n</sup>-gǎ nchaa nàcuáa quide-a<sup>n</sup>, te xiǎ<sup>n</sup> ío vǎi-yu ní sándáá iní-yu Jèsús. <sup>40</sup> Te ní quexió-yu núú ndécú-gǎ, te ní cáhá<sup>n</sup> ndàhú-yu núú-gǎ sá quéndõo-gǎ ñuú-yu, núu xiǎ<sup>n</sup> ní xíndecu-gǎ ndíhí-yu úú nduu. <sup>41</sup> Te ío cuéhé-gǎ-yu ní sándáá iní-yu tnúhu ní cáhá<sup>n</sup> mée-gǎ. <sup>42</sup> Te ní xáhǎ<sup>n</sup>-yu xii ñadìhí-á<sup>n</sup>:

—Vitna te ñá díú mèe-ni tnúhu ní cáhá<sup>n</sup>-n ní sándáá iní-ndí-gǎ, chi ní cáhá<sup>n</sup> mée-gǎ ní xíndedóho-ndí vitna núu ní sándáá ndisa iní-ndí sá díú-gǎ cúú-gǎ Crìstú Yaá ní tendaha Yǎ Ndiõxí véxi ñuyíú-a dàcácu nihnu-gǎ ñáyiu núú ùhú núú ndàhú —càchí-yu xǎhǎ<sup>n</sup>-yu xii-a<sup>n</sup>.

*Jèsús quidé tǎtna-gǎ déhe ì<sup>n</sup> téé ndèé chíú<sup>n</sup> nǔú gobièrnú*

<sup>43</sup> Te nduu úní ní nucúhu<sup>n</sup> Jèsús ichi cuáhá<sup>n</sup>-gǎ distrítú Galileá. <sup>44</sup> Te cuáhá<sup>n</sup>-gǎ yàcá<sup>n</sup>, chi mee-gǎ ní cachí-gǎ sá nǔu ì<sup>n</sup> téé na càhá<sup>n</sup>-dé tnúhu Yá Ndiõxí ñuú núú ñí cacu-dé, te ñá túú nèhé-yu

sá yíñùhu núú-dě. <sup>45</sup> Te òré ní sáá-gá distritú Galileá, te ío váha ní cuu iní ñáhă-yu xii-gá, chi cuendá tnàhá-yu ní xíndecu ndihî-gá vico pàscuá ñuú Jerusálén. Te yàcá<sup>n</sup> ní xinî-yu nchaa sá nî quide-gá.

<sup>46</sup> Te ní sáhá<sup>n</sup> tucu-gá ñuú Cànaá ì<sup>n</sup> ñuú yíndèhu distritú Galileá, núú nî nadatù-gá ndute ní nduu-xi vînú. Te ñuú Capèrnaúm ndécú ì<sup>n</sup> téé ndèé chíú<sup>n</sup> nŭú tēe cùu gobiernú, te téé-á<sup>n</sup> cùhú ì<sup>n</sup> déhe-dé. <sup>47</sup> Te ní níhî-dě tnúhu sá nî ndee Jèsús distritú Jùdeá ní ndexìo-gá distritú Galileá, núú ní sáhá<sup>n</sup>-dé núú ndécú-gá, te ní cáhá<sup>n</sup> ndàhú-dé núú-gă sá quìhî<sup>n</sup>-gá cada tátna-gá déhe-dé, chi sa ndècu-na-dé sá cùú-dé. <sup>48</sup> Te ní xáha<sup>n</sup> Jèsús xii-dé:

—Nchòhó, chi vá quíndáá iní ñáhá-ndó xii-í te núu vá cádà-í ì<sup>n</sup> sá vă yõo tnàhî ndàcu cada quinî-ndó —càchî-gá xáha<sup>n</sup>-gă xii-dé.

<sup>49</sup> Te ní xáha<sup>n</sup> tucu téé cùhú déhe-xi-á<sup>n</sup> xii-gá:

—Tátá, cundee ìní-n ná quìhî<sup>n</sup>-ni-o càda tátna-n déhe-í ná cuu-dé, chi càhú víhî tnàhá-dé —càchî-dé xáha<sup>n</sup>-dě xii-gá.

<sup>50</sup> Te ní xáha<sup>n</sup> Jèsús:

—Cuanùhú te quinî-n nă ní ndúha déhe-n —càchî-gá xáha<sup>n</sup>-gă xii-dé.

Te ní sándáá iní-dé tnúhu ní cáhá<sup>n</sup> Jèsús, te cuánuhú-dé. <sup>51</sup> Te ñùhu-dé ichi cuánuhú-dé ní sánú tnàhá ñáhá cuè téé xînu cuechi núú-dě. Te ní xáha<sup>n</sup>-güedě sá sà ta ndúha déhe-dé cuáhá<sup>n</sup>.

<sup>52</sup> Te ní xícá<sup>n</sup> tnúhú-dě núú-güedě ná òré cúú-xí nî ngüíta-xi ta quètaú cuéhé-dě. Te ní xáha<sup>n</sup>-güedě:

—Icu dàtná òré caá ì<sup>n</sup> sacuaa ní nchíco-dé cahni —càchî-güedě xáha<sup>n</sup>-güedě xii-dé.

<sup>53</sup> Te tătă tēe cùhú-á<sup>n</sup> nǐ ndacu iní-dé sá díú òré ní quétaú cuéhé-dě ní cáhá<sup>n</sup> ndihi-dé Jèsús ní xáha<sup>n</sup>-gǎ sá ndũha déhe-dé. Te xǎ<sup>n</sup> nũu ndi nchàa tée-á<sup>n</sup> vehe-dé ní sándáá iní-yu Jèsús.

<sup>54</sup> Te sá nǐ quide-gá-á<sup>n</sup> cúú ùú xito quide-gá sá vǎ yõo tnàhí ndàcu cada. Te sá nǐ quide-gá xito cùu uú-á<sup>n</sup> cúú-xí sǎ nǐ quide-gá cútnàhá ní ndee-gá distritú Jùdeá cuánuhú-gá distritú Galileá.

## 5

*Jèsús quidé tǎtna-gá ì<sup>n</sup> tée cùhú ì<sup>n</sup> xichi núú nání Bètesdá*

<sup>1</sup> Te sátá dúcá<sup>n</sup> nǐ cuu, te ní tnahá nduu nǐ quide ñáyiu israél ì<sup>n</sup> vico. Te ní sáhá<sup>n</sup> Jèsús ñuú Jerusalén. <sup>2</sup> Te nǐ càa xico yuhu ñuú-á<sup>n</sup> ñúhú dòco, te titní yèhe-xi ndecu. Te ì<sup>n</sup> yèhe-xi-á<sup>n</sup> nání Yùyehe Mbéé, te yatni xía<sup>n</sup> cáá ì<sup>n</sup> tanquí ndute dàna-ní-yu Bètesdá tnúhu mée-yu tnúhu hèbreú, te yuhu tànquí-á<sup>n</sup> cáá ùhú<sup>n</sup> corrèdór. <sup>3</sup> Te xití corrèdór-á<sup>n</sup> xĩndecu cuéhé ñáyiu cùhú, ñáyiu cuáá, ñáyiu yacua, ñáyiu ñá cúú-gǎ candá nihnu, ndètú-yu candá ndute-á<sup>n</sup>. <sup>4</sup> Chi nihí-yu tnúhu sá ǎma nihnu cùu<sup>n</sup> ì<sup>n</sup> espíritú xínú cuèchi núú Yǎ Ndiõxí, te dàcandá-xi ndute ñùhu tanquí-á<sup>n</sup>. Te ñáyiu díhna nuu nà quée xití ndute-á<sup>n</sup>, te òré-ni ndúha-yu. <sup>5</sup> Te yàcá<sup>n</sup> ñútnàhá ì<sup>n</sup> tée ní cuu ócò sáhú<sup>n</sup> úní cuíá sǎ cùhú-dé. <sup>6</sup> Te ní xiní Jèsús cáá-dě, te ní cutnùnǐ iní-gá sá nǐ cuu cuéhé cuíá cùhú-dé, te ní xáha<sup>n</sup>-gǎ:

—¿Cuíní-n ndũha-n-ǎ<sup>n</sup>? —càchí-gá xáha<sup>n</sup>-gǎ xii-dé.

<sup>7</sup> Te ní xáha<sup>n</sup> tēe cùhú-á<sup>n</sup>:

—Tăta, vá yǎo ñihí-í dàquée ñaha xì-í xití tànquí-a òré càndá ndute, chi òré cuìní-í quée-í, te ingá-ni tucú-yu quènduú-yu núu-í cuángueé-yu —càchí-dé xǎha<sup>n</sup>-dě xii-gá.

<sup>8</sup> Te ní xáha<sup>n</sup> Jèsús:

—Ndacuíñí, te ndaca-ni-n yùu-n, te caca-n —càchí-gá xáha<sup>n</sup>-gǎ xii-dé.

<sup>9</sup> Te òré-ni-án ñí ndúha téé cùhú-án, te ní ndaca-ni-dé yuu-dé, te ní xica-dé cuáhá<sup>n</sup>-dé. Te nduu-ǎn cúu-xí ndùu ndetatú ñáyiu, <sup>10</sup> núu ní xáha<sup>n</sup> cuè téé isràél xii téé ní cuhu-án:

—Vitna cùu-xi nduu ndetatú-ó núu vá cúu cuìdo-n yuu-n —càchí-güedé xáha<sup>n</sup>-güedé xii-dé.

<sup>11</sup> Te ní xáha<sup>n</sup>-dě:

—Mee tǎe ní quide tátna ñaha xì-í ní cachí-dé sá ndácàni-í yuu-í, te caca-í —càchí-dé xáha<sup>n</sup>-dě xii-güedé.

<sup>12</sup> Te ní xáha<sup>n</sup>-güedé:

—¿Te ná cúu tǎe duca<sup>n</sup> ñí cachí sá ndácàni-n yuu-n te caca-n-i? —càchí-güedé xáha<sup>n</sup>-güedé xii-dé.

<sup>13</sup> Dico téé ní cuhú-án ñà túu ní cùtnuní iní-dé ná cúu tǎe ní quide tátna ñaha xì-dé, chi Jèsús òré-ni ní xica-gá cuáhá<sup>n</sup>-gá tnuú nchaa ñáyiu chitu xǐndecu xía<sup>n</sup>. <sup>14</sup> Te sátá dúcá<sup>n</sup> te ní naníhí tnáhá Jèsús ndihí téé ní quide tátna-gá-án xití veñúhu càhnu sá ño cùnuu, te ní xáha<sup>n</sup>-gǎ xii-dé:

—Ní xiní-n ñǎ ní ndúha-n-va. Te vitna vá cáda-gǎ-n nǎndí sá cuèhé sá dúhá, chi núu na càda-ni-n ña, te quixi ingá cuéhé, te vihi-gá ndoho-n —càchí-gá xáha<sup>n</sup>-gǎ xii-dé.

<sup>15</sup> Duca<sup>n</sup> te ní xica téé ní cuhú-án cuǎngúñaha-dě xii cue téé isràél sá Jèsús ní quide tátna ñaha-gǎ

xii-dé. <sup>16</sup> Núu sátá nǐ níhí cue téé isràél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedé xii-gá cuèndá sá dúcá<sup>n</sup> nǐ quide tátna-gá nduu ndètátú-güedé. <sup>17</sup> Te ní xáha<sup>n</sup> Jèsús xii-güedé:

—Tàtá-í Dútú Ndiõxí quidé chi<sup>u</sup>n-ni-gá nǔu xiǎ<sup>n</sup> quidé chi<sup>u</sup>n-í tnàhá-í —càchí-gá xáha<sup>n</sup>-gǎ xii-güedé.

<sup>18</sup> Te ní cudéé<sup>n</sup>-güedé sá ñǎ ní cǎnehe íi-gǎ nduu ndètátú-güedé, te ní cuiní-güedé cahni ñaha-güedé, te uu<sup>n</sup>-gá ní cuiní-güedé cahni ñaha-güedé xii-gá sá nǐ cachí-gá sá Tàtá-gǎ cúú Dútú Ndiõxí, chi ní sani iní-güedé sá cuiní-gá nútnahá-gá Yǎ Ndiõxí nǔu xiǎ<sup>n</sup> ío ní cudéé<sup>n</sup>-güedé.

*Jèsús Déhe Yá Ndiõxí táxí tnùní-gá*

<sup>19</sup> Te ní xáha<sup>n</sup> tùcu Jèsús xii-güedé:

—Na càchí tnúhu ndáá-í xii-ndo sǎ yǔhú chi ni ì<sup>n</sup> sá ñǎ ndácù-í cada mee-í nǔu ñǎ túú mèe Tàtá-í dánèhé ñáhá-gǎ xii-í nàcuáa cada-í, chi nchaa sá quidé Tàtá-í quidè-í tnàhá-í. <sup>20</sup> Te Tàtá-í ío cùu iní ñáhá-gǎ xii-í nǔu dǎnehé ñáhá-gǎ nchaa nàcuáa quide-gá. Te vitna ndècu vai-gǎ chi<sup>u</sup>n tahu-gá cada-í, chi<sup>u</sup>n sá vǎtá quìní-gá-ndó càda-í nàcuáa cuñúhu vìhi-ndo. <sup>21</sup> Chi Tàtá-í dandòto-gá ñáyiu ní xíhí. Te yúhú cada-í te nduu táhú nchaa ñáyiu càchí iní-í cundecu ndihí ñàhá-yu xii-í ni caa ni quíhí<sup>n</sup>.

<sup>22</sup> Te na sàá nduu te ñǎ díú Tàtá-í cada ndáá-gá cuéchi ñáyiu, chi ní cachí-gá sá yǔhú cada ndáá-í

<sup>23</sup> cuèndá nchaa ñáyiu canehé-yu sá yíñùhu núu-í dàtná nèhè-yu sá yíñùhu núú Tàtá-í Yaá ní tendaha ñaha xii-í véxi-í ñuyíú-a. Te nchaa ñáyiu ñǎ túú nèhe sá yíñùhu núú yǔhú, te ni núú Tàtá-í ñǎ túú nèhé-yu sá yíñùhu.



24 'Te na càchí tnúhu ndáá-í xii-ndo sã nchàa ñáyiu na cùndedóho tnúhu na càhá<sup>n</sup>-í, te núu na quìndáá iní-yu Dútú Ndiöxí Yaá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhũ-yu cundecú-yu ndihí-gá ni caa ni quíhí<sup>n</sup>. 25 Te vitna na càchí tnúhu ndáá-í xii-ndo sã nchàa ñáyiu ndècu ichi cuehé ichi duha cùú-yu dàtná ì<sup>n</sup> ñáyiu ní xihí, te vitna ní sáá nduu cùndedóho-yu tnúhu càhá<sup>n</sup> yúhú Déhe Dútú Ndiöxí, te nchaa ñáyiu na quìndáá iní-xi, te naníhí tàhú-yu. 26 Te dàtná quidé mèe Tàtá-í dácácu nihnu-gá ñáyiu, duca<sup>n</sup> ní cachí-gá cada-í dácácu nihnu-í-yu. 27 Te ní cachí tucu-gá sá sàá ì<sup>n</sup> nduu, te cada ndáá-í cuéchi nchaa ñáyiu ñá túú quide ndáá, chi yúhú táxí tnùn-í, te cùu-í ñaní tnáhá-ndó nchàa-ndo. 28 Te ní vã cúñũhu-ndo tnúhu càhá<sup>n</sup>-í, chi sáá nduu te nchaa ñáyiu ní xihí tecú dóho-yu tnúhu càhá<sup>n</sup>-í. 29 Te ndoto nchaa ñáyiu ní quide váha cundecu ndihí-í-yu ni caa ni quíhí<sup>n</sup>, te ndoto tnàhá nchaa ñáyiu ní quide cuèhé ní quide duha, te ñáyiu-á<sup>n</sup> quíhí<sup>n</sup>-yu núú ùhú núú ndàhú.

### *Yá Ndiöxí chindèe tnúhu-gá Jèsús*

30 'Te yúhú, chi ni ì<sup>n</sup> sá ñã ndácù-í cada mee-í nũu ñá díú mèe Yá Ndiöxí táuchìu<sup>n</sup>-gá nàcuáa cada-í. Te quide ndáá-í cuéchi ñáyiu nàcuáa tàxi tnuní-gá cada-í, te yúhú ñá túú quide-í sá cúú ìní mèe-í chi Tàtá-í ní táuchíú<sup>n</sup>-gã nàcuáa cada-í. 31 Te núu na càhá<sup>n</sup>-í sá mèe-í táxí tnùn-í, te vá quìndáá iní-ndó. 32 Chi Yá Ndiöxí chindèe tnúhu ñaha-gã xii-í, te yúhú xini-í sá tnũhu càhá<sup>n</sup>-gá cuèndá-í cúú-xí ì<sup>n</sup> sá ndáá. 33 Te nchòhó ní téchíú<sup>n</sup>-ndó cuè téé ní

sáhá<sup>n</sup> ní ndúcu tñhu-güedé núú tẽ Juàá nũu ná tñuhu cáhá<sup>n</sup>-dé cuendá-í, te tée-ã<sup>n</sup> ní cáhá<sup>n</sup> ndáá-dé nàcuáa ndũu cuendá-í. <sup>34</sup> Dico yúhú, chi ñá túú xìni ñuhu-í ì<sup>n</sup> ñáyiu ñuyíú-a chindee tñhu ñàhá-yu xii-í, dico té Juàá ní cáhá<sup>n</sup> váha-dé cuendá-í, te xĩã<sup>n</sup> càchí tñuhu tucu-í cuendá quíndáá iní-ndó, te naníhí tàhú-ndó. <sup>35</sup> Te dàtná cuení-ndó cùu ì<sup>n</sup> itì ndẽñuhú te dáyehé-xi, duca<sup>n</sup> sãtnahá-xi ní cuu té Juàá, chi sacú-ni nduu ío ní cudíí iní-ndó tñhu ní cáhá<sup>n</sup>-dé. <sup>36</sup> Te váha-ni ní cáhá<sup>n</sup> té Juàá, dico yúhú chi ndècu nchaa sá tá quide-í véxi nàcuáa ní táuchíú<sup>n</sup> Yã Ndiõxí cada-í, te nchaa xĩã<sup>n</sup> cúu-xí ì<sup>n</sup> sá cútnùní iní-ndó sã méé Yã Ndiõxí ní tendaha ñàha-gá xii-í véxi-í ñuyíú-a. <sup>37</sup> Te ñu-ni-gá chíndèe tñhu ñàha-gã xii-í, dìcò-ni sá méé-ndó ñà túú cuení-ndó càda cuendá-ndó tñhu càhá<sup>n</sup>-gá, te ni ñà túú xìní-ndó nàcuáa càa-gá. <sup>38</sup> Te ñá túú quẽe iní nchòhó tñhu càhá<sup>n</sup>-gá, chi ñá túú sàndáá iní ñàhá-ndó xì yúhú Déhe-gá. <sup>39</sup> Te dàcuaha vihi-ndo tutú ndèe tñhu-gá, chi sàni iní-ndó sã xĩã<sup>n</sup>-ni dacuàha-ndo te naníhí tàhú-ndó. Te váha-ni quide-ndo, chi ñu tutú-á<sup>n</sup> càhá<sup>n</sup>-xi cuendá-í. <sup>40</sup> Te nchòhó ñá túú cuení-ndó quíndáá iní ñàhá-ndó xì-í cuendá naníhí tàhú-ndó.

<sup>41</sup> Te yúhú, ñá túú xìni ñuhu-í sá cáda càhnu ñàha-ndo xii-í. <sup>42</sup> Dico sa xìní-í nàcuáa sàni iní-ndó chí ñá túú cùu iní-ndó Yã Ndiõxí. <sup>43</sup> Te yúhú véxi-í ñuyíú-a chi Tãtà-í ní tendaha ñàha-gá, te nchòhó ñá túú cuení-ndó tñi-ndo tñhu càhá<sup>n</sup>-í, dico núu quixi ì<sup>n</sup> tée cáhá<sup>n</sup> cuendá méé-xí, chí quíndáá iní-ndó. <sup>44</sup> Te ná váha nchòhó ná tñi-ndó tñhu càhá<sup>n</sup>-í, te xio xio-ni quide cahnu tnaha-ndo, te ñá túú quide cuendá-ndó sã tñhu váha càhá<sup>n</sup>

Yă Ndiöxí cuu xii-ndo. <sup>45</sup> Te vá cání ìní-ndó sǎ yǔhú ndàcá<sup>n</sup> cuéchi-í núú Tǎtà-í nàcuáa quìde-ndo, chi ndíi Moisés ní chídó tnùní ndíi núú tǔtú Yă Ndiöxí nàcuáa quìde-ndo sá ñà túú quìde váha-ndo, te mee-ndo sàni iní-ndó sǎ nánìhí tǎhú-ndó cuèndá tnúhu ní cáhá<sup>n</sup> ndíi. <sup>46</sup> Chi núu nchòhó sàndáá ndisa iní-ndó tnúhu ní cáhá<sup>n</sup> ndíi Moisés ñá, te duca<sup>n</sup> te quìndáá iní-ndó yǔhú ní cùu, chi ndíi-ǎ<sup>n</sup> ní chídó tnùní ndíi nàcuáa cada-í ñuyíú-a vitna. <sup>47</sup> Te núu ñá túú sàndáá iní-ndó tnúhu ní chídó tnùní ndíi, te ñi-ni duca<sup>n</sup> càda ñaha-ndo xii-í vá quìndáá iní-ndó tnúhu càhá<sup>n</sup>-í —càchí-gá xáha<sup>n</sup>-gǎ xii-güedé.

## 6

*Jèsús dácàxi-gá úhú<sup>n</sup> mǐ ñáyiu*

*(Mt. 14:13-21; Mr. 6:30-44; Lc. 9:10-17)*

<sup>1</sup> Te sátá dúcá<sup>n</sup> ñí cuu, te ní quee Jèsús cuáhá<sup>n</sup>-gá ìngá xio yuhu làgúná Galilèá, àdi Tiberiás chi úú ñi-xi. <sup>2</sup> Te ío cuéhé ñáyiu nchìcú<sup>n</sup> ñáhá xii-gá cuáhá<sup>n</sup> cuèndá sá ñí xiní-yu nchaa sá vǎ yǒo tnàhí ndàcu cada ní quìde-gá, chi ní quìde tátna-gá nchaa ñáyiu cùhú. <sup>3</sup> Te ní sáá Jèsús ndìhì cue téé xica cuu ndìhì-gá ñí núú tìndúú, te xíá<sup>n</sup> ñí ngóo-gá ndìhì-güedé. <sup>4</sup> Te ta cùyatni coo vico pascuá, vico quìde ñáyiu isràél. <sup>5</sup> Te ní xiní-gá sá ño vǎi ñáyiu nchìcú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gǎ xii té Lìpé:

—¿Ndèé quíhì<sup>n</sup>-ó quǐnguaa<sup>n</sup>-o sǎ cáxí nchaa ñáyiu-a? —càchí-gá xáha<sup>n</sup>-gǎ xii-dé.

<sup>6</sup> Te duca<sup>n</sup> ñí xáha<sup>n</sup>-gǎ xii-dé cuèndá sá cuìní-gá quìní-gá nása cunduu tnúhu cáhá<sup>n</sup>-dé, dico mee-gǎ sa xini-gá nàcuáa cada-gá. <sup>7</sup> Te ní xáha<sup>n</sup> tǎ Lìpé xii-gá:

—Te cuëi úú ciëndú díhú<sup>n</sup> denàriú ná dàndoñuhu-o cuaa<sup>n</sup>-o paá, te ni vǎ tnahá caxí-yu luha luha —càchí-dé xǎha<sup>n</sup>-dě xii-gá.

<sup>8</sup> Te té Ndríxí ingá téé xìca cuu ndíhi-gá, ñaní té Xímú, àdi Pelú chi úú diù-dé, ní xáha<sup>n</sup>-dě:

<sup>9</sup> —Iha ndècu ì<sup>n</sup> té líhli nèhe-dé úhú<sup>n</sup> pàá cebàdá te úú chácá, dico nděé tnahá xéhé, te cuéhé víhí ñǎyiu —càchí-dé xǎha<sup>n</sup>-dě xii-gá.

<sup>10</sup> Te ní xáha<sup>n</sup> Jèsús xii-güedé:

—Chí cǔñaha nà ngóo-yu nchaá-yu —càchí-gá xáha<sup>n</sup>-gǎ.

Te ñáyiu-á<sup>n</sup> nǐ ngóo-yu, te càa vihi ité núú nǐ ngóo-yu-á<sup>n</sup>, te xínu dàtná úhú<sup>n</sup> mǐl mee-ni cuè téé, te di<sup>n</sup> ñáyiu dihí ndíhi landú. <sup>11</sup> Te ní quehe<sup>n</sup> Jèsús pàá, te ní ndacá<sup>n</sup> táhú-gǎ núú Yǎ Ndiöxí, te ní sáñaha-gǎ pàá-á<sup>n</sup> xii cue téé xìca cuu ndíhi-gá, te cue téé-á<sup>n</sup> nǐ dácǎhñu-güedé ní xexi nchaa ñáyiu xǐxúcu-á<sup>n</sup>. Te diu-ni duca<sup>n</sup> nǐ quide-gá chácá, te ní dácǎhñu tucu-güedé-di ní xexi ñáyiu ní ndahá xití-yu. <sup>12</sup> Te òré ní túhú cóhǒ-yu, te ní xáha<sup>n</sup> Jèsús xii cue téé xìca cuu ndíhi-gá sá ná nàquehe<sup>n</sup>-güedé nchaa sá nǐ quendóo cuendá sá vǎ quíhí<sup>n</sup>-xi núú míhí.

<sup>13</sup> Te cue téé-ǎ<sup>n</sup> ní naquehe<sup>n</sup>-güedé nchaa sá nǐ quendóo, te ní chítú ùxúú tídihi núú ùhú<sup>n</sup>-ni pàá cebàdá. <sup>14</sup> Te sá nǐ xiní-yu ní nadacàyá-gá sá nǐ xexí-yu, xǐǎ<sup>n</sup> ní ngüíta-yu ní xítnàhá-yu:

—Ndáá sá tée-a sa ió cuëndú sá quíxí-dě ñuyíú-a cáhá<sup>n</sup>-dé tnúhu Yá Ndiöxí —càchí-yu xǐtnàhá-yu.

<sup>15</sup> Te ní cutnùní iní Jèsús sá cádá yìcá-yu can-deca ñàhá-yu xii-gá quíhí<sup>n</sup> cuendá cundecu-gá

quindaha ñaha-gá xii-yu ni cùu, núu xíǎ<sup>n</sup> ní xica tucu-gá cuáhá<sup>n</sup>-gá xití yucu mee òi chícuú-gá.

*Jèsús xicá-gǎ núú ndute*  
(Mt. 14:22-27; Mr. 6:45-52)

<sup>16</sup> Te òré ní cuu ndiqui<sup>n</sup>, te cuáhá<sup>n</sup> cue téé xica cuu ndihi-gá yuhu làgúná. <sup>17</sup> Te ní quée-güedé bàrcú cuáhá<sup>n</sup>-güedé ñúú Capèrnaúm cáá ndàa ingá xio yuhu làgúná, te sa ní cuu ndiqui<sup>n</sup>, te ñá túú Jèsús quexìo quée-gá bàrcú ñúhú-güedě-á<sup>n</sup>. <sup>18</sup> Te ní ngüita-xi quène táchí ñíhi, te níhi dàcandau ndéé tnáhá ndùte làgúná-á<sup>n</sup>. <sup>19</sup> Te sa ní cuu dàtná úhú<sup>n</sup> kilómetrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedě véxi-gá núú nduté, te ní yùhú-güedé. <sup>20</sup> Te ní xáha<sup>n</sup> Jèsús xii-güedé:

—Yúhú véxi-í, vá yùhú-ndó —càchí-gá xáha<sup>n</sup>-gǎ xii-güedé.

<sup>21</sup> Te ío ní cudíí ìní-güedé sá ñí quexìo-gá cuánguee-gá bàrcú, te òré-ni ní quexìo-güedé ndihi-gá ndéé ingá xio yuhu làgúná núú cuáhá<sup>n</sup>-güedé.

*Ñáyiu nànducu ñaha xii Jèsús*

<sup>22</sup> Te ingá nduu-ǎ<sup>n</sup> xíndecu-ni nchaa ñáyiu ní quendóo yuhu làgúná. Te ní quide cuendá-yu sá ñí òi òi ná bàrcú nútñí-á<sup>n</sup> ní cùu ñá túú-gǎ, chi cue téé xica cuu ndihi Jèsús ní quée-güedé bàrcú-á<sup>n</sup> cuáhá<sup>n</sup>-güedé. Te ní níhí-yu tnúhu sá ñà túú ní quée tnáhá Jèsús. <sup>23</sup> Te òi-ni nduu-ǎ<sup>n</sup> ñí quee ñí úú bàrcú ñúú Tiberiás ní sáá-xi yatni núú ñí xexí-yu pàá sá ñí ndacá<sup>n</sup> táhú Jèsús núú Yǎ Ndiǒxí. <sup>24</sup> Te ní xiní-yu sá ñà túú Jèsús ndihi cue téé xica cuu

ndihi-gá, núu ní quée-yu bàrcú-án cuähá<sup>n</sup>-yu ñuú Capèrnaúm cuánúndúcú ñàhá-yu xii-gá.

*Jèsús cúú-gă dàtná #<sup>n</sup> sá nchító-ó*

<sup>25</sup> Te ní sáá-yu ingá xio yuhu làgúná, xía<sup>n</sup> ñí naníhĩ-yu Jèsús, te ní xáhă<sup>n</sup>-yu xii-gá:

—Mèstrú, ¿ná òré ní sáá-n ìha? —cachí-yu xăhă<sup>n</sup>-yu xii-gá.

<sup>26</sup> Te ní xáha<sup>n</sup> Jèsús:

—Na càchí tnúhu ndáá-í sá nchòhó nándücu ñaha-ndo xii-í cuendá-ni sá ñí xexi-ndo ñí ndahá xití-ndó, dico ñá díú cuendá sá ñí quide-í sá vă yõo tnàhí ndàcu cada nanducu ñaha-ndo. <sup>27</sup> Te vă cádá cuendá-ndó să méé-ní să caxí-ndó càda chiu<sup>n</sup>-ndo chi xía<sup>n</sup> vă cúdĩ-xi. Chi ío-gá xíní ñùhu-xi cada cuendá-ndó tnùhu Yá Ndiõxí te tn#-ndo, te naníhí tàhú-ndó. Te tnúhu-á<sup>n</sup> cachí tnúhu yúhú Tée cùu ñaní tnáhá-ndó nchàa-ndo, te xía<sup>n</sup> candeca-xi iní-ndó ñí caa ñí quíhí<sup>n</sup>, chi mee Dütú Ndiõxí ní cachí-gá sá dúcá<sup>n</sup> càda-í —càchí-gá xáha<sup>n</sup>-gă xií-yu.

<sup>28</sup> Te ní xáhă<sup>n</sup>-yu:

—¿Nása cada-ndí cuendá ngúnu ichi-ndí nàcuáa cuení Yă Ndiõxí cunduu-i? —càchí-yu xăhă<sup>n</sup>-yu xii-gá.

<sup>29</sup> Te ní xáha<sup>n</sup> Jèsús xií-yu:

—Yá Ndiõxí cuení-gá sá quíndáá iní ñáhá-ndó xì yúhú, téé ní tendaha-gă véxi ñuyíú-a —càchí-gá xáha<sup>n</sup>-gă xií-yu.

<sup>30</sup> Te ní xáha<sup>n</sup> tùcú-yu xii-gá:

—¿Ná cúú să vă yõo tnàhí ndàcu cada, cada-n cùndehe-ndí cuendá quíndáá iní ñáhá-ndí xii-n-i? ¿Àdi nágá cúú să cádá-n cuendá cutnùní iní-ndí sá ndàá càhá<sup>n</sup>-n-í? <sup>31</sup> Chi cue ñaní tnáhá-ó ñí xíndecu

ndée sanaha nĩ xexí-yu pàá nání mànáá xití yucu dàtná yódó tnùnì nùú tütú Yă Ndiöxí nùú cächí-xi: “Yă Ndiöxí ní sãñaha-gă sá nĩ xexí-yu, te ní cuu<sup>n</sup> túu-xi andïu”, duha cächí-xi nùú tütú-gá —cächí-yu xăhă<sup>n</sup>-yu xii-gá.

<sup>32</sup> Te ní xáha<sup>n</sup> Jèsús:

—Na cächí tnúhu ndáá-í xii-ndo sã ñã díú ndĩ Moisés ní sãñaha ndĩ pàá ní cuu<sup>n</sup> andïu nĩ xexí-yu, chi mee Tătà-í ní sãñaha-gă sá nĩ xexí-yu. Te sá táxí-gă vitna cùu-xi <sup>33</sup> datná pàá véxi cuu<sup>n</sup> andïu cãndeca-xi iní-ndó ñì caa ñì quíhí<sup>n</sup> —cächí-gá xáha<sup>n</sup>-gă xií-yu.

<sup>34</sup> Te ní xáhă<sup>n</sup>-yu xii-gá:

—Tătá, mee-ni pàá-á<sup>n</sup> taxi-n cãxi-ndí —cächí-yu xăhă<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cùu-í dàtná ì<sup>n</sup> sá xéxi-ndó cãndeca-xi iní-ndó. Te duha ndùu tnúhu cãhá<sup>n</sup>-í, chi nchaa ñáyiu na quëndáá iní ñáhá xii-í, te vá ndóhó-gă-yu docó te vá ndóhó-gă-yu ndute. <sup>36</sup> Dìcò-ni sá nchòhó ñã túú sàndáá iní ñáhá-ndó cuë; xìnì ñáhá-ndó xii-í. <sup>37</sup> Te nchaa ñáyiu na cächí Tătà-í nduu cuëndá-í nasaá-yu nùu-í, te ñáyiu-á<sup>n</sup> vă dáquèe tihù-í-yu.

<sup>38</sup> Te ñã díú yúhú sá véxi cuu<sup>n</sup>-í andïu te quide-í nchaa sá cúú ñì mée-í, chi véxi cuu<sup>n</sup>-í sá cáda-í nchaa nãcuáa ní táúchíú<sup>n</sup> mée Tătà-í Dútú Ndiöxí Yaá ní tendaha ñãha xii-í véxi-í ñuyíú-a. <sup>39</sup> Te cuiní-gá sá ncháá ñáyiu ní cachí-gá nduu cuëndá-í vá dáñà-í-yu cuíta nihnú-yu, te na sàá nduu te ñiu-ni-í dandòto-í-yu. <sup>40</sup> Chi duca<sup>n</sup> nĩ cachí Dútú Ndiöxí cunduu sá ncháá ñáyiu na tnì tnúhu cãhá<sup>n</sup>-í, te quëndáá ndisa iní ñáhă-yu xii yúhú Déhe-gá, te

nduu táhũ-yu cundecú-yu ndihi Yá Ndiõxí ni caa ni quíhí<sup>n</sup>, te yúhú dandòto-í-yu na sàá nduu — càchí-gá xáha<sup>n</sup>-gã xií-yu.

<sup>41</sup> Te ñá ní tnàhá iní ñáyiu isràél tnúhu ní cáhá<sup>n</sup> Jèsús nũu ní ngũíta-yu ní cáhá<sup>n</sup> cuèhé-yu cuendá-gá cuendá sá ñí xáha<sup>n</sup>-gã sá méé-gã cúú-gã dàtná sá xéxí-ó vèxi cuu<sup>n</sup> andiu. <sup>42</sup> Te ní xítnàhá-yu:

—¿Náa ñá díú tẽe-a cùu-dé Jèsús déhe té Chèé? Nchoo xìní-ó tãtá-dě, te xìní-ó nãná-dě, ñá cachí-tu tée-a sá andiu vèxi cuu<sup>n</sup>-dé! —càchí-yu xítnàhá-yu.

<sup>43</sup> Te ní xáha<sup>n</sup> Jèsús xií-yu:

—Vá càhá<sup>n</sup> cuèhé-gá-ndó cuendá-í, chí dáñá.

<sup>44</sup> Vá yõ quindáá iní ñáhá xii yúhú nũu ñá túú mèe Tàtá-í táxí cuendá ñáhá-gã xií-yu. Te ñu-gá ní tendaha ñàha-gá xii-í véxi-í, te yúhú dandòto-í-yu na sàá nduu. <sup>45</sup> Te núú tùtú cue tée ní xóo cáhá<sup>n</sup> tnúhu Yá Ndiõxí ndéé sanaha càchí-xi: “Yá Ndiõxí danèhé ñáhá-gã xií-yu tnúhu-gá”, duha càchí-xi. Te nchaa ñáyiu na cùndedóho nchaa tnúhu càhá<sup>n</sup> Dútú Ndiõxí, te cutúha-yu nàcuáa càhá<sup>n</sup>-gá, te ñáyiu-á<sup>n</sup> quindáá iní ñáhã-yu xii yúhú.

<sup>46</sup> Te vá yõ xìní ñáhá xii Dútú Ndiõxí chi ñndii-ni yúhú xìní-í-gá, chí núú ndécú-gã ní quee-í véxi cuu<sup>n</sup>-í —càchí-gá xáha<sup>n</sup>-gã xií-yu.

<sup>47</sup> Te xãha<sup>n</sup> tùcu-gá:

—Na càchí tnúhu ndáá-í xii-ndo sã nchaa ñáyiu na quindáá iní ñáhá xii-í, te naníhí tàhú-yu. <sup>48</sup> Te yúhú cúù-í dàtná ñí sá xéxí-ndó càndeca-xi iní-ndó, te duca<sup>n</sup> sãtnahá-xi cùu-í chi yúhú cada-í te nduu táhú-ndó cùndecu-ndo ndihi Yá Ndiõxí ni caa ni quíhí<sup>n</sup>. <sup>49</sup> Te cue ñaní tnáhá-ó ñí xíndecu ndéé sanaha ñí xexí-yu pàá nání mànáá xítí yucu, dico



ní sáá nduu te dacuítí ní xíhí-yu. <sup>50-51</sup> Te yúhú càhá<sup>n</sup>-í cuendá mée-í, chí véxi cuu<sup>n</sup>-í andiú. Te cùu-í dàtná ì<sup>n</sup> sá nchító-ndó, te nchaa ñáyiú na càxi te candeca-xi iní-yu ni caa ni quíhí<sup>n</sup> te vá cuíta nihnu-gá-yu. Te sá táxi-í xii-ndo xíá<sup>n</sup> cúu-xí yìqui cuñú-í, te cùu-xi cuendá nchaa ñáyiú niñi ñuyíú cuendá nduu táhú-yu cundecú-yu ndihí Yá Ndióxi ni caa ni quíhí<sup>n</sup> —càchí-gá xáha<sup>n</sup>-gá xií-yu.

<sup>52</sup> Te ní ngúíta ñáyiú isràél xítnàhá-yu:

—¿Nása cada-tu téa-a núu càchí-tu-dé sá yìqui cuñú-dé taxi-dé caxi-o-i? —càchí-yu xítnàhá-yu.

<sup>53</sup> Te ní xáha<sup>n</sup> Jèsús:

—Na càchí tnúhu ndáá-í xii-ndo sá núu na càda iní-ndó sá dàtná sá cáxi-ndó yìqui cuñú yúhú Téa cùu ñaní tnàhá-ndó nchàa-ndo, te cada tucu iní-ndó sá dàtná sá cóhó-ndó níñi-í ñá, te xíá<sup>n</sup> quée-xí sá quíndáá iní ñáhá-ndó ni yuhu ni iní-ndó te naníhí tàhú-ndó, te núu ñáhá te cuíta nihnu-ndo.

<sup>54</sup> Nchaa ñáyiú na càda iní-xi sá dàtná sá cáxi-yu yìqui cùñú-í te cohó-yu níñi-í, ñáyiú-á<sup>n</sup> naníhí tàhú-yu te yúhú dandòto-í-yu na sáá nduu. <sup>55</sup> Chí yìqui cùñú-í ndihí níñi-í cúu-xí mèe-í. <sup>56</sup> Te nchaa ñáyiú na càda iní-xi sá dàtná sá cáxi-yu yìqui cùñú-í te cohó-yu níñi-í, te ñáyiú-á<sup>n</sup> ì<sup>n</sup>-ná cuu-í ndihí-yu chí cundecu ndihí-í-yu. <sup>57</sup> Te yúhú nchìto-í chí duca<sup>n</sup> nchìto Tàtá-í Yáá ní tendaha ñàha xii-í véxi-í ñuyíú-a. Te ñu-ni duca<sup>n</sup> nchàa ñáyiú na quíndáá iní ñáhá xii-í te cundecu ndihí-í-yu ni caa ni quíhí<sup>n</sup>.

<sup>58</sup> Te yúhú cúu-í dàtná ì<sup>n</sup> sá nchító-ndó véxi cuu<sup>n</sup> andiú, dico ñá díú pàá sá naní mànáá ní xèxi cue ñaní tnàhá-ó ní xíndecu ndée sanaha, chí ní

xexí-yu pàá te dacuési ní xíhí-yu. Te nchaa ñáyiu na quíndáá iní ñáhá xìi yúhú Yaá véxi cuu<sup>n</sup> andíu, te cundecu ndíhi-í-yu ní caa ní quíhí<sup>n</sup> —càchí-gá xáha<sup>n</sup>-gă xií-yu.

<sup>59</sup> Nchaa tnúhu-a ní cáhá<sup>n</sup>-gá xití veñúhu ñáyiu ñúú Capèrnaúm.

*Jèsús càchí tnúhu-gá nàcuáa naníhí tàhú-ó*

<sup>60</sup> Te sá dúcá<sup>n</sup> nǐ cáhá<sup>n</sup>-gá nǔu vài ñáyiu nchìcú<sup>n</sup> ñáhá xìi-gá ní xítñàhá-yu:

—Vá tñí<sup>í</sup> cuìti-o tnúhu càhá<sup>n</sup>-dé chi ñá díú tñúhu sá cúú vâha iní-ó càhá<sup>n</sup>-dé —càchí-yu xítñàhá-yu.

<sup>61</sup> Te ní cutnùní iní Jèsús sá ñà túú càhá<sup>n</sup> váha-yu cuendá tnúhu ní cáhá<sup>n</sup>-gá, núu ní xáha<sup>n</sup>-gă xií-yu:

—¿Náa ñá tñàhá iní-ndó nàcuáa càhá<sup>n</sup>-í-a? <sup>62</sup> Te uu<sup>n</sup>-gá cada nchòhó nǔu quíní-ndó yúhú Tée cùu ñaní tñáhá-ndó nchàa-ndo ndaa-í núú nǐ xíndecu-í díhna. <sup>63</sup> Te espíritú ndécú ndíhi yiqui cuñú-ó, xǎ<sup>n</sup> ndécá ñàha-xi xii-o, te núu ñá túú xǎ<sup>n</sup>, te yiqui cùñú-ó ñà túú nàndíhi-xi. Dico núu nchaa tnúhu càhá<sup>n</sup>-í-a quée-xi iní-ndó ñá, te quíní-ndó ñá xéhé candeca ñàha-xi xii-ndo núú cuàhá<sup>n</sup> núú vèxi. <sup>64</sup> Te dava nchòhó chi ñá túú sàndáá iní-ndó —càchí-gá xáha<sup>n</sup>-gă xií-yu.

Te duca<sup>n</sup> nǐ xáha<sup>n</sup>-gă chi sa nàha-gá nándi cùu ñáyiu vá quíndáá iní ñáhá xìi-gá. Te duca<sup>n</sup> sà naha-gá ndèdacàa tée cuáha cuendá ñáhá xìi-gá núú cuè tée cùu úhú iní ñáhá. <sup>65</sup> Te ní xáha<sup>n</sup> tùcu Jesús xií-yu:

—Te duha càhá<sup>n</sup>-í chi sa ní cachí tnúhu-í xii-ndo sǎ vǎ yóo ñ<sup>n</sup> cuíní tñí<sup>í</sup> tnúhu-í te núu ñá túú Tàtà-í Dútú Ndiõxí sánú ìchi ñàha-gá xií-yu —càchí-gá xáha<sup>n</sup>-gă xií-yu.

66 Te òré-á<sup>n</sup> ïo vai ñáyiú nchìcú<sup>n</sup> ñáhá xì-gá ní xócõo-yu ñá ní xìca cuu-gá-yu ndìhi-gá. 67 Te xiã<sup>n</sup> ní xáha<sup>n</sup> Jèsús xii ndì ùxúú cue téé xìca cuu ndìhi-gá:

—¿Cuìní-ndó dàndóo ñaha-ndo tnàhá-ndó-ã<sup>n</sup>? —  
càchí-gá xáha<sup>n</sup>-gã xii-güedé.

68 Te ní xáha<sup>n</sup> tẽ Xĩmú, àdi Pelú chi úú dìu-dé:

—Mèstrú, ñá túú-gã ndèé quíhí<sup>n</sup>-ndí, chi nchúhú nánhá-ndí sá tnúhu mee-n cùu-xi sá vãha candeca-xi iní-ndí ñi caa ñi quíhí<sup>n</sup>. 69 Chi nchúhú sa ní sándáá iní ñáhá-ndí xii-n chi nàha-ndí sá yòhó cúú-n Crìstú Déhe Dútú Ndiõxí yaá ndécú àndiú —cachí-dé xãha<sup>n</sup>-dẽ xii-gá.

70 Te ní xáha<sup>n</sup> Jèsús:

—Nàha-ndo sá yũhú ní cáhá<sup>n</sup> ñáhà-í xii ndì ùxúú-ndó xìca cuu ndìhi ñaha-í xii-ndo, dico ñ<sup>n</sup>-ndo quíhu ñaha yùcu ñávãha xii-ndo —càchí-gá xáha<sup>n</sup>-gã xii-güedé.

71 Duha ní cáhá<sup>n</sup> Jèsús cuendá té Jùdás déhe té Xĩmú Iscàrioté ñ<sup>n</sup> téé ñùtnahá núú ùxí ñ<sup>n</sup> cue téé xìca cuu ndìhi-gá, chi sa nàha-gá sá tẽ-ã<sup>n</sup> cuãha cuendá ñáhá-dẽ xii-gá ñ<sup>n</sup> nduu núú cuè téé cùu úhú iní ñáhá.

## 7

*Cue ñaní Jèsús ñá túú sándáá iní-güedé nàcuáa ndiú tnúhu càhá<sup>n</sup>-gá*

<sup>1</sup> Te sátá dúcá<sup>n</sup> ñi cuu, te ní xica cuu Jèsús distritú Galileá, te ñá ní sáhá<sup>n</sup>-gá distritú Jùdeá, chi yacá<sup>n</sup> cuìní cue téé isràél cahni ñaha-güedẽ xii-gá ní cùu. <sup>2</sup> Te ní cuyatni nduu càdá-yu vico, vico sá dánàní-yu Vico Vehe Tnuvixi<sup>n</sup>. <sup>3</sup> Te ní xáha<sup>n</sup> cuè ñaní Jèsús xii-gá:

—Váha-gá quíhí<sup>n</sup>-n distritú Jùdeá te vá cùndècu-n iha, chi yàcá<sup>n</sup> cada-n nchàa sá quidé-n iha cuendá quíní nchaa ñáyiú cùndíhi ñaha xii-n ndecu yacá<sup>n</sup>.  
 4 Chi núu cuíní-ó quíní nchaa ñáyiú ná chiu<sup>n</sup> cada-o te vá cáda dáyuhu-o. Te yòhó cuéhé núú sã quidé-n, te cada-n na quíní nchaa ñáyiú —càchí-güedé xãha<sup>n</sup>-güedë xii-gá.

5 Duca<sup>n</sup> ñí cáhá<sup>n</sup> cue ñaní-gá, chi ni mèe-güedé ñá túú sàndáá iní-güedé nàcuáa ndùu tnúhu càhá<sup>n</sup>-gá.

6 Te ní xáha<sup>n</sup> Jèsús xii-güedé:

—Vátá tnàhá-gá òré quíhí<sup>n</sup>-í dico nchòhó ndëdani càa oré cuu quíhí<sup>n</sup>-ndó. 7 Chi nchaa ñáyiú ñùhu ichi cuehé ichi ñaha chi ñá túú cùu úhú iní ñáhã-yu xii nchòhó. Dico yúhú chi cùu úhú iní ñáhã-yu xii-í cuendá sá càhá<sup>n</sup>-í sá quidé-yu nchaa sá cuéhé sá dúhá. 8 Te chí cuáhá<sup>n</sup> nchòhó vico chi yúhú vá quíhí<sup>n</sup>-ni-í chi vátá tnàhá-gá òré quíhí<sup>n</sup>-í —càchí-gá xáha<sup>n</sup>-gã xii-güedé.

9 Te duca<sup>n</sup> ñí xáha<sup>n</sup>-gã te ní ndóo-gá Galileá, te cue tée-á<sup>n</sup> cuáhá<sup>n</sup>-güedé.

### *Jèsús ndécú-gã #<sup>n</sup> vico chiñuhú-yu Yá Ndiõxí*

10 Dico sátá cuáhá<sup>n</sup> cue ñaní-gá, te ní xica-gá cuáhá<sup>n</sup>-gá tnàhá-gá dícó-ni sá dáyuhu cuáhá<sup>n</sup>-gá.

11 Te ñáyiú isràél ñáyiú xĩndecu vico nànducú-yu Jèsús, te xĩtnàhá-yu:

—¿Ndéé ndécú Jèsús? —càchí-yu xĩtnàhá-yu.

12 Te nchaa ñáyiú xĩndecu vico xĩndatnúhu-yu cuendá-gá. Te davá-yu xĩtnàhá-yu sá ño váha iní-gá, te davá-yu xĩtnàhá-yu sá ñà díú tõe váha cùu-gá, chi dándahú-gá ñáyiú.

13 Dico mee-ni xǐcáhá<sup>n</sup> náhǐ-yu, chi xǐyùhú-yu cue tée cùnuu núǎ-yu.

14 Te ta ngǔhu<sup>n</sup> dava vico, te cuánguihu Jèsús veñúhu cǎhnu sǎ ïo cùnuu, te ní ngüíta-gá dǎcuàha-gá ñáyiu. 15 Te ñáyiu isràél ní cuñúhu vǐhí-yu sǎ ïo váha cǎhá<sup>n</sup>-gá, te ní xítñàhá-yu:

—¿Ná cuendá ío váha ñùhu-tu díquí tǎe-a tnúhu cǎhá<sup>n</sup>-dé te ñǎ túú ní dǎcuaha-dé-í? —cǎchí-yu xǐtnàhá-yu.

16 Te ní xáha<sup>n</sup> Jèsús:

—Ñǎ díú cuendá mée-í cúú-xí sǎ dánèhé ñàhà-í xii-ndo, chi cuendá Dútú Ndiǒxí Yaá ní tendaha ñàha xii-í véxi-í cúú-xí. 17 Te núu ìo dava-ndo ñi yuhu ñi iní-ndó cuìní-ndó cǎda-ndo nacuáa cuìní Yǎ Ndiǒxí cunduu, te cutnùní ndáá iní-ndó sǎ tnùhu dǎcuaha ñaha-í xii-ndo cùu-xi cuendá mée Dútú Ndiǒxí, te ñǎ díú cuendá mée-í cúú-xí. 18 Te tée cuìní sǎ cǎdá cǎhnu ñaha ñáyiu xii-dé, tée-á<sup>n</sup> cǎhá<sup>n</sup>-dé nǎcuáa véxi iní mée-dě. Dico yúhú cuìní-í sǎ cǎdá cǎhnú-yu Dútú Ndiǒxí Yaá ní tendaha ñàha xii-í véxi-í ñuyú-a, te cǎhá<sup>n</sup> ndáá-í te ñǎ túú dǎcuandehnde-í.

19 Te ndíi Moisés ní taxi ndíi tnúhu sǎ sánú ìchi ñaha xii-ndo nacuáa cundecu-ndo, te ñi dùca<sup>n</sup> ñǎ túú sàndáá iní-ndó nǎcuáa cǎhá<sup>n</sup> tnúhu-á<sup>n</sup>. ¿Te ná cuendá cuìní-ndó cǎhni ñaha-ndo xii-í? —cǎchí-gá xáha<sup>n</sup>-gǎ xií-yu.

20 Te ní xáhǎ<sup>n</sup>-yu xii-gá:

—Yucu ñǎvǎha dǎcoto ñaha xii-ó, chi vá yǒo ñ<sup>n</sup> cuìní cǎhni ñaha xii-n —cachí-yu xáhǎ<sup>n</sup>-yu xii-gá.

21 Te ní xáha<sup>n</sup> Jèsús xií-yu:

—Sǎ ñǐ quide-í ñ<sup>n</sup> sǎ vǎ yǒo tnàhí ndàcu cada nduu cuu-xi nduu ndetatú-ó, xǐǎ<sup>n</sup> ío ní cuñúhu

ñaha-ndo xii-í. <sup>22</sup> Te ndíi Moisés ní cachí ndíi sá cuãha-yu señá ñii cue landú tée, dico ñá díú mèe ndíi ní càhu iní ndíi chi duca<sup>n</sup> tnàhí ní xóo cada cue ñaní tnáhá-ó dàvá-á<sup>n</sup>, núu xiã<sup>n</sup> nchòhó sãha-ndo señá ñii landú tée cuëi cùu-xi nduu ndetatú-ó. <sup>23</sup> Te duca<sup>n</sup> quide-ndo cuendá sá ñà túú nã cumání-ndó nũú tnũhu sá sánú ìchi ñaha xii-ndo ní dándõo ndíi Moisés. ¿Te ná cuendá cúdeé<sup>n</sup>-ndó nũù-í sá nĩ quide tátna-í tée cùhú nduu ndetatú-ó-í? <sup>24</sup> Te váha váha cada cuendá-ndó, te vá cuendá-ni cáhá<sup>n</sup>-ndó sã yúhú ndècuéchi-í chi ñá túú xìní-ndó —càchí-gá xáha<sup>n</sup>-gã xii-yu.

*Jèsús xáha<sup>n</sup>-gã xii-yu núú vëxi-gá*

<sup>25</sup> Te dava ñáiyu ñuú Jerusàlén ní ngüita-yu xitnàhá-yu:

—¿Náa ñá díú tõe-á<sup>n</sup> nándùcu-güedé cahni-güedé?, <sup>26</sup> núu náí-dé nútñii núú chítú nũú tàcá-ã<sup>n</sup> càhá<sup>n</sup>-dé, te vá yõo cùyii cúñaha xii-dé ìi<sup>n</sup> tnúhu. Cudana te cue tée cùchiu<sup>n</sup> sandáá iní-güedé sá díú-dě cúú-dě Crìstú Yaá ní tendaha Yã Ndiõxí véxi ñuyíú-a. <sup>27</sup> Dico nchoo xìní-ó ndèé ìchi véxi tée-ã<sup>n</sup>, dico Crìstú ná quixi-gá chi vá yõo ìi<sup>n</sup> quini ndèé ìchi quixi Yaá-á<sup>n</sup> —càchí-yu xitnàhá-yu.

<sup>28</sup> Te yìhi Jesús xití veñúhu càhnu sá ìo cùnuu danehe-gá ñáiyu, te ní tecú dóho-gá tnúhu càhá<sup>n</sup>-yu. Te níhi ní cáhá<sup>n</sup>-gá, te xáha<sup>n</sup>-gã xii-yu:

—¡Ná quini-tu nchòhó ndèé ìchi véxi yúhú! Yúhú véxi-í dico ñá díú sã cúú iní mèe-í, chi Yá Ndiõxí Yaá quidé nchàa-ndi túhú sá váha ní tendaha ñàha-gá xii-í véxi-í, te nchòhó ñá túú xìní-ndó-gã. <sup>29</sup> Te yúhú xìní-í-gá chi núú ndécú-gã ní quee-í véxi-í,

te diu mee-gă ní tendaha ñaha-gá véxi-í —càchí-gá xáha<sup>n</sup>-gă xii-yu.

<sup>30</sup> Te sá dúcá<sup>n</sup> ñí cáhá<sup>n</sup>-gá, núu cuìní-güedé tñii ñaha-güedě xii-gá quíhí<sup>n</sup>-gá vecaá ní cùu, dico vá yõo ñí<sup>n</sup> ní cùyii tñii ñaha xii-gá chi vátá sàá-gá òré tñii ñaha-güedě. <sup>31</sup> Dico vâi-yu ní sándáá iní ñáhă-yu xii-gá, te ní xítñàhá-yu:

—¿Nágá cúú sã cádá Crístú ná quìxi-gá-i?, te téé-a ío cuéhé núú sã tá quède-dé véxi. Váa diu téé-a cùu-dé Crístú Yaá ní tendaha Yá Ndiõxí véxi ñuyíú-a —càchí-yu xítñàhá-yu.

*Cue téé cùu fariséú cuìní-güedé quíhí<sup>n</sup> Jèsús vecaá*

<sup>32</sup> Te ní níhí cue téé cùu fariséú tñúhu nàcuáa càhá<sup>n</sup> ñáyiú cuendá Jèsús, núu ní ndatnúhu-güedé ndihí cue dútú cúnùu, te ní techiù<sup>n</sup>-güedé cue téé quède cuendá veñúhu cuáhá<sup>n</sup>-güedé cuátñii ñaha-güedě xii-gá ní cùu. <sup>33</sup> Te ní xáha<sup>n</sup>-gă xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tătà-í Yaá ní tendaha ñaha xii-í véxi-í ñuyíú-a. <sup>34</sup> Te cuëi na nànducu ñaha-ndo dico vá ná ñihí ñáhá-ndó chi vá sàá-ndó núú cúndècu-í —càchí-gá xáha<sup>n</sup>-gă xii-güedé.

<sup>35</sup> Te ní ngüíta ñáyiú isràél xítñàhá-yu:

—¿Ndéé quíhí<sup>n</sup>-tu téé-a te vá ná ñihí-ó-dě-i? ¿Àdi quíhí<sup>n</sup>-dé na chítñahá-dé ñáyiú isràél ñáyiú nchíténuu nchaa ñuú xícá cuendá danèhé-dé ñáyiú grìégú? <sup>36</sup> ¿Nása càhá<sup>n</sup>-tu-dé duha càhá<sup>n</sup>-dé: “Nanducu ñaha-ndo te vá nánihí ñáhá-ndó chi vá sàá-ndó núú cúndècu-í”, càchí-tu-dé? —càchí-yu xítñàhá-yu.

*Nàcuáa cada Espíritú Yă Ndiõxí iní-ó*

37 Te nduu nĩ yáha-ná vico cùu-xi nduu cahnu vihi, te nduu-ã<sup>n</sup> nĩ ngúnu tníi Jèsús tnuú ñáyiu, te níhi ní cáhá<sup>n</sup>-gá, te xáha<sup>n</sup>-gã xií-yu:

—Núu ió dava-ndo yìchí-ndó ndùte, te quixi-ndo nũù-í, te coho-ndo. 38 Duha càhá<sup>n</sup>-í chi nchaa ñáyiu na quìndáá iní ñáhá xì-í, te cada-xi iní-yu dàtná ì<sup>n</sup> núú xíca ndùte, nchaa-ni nduu xica ñá túú yìchí, duca<sup>n</sup> càda-xi iní-yu núú cuàhá<sup>n</sup> núú vèxi dàtná càhá<sup>n</sup>-xi núú tütú Yă Ndiöxí —càchí-gá xáha<sup>n</sup>-gã xií-yu.

39 Te duca<sup>n</sup> nĩ cáhá<sup>n</sup>-gá cuèndá sá quíxí Espíritú Yă Ndiöxí ngúndecu ndíhi nchaa ñáyiu na quìndáá iní ñáhá xì-gá, chi sáá nduu ndàa-gá andiu càda cahnu ñaha Tátá-gã xii-gá, te dàvá-á<sup>n</sup> te quixi Espíritú Yă Ndiöxí cundecu ndíhí-yu.

*Ñá ní cùu ì<sup>n</sup>nuú-yu cuèndá tnúhu ní cáhá<sup>n</sup> Jèsús*

40 Te dava ñáyiu ní xíndedóho tnúhu ní cáhá<sup>n</sup> Jèsús ní xítnàhá-yu:

—Ndáá sá tēe-a cùu-dé tēe càchí-yu quixi cáhá<sup>n</sup> tnúhu Yă Ndiöxí —càchí-yu xítnàhá-yu.

41 Te dava tucú-yu xítnàhá-yu:

—Tēe-a cùu-dé Crìstú Yaá ní tendaha Yă Ndiöxí véxi ñuyíú-a —càchí-yu xítnàhá-yu.

Te dava-gá tucú-yu xítnàhá-yu:

—¿Náa ndàa distritú Galileá quixi Crìstú Yaá tendaha Yă Ndiöxí quixi ñuyíú-a? 42 Chi núú tütú Yă Ndiöxí càchí-xi sá Crìstú Yaá tendaha Yă Ndiöxí quixi ñuyíú-a cuu-gá ì<sup>n</sup> ñaní tnáhá ndíi Dàvíí, te quee-gá ñuú Belén ñuú méé ndíi Dàvíí, duha càhá<sup>n</sup>-xi núú tütú Yă Ndiöxí —càchí-yu xítnàhá-yu.



43 Te xíǎ<sup>n</sup> nũu ñá ní cùu ì<sup>n</sup>nuú-yu cuèndá Jèsús.  
 44 Te davá-yu cuení-yu tñí-yu Jèsús quíhí<sup>n</sup>-gá vecaá ní cùu, dico ní ì<sup>n</sup>-yu ñá túú ní cùyí<sup>n</sup>-yu tñí ñàhá-yu xii-gá.

*Cue tée cùchiu<sup>n</sup> ñá túú sàndáá iní-güedé Jèsús*

45 Te cue tée cuáhá<sup>n</sup> tñí ñaha xii Jesús ní cùu ní ndexìo-güedé núú cuè tée cùu fariséu ndihí núú cuè dútú cúnùu. Te xǎha<sup>n</sup> cuè tée cùnùu-á<sup>n</sup>:

—¿Ná cuèndá ñá ní cǎndeca-ndo tée-ǎ<sup>n</sup> quixi? —  
 càchí-güedé xǎha<sup>n</sup>-güedě.

46 Te cue tée ní sáhá<sup>n</sup> chù<sup>n</sup> ní xáha<sup>n</sup>-güedě:

—Ni ì<sup>n</sup> tée ñá túú xìní-ndí cáhá<sup>n</sup> dàtná cáhá<sup>n</sup> tée-ǎ<sup>n</sup> —càchí-güedé xǎha<sup>n</sup>-güedě.

47 Te ní xáha<sup>n</sup> cuè tée cùu fariséu:

—¿Náa tñàhá nchòhó ní sàndáá iní-ndó tñùhu ndehnde cáhá<sup>n</sup> tée-ǎ<sup>n</sup>? 48 ¿Náa ñá túú xìní-ndó sǎ nì ì<sup>n</sup> cue tée tàxi tñuní nchúhú, te ni ì<sup>n</sup> nchúhú cue tée cùu fariséu ñá túú sàndáá iní-ndí tée-ǎ<sup>n</sup> ñǎ? 49 Nchaa ñáyiu tùha ñaha xii tée-ǎ<sup>n</sup> ñá túú sàndáá iní-yu nacuáa cáhá<sup>n</sup> tñùhu sá sánú ìchi ñaha xii-o, dico cuíta nihnú-yu sá dúcá<sup>n</sup> quidé-yu —càchí-güedé xǎha<sup>n</sup>-güedě xii cue tée-á<sup>n</sup>.

50 Te té Nicòdemú tée ní sáhá<sup>n</sup> niú ní ndatnúhu-dé ndihí Jèsús cúu-dě tñàhá-dé ì<sup>n</sup> tée fariséu, te ní xáha<sup>n</sup>-dě xii-güedé:

51 —Tnúhu sá sánú ìchi ñaha xii-o nacuáa cundecu-o càchí-xí sá ndéé cundedóho-o nǎsa cáhá<sup>n</sup> tée tàú cuéchi cuèndá cutnùní iní-ó nǎ ní quide-dé, te dǎtnùní cáhá<sup>n</sup>-ó nũu ndisa ndècuéchi-dé àdi ñá túú ndècuéchi-dé —càchí-dé xǎha<sup>n</sup>-dě.

52 Te ní xáha<sup>n</sup>-güedě:

—Cùu ní cachí sá tñàhá-ò cúu-n tée distritú Galileá nũu duca<sup>n</sup> cáhá<sup>n</sup>-n. Dacuàha tutú yódó

tnùní tnúhu Yá Ndiǒxí te quiní-n nàcuáa càhá<sup>n</sup>-xi sá nì ì<sup>n</sup> tée véxi distritú Galiléa ñá túú càhá<sup>n</sup>-dé tnúhu Yá Ndiǒxí —càchí-güedé xăha<sup>n</sup>-güedě.

<sup>53</sup> Duca<sup>n</sup> te ndi dí<sup>n</sup> cuănuhú-güedé vehe-güedé.

## 8

### *È<sup>n</sup> ñadìhí ndécú vîhi cuéchi-xi*

<sup>1</sup> Te Jèsús cuáhá<sup>n</sup>-gá yucu Òlívú. <sup>2</sup> Te sátá ñí túndaá nduu tnée, te cuáhá<sup>n</sup> tucu-gá veñúhu càhnu sá ìo cùnuu. Te ìo cuéhé ñăyiu ní chítú níhnŭ-yu núú-gă, te ní ngóo-gá ní dănèhé ñáhá-gă xií-yu. <sup>3</sup> Te ní quexìo cue tée dàcuaha ñaha xií-yu nchaa tnúhu ní chídó tnùní ndíi Moisés, ndihí cue tée cùu fariséú, te ndèca-güedé ì<sup>n</sup> ñadìhí ní sáá, te ñaha-á<sup>n</sup> ñí xiní ñáhă-yu càhá<sup>n</sup> ndihí-a<sup>n</sup> ì<sup>n</sup> tée dico ñá díú yì-a<sup>n</sup> cuu-dé, te ní sanutnì ñaha-güedě xii-a<sup>n</sup> tnuú nchaa ñăyiu xîndecu núú Jèsús. <sup>4</sup> Te ní xáha<sup>n</sup>-güedě xii Jèsús:

—Mèstrú, ñadìhí-a ní xiní ñáhá ñăyiu xii-a<sup>n</sup> càhá<sup>n</sup> ndihí-a<sup>n</sup> ì<sup>n</sup> tée dico ñá díú yì-a<sup>n</sup> cuu-dé. <sup>5</sup> Te tnúhu ní chídó tnùní ndíi Moisés càchí-xi sá yúú cahni-o nchàa ñăyiu dîhí duha quède. Te yòhó, ¿nása càchí-n cùnduu-i? —cachí-güedé xăha<sup>n</sup>-güedě xii-gá.

<sup>6</sup> Duha ní cáhá<sup>n</sup>-güedé chi cuendá sá cuíní-güedé coto ndeé ñáhá-güedě xii-gá nŭu nása cáhá<sup>n</sup>-gá cuendá nùcòo nchihi ñaha-güedě xii-gá ní cáhá<sup>n</sup>-güedě. Te ní ngúnu ndeyi-gá te ní nguíta-gá tée-gă ndihí díquí ndáhá-gă lètrá núú ñúhú. <sup>7</sup> Te xicá<sup>n</sup> tnúhú-ní tùcu-güedé núú-gă nŭu ní ndonehe núú-gă, te ní xáha<sup>n</sup>-gă:

—Ndědani càa nchohó te núu ñá túú nă cuéchi quide-ndo te díhna nuu-gă-ndó chĩ cuăha-a<sup>n</sup> yúú — cächí-gá xáha<sup>n</sup>-gă xii-güedé.

<sup>8</sup> Te ní ngúnu ndeyi tucu-gá téé tucu-gá lètrá núú ñúhú. <sup>9</sup> Te sá dúcá<sup>n</sup> ñĩ xáha<sup>n</sup>-gă xii-güedé te ní ndixi túu iní-güedé sá ñà túú quide váha mee-güedě tñahá-güedé, núu da ì<sup>n</sup> da ì<sup>n</sup>-güedé ní ndee, te díhna-gá cue téé cùu sacuéhé ñĩ ndee te ní ngúita nchicú<sup>n</sup> dava-gá-güedé. Te sátá ñĩ ndihí-güedé ní ndee, te ní quendóo mee-nă Jèsús ndihí ñadhí-á<sup>n</sup>. <sup>10</sup> Te ní ndonehe núú Jèsús te ní xiní-gá sá ñĩ ndihí-güedé cuáhá<sup>n</sup> te mee-nă ñadhí-á<sup>n</sup> ñĩ ndóo-a<sup>n</sup>, te ní xáha<sup>n</sup>-gă xii-a<sup>n</sup>:

—¿Nděndi cuáhá<sup>n</sup> cue téé cächí sá ñĩ quide-n cuéchi? ¿Ni ì<sup>n</sup>-güedé ñá ní cùndee tñuhu-güedé quíhí<sup>n</sup>-n càstiú-va? —cächí-gá xáha<sup>n</sup>-gă xii-a<sup>n</sup>.

<sup>11</sup> Te ní xáha<sup>n</sup>-a<sup>n</sup> xii Jèsús:

—Ñáhá, chi ni ì<sup>n</sup>-güedé ñá ní ndàcu-güedé — cächí-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ni yúhú vá dáquihí<sup>n</sup> ñáhà-í castiú xii-n. Te vitna te núhú-n te vá cádá-gă-n năndi sá cuèhé sá dúhá —cächí-gá xáha<sup>n</sup>-gă xii-a<sup>n</sup>.

### *Jèsús dándixi túu-gá iní-ó*

<sup>12</sup> Te ní cáhá<sup>n</sup> tucu Jèsús núú ñăyiu, te xáha<sup>n</sup>-gă xii-yu:

—Yúhú cúu-í dàtná ì<sup>n</sup> ñuhú dáyèhe-í ñuyíú-a, te nchaa ñáyiu na chìtnahá ñáhá xii-í, te vá cùndècu-gá-yu ichi cuèhé ichi duha, chi yúhú dándixi túu-í iní-yu cuèndá cutnùní iní-yu nàcuáa

ndùu cuendá Yă Ndiöxí, te cundecu-í ndihí-yu ni caa ni quíhí<sup>n</sup> —càchí-gá xáha<sup>n</sup>-gă xii-yu.

<sup>13</sup> Te ní xáha<sup>n</sup> cuè téè cùu fariséú xii-gá:

—Medì-n cahá<sup>n</sup>-n sǎ cúú-n tǎe váha, te vá yõo ì<sup>n</sup>-gá chindèè tnúhu ñaha xii-n núu ná téè cùu-n, dico xǎ<sup>n</sup> ñá túú nándíhi-xi —càchí-güedé xǎha<sup>n</sup>-güedé xii-gá.

<sup>14</sup> Te ní xáha<sup>n</sup> Jèsús:

—Cuèi càhá<sup>n</sup>-í cuendá mée-í dico nándíhi tnúhu càhá<sup>n</sup>-í. Chì yúhú ñaha-í ndèè ichi véxi-í, te xìní-í ndèè ichi núhú-í, dico nchòhó chì ñá túú xìní-ndó ndèè ichi véxi-í, te ni ñà túú xìní-ndó ndèè ichi quíhí<sup>n</sup>-í. <sup>15</sup> Te nchòhó chì cuendá-ni càhá<sup>n</sup>-ndó cuendá ñáyiu núu quide váha-yu àdi ñá túú quide váha-yu. Te yúhú ñá túú càhá<sup>n</sup>-í cuendá ñáyiu núu quide váha-yu àdi ñá túú quide váha-yu. <sup>16</sup> Àdi núu càhá<sup>n</sup>-í dico ì<sup>n</sup> tnúhu ndáá càhá<sup>n</sup>-í chì ñá díú-ní mée-í càhá<sup>n</sup>, chì tnàhá Tǎtà-í Yaá ní tendaha ñaha xii-í véxi-í ñuyíú-a càhá<sup>n</sup>-gá chindèè tnúhu ñaha-gă xii-í. <sup>17</sup> Te tnúhu sá sánú ichi ñaha xii-ndo cachí-xi sá ñu na cundecu úú cue téè càhá<sup>n</sup> ndáá-güedé nàcuáa cùu ì<sup>n</sup> sá cündǎá, te núu ì<sup>n</sup>-ni tnúhu na càhá<sup>n</sup>-güedé ndi ndùú-güedé te xǎ<sup>n</sup> nándíhi-xi, duha càchí tnúhu-á<sup>n</sup>. <sup>18</sup> Te díu-ni duca<sup>n</sup> cùu-xi yúhú chì càhá<sup>n</sup>-í ì<sup>n</sup> tnúhu ndáá sá cúú-xí mée-í, te díu-ni dàtná càhá<sup>n</sup>-í càhá<sup>n</sup> Tǎtà-í Yaá ní tendaha ñaha xii-í véxi-í ñuyíú-a —càchí-gá xáha<sup>n</sup>-gă xii-güedé.

<sup>19</sup> Te ní xáha<sup>n</sup>-güedé xii-gá:

—¿Te ndèè ndécú Tǎtà-n-í? —càchí-güedé xǎha<sup>n</sup>-güedé.

Te ní xáha<sup>n</sup> Jèsús:

—Te núu dìcò xìní-ndó yòo cuu yúhú-á te duca<sup>n</sup> te quiní-ndó Tǎtà-í. Te ni yúhú ñá túú xìní-ndó

yòo cuu-í nũu xíǎ<sup>n</sup> ñá túú xìní-ndó Tătà-í —càchí-gá xáha<sup>n</sup>-gǎ xii-güedé.

<sup>20</sup> Duha ní cáhá<sup>n</sup> Jèsús nini dàcuaha-gá ñáyiú xití veñúhu núú ndécú àlcanciá díhú<sup>n</sup>. Te vá yòo ì<sup>n</sup> ni cùyi tni ñaha xii-gá chi vátá sàá-gá òré tni ñaha-güedě.

*Ñáyiú ñá túú sàndáá iní ñáhá xii Jesús vá ndácú-yu quíhí<sup>n</sup>-yu núú nùhú-gá cundecu-gá*

<sup>21</sup> Te ní xáha<sup>n</sup> tùcu Jesús xii-güedé:

—Yúhú nùhú-í te nanducu ñàha-ndo te vá nánhí ñáhá-ndó, te cuú-ndó nũu yíca cuèchi-ndo, chi vá ndácú-ndó sàá-ndó nũu nùhú-í cundecu-í —càchí-gá xáha<sup>n</sup>-gǎ xii-güedé.

<sup>22</sup> Te ní xitnàha cue téé isràél:

—¿Te náa cahni-dé méé-dě nũu càchí-dé sá vǎ ndácú-ó sàá-ó nũu quíhí<sup>n</sup>-dé-ǎ<sup>n</sup>? —càchí-güedé xitnàha-güedé.

<sup>23</sup> Te ní xáha<sup>n</sup> Jèsús xii-güedé:

—Nchòhó chi cue téé ñuyíú-a cùu-ndo, núú ío ñùhu iní-ndó sǎ ío ñuyíú-a. Te yúhú chi téé núú ñinu cùu-í nũu xíǎ<sup>n</sup> ñá túú sǎ ío ñuyíú-a ñùhu iní-í. <sup>24</sup> Te xíǎ<sup>n</sup> nũu càchí-í sá cùú-ndó nũu yíca cuèchi-ndo, chi ñá cuiní-ndó quindáá iní-ndó sǎ yùhú véxi cuu<sup>n</sup>-í andiú, te núú xíǎ<sup>n</sup> diú-ni núú yíca cuèchi-ndo cùú-ndó —càchí-gá xáha<sup>n</sup>-gǎ xii-güedé.

<sup>25</sup> Te ní xíca<sup>n</sup> tnùhú-güedě núú-gǎ, te xǎha<sup>n</sup>-güedě:

—¿Te ná cúú yòhó nũu duca<sup>n</sup> càhá<sup>n</sup>-n-í? —càchí-güedé xǎha<sup>n</sup>-güedě xii-gá.

Te ní xáha<sup>n</sup>-gǎ:

—Sa ní cachí tnùhu-í xii-ndo nděé díhna —càchí-gá xáha<sup>n</sup>-gǎ xii-güedé.

<sup>26</sup> Te xǎha<sup>n</sup> tùcu-gá:

—Ndècu cuéhé tnũhu cáhá<sup>n</sup>-í cada ndáá-í cuendá nchòhó. Te Tàtá-í Yaá ní tendaha ñaha xii-í véxi-í ñuyíú-a càhá<sup>n</sup>-gá tnúhu ndáá, te tnúhu càhá<sup>n</sup> yúhú ñuyíú-a cùu-xi tnúhu ní cáhá<sup>n</sup>-gá ní xíndedóho-í —càchí-gá xáha<sup>n</sup>-gã xii-güedé.

<sup>27</sup> Te mee-güedě ñá túú ní tècú tnùn-í-güedé sá cuendá Dútú Ndiöxí ní cáhá<sup>n</sup> Jèsús. <sup>28</sup> Te ní xáha<sup>n</sup>-gã xii-güedé:

—Òré ná catá cãa ñaha-ndo xii yúhú Tée cùu ñaní tnáhá-ndó nchãa-ndo núú cùrúxí cahni ñaha-ndo, te òré-á<sup>n</sup> cutnùn-í iní-ndó yòo cuu-í, te ñá túú quide-í sá cúú iní mée-í, chi yúhú càhá<sup>n</sup>-í nãcuáa ní dánèhé ñáhá Tàtá-í <sup>29</sup> Yaá ní tendaha ñaha xii-í véxi-í. Te ñu-gá ndécú ndihi ñaha-gá xii-í, te ñá túú dàña nihnu ñaha-gá chi quide-í nchaa nãcuáa cùu iní-gá —càchí-gá xáha<sup>n</sup>-gã xii-güedé.

<sup>30</sup> Te sá dúcá<sup>n</sup> ñí cáhá<sup>n</sup>-gá nũu ío vãi ñáyiú ní sándáá iní ñáhá xii-gá.

*Ñáyiú sándáá iní ñáhá xii Yá Ndiöxí ndihi ñáyiú ndècu ichi cuéhé ichi duha*

<sup>31</sup> Te ní xáha<sup>n</sup> Jèsús xii ñáyiú isràél ñáyiú ní sándáá iní ñáhá xii-gá:

—Te núu vá dáñá ndèé-ndó càda-ndo nchaa nacuáa càhá<sup>n</sup>-í, te cuu ndisa-ndo cuè téé tnáhá tnúhu ndihi-í, <sup>32</sup> te tecú tnùn-í-gá-ndó tnũhu ndáá, te duca<sup>n</sup> te cácu nihnu-ndo —càchí-gá xáha<sup>n</sup>-gã xií-yu.

<sup>33</sup> Te ní xáhá<sup>n</sup>-yu:

—Nchúhú cúú-ndí cue ñaní tnáhá ndihi Àbrahám, te ni ñí<sup>n</sup> nduu ñá túú ndèé sácündedí nihnu-ndí ndoho tnáhá-ndí nũu cáchí-ö sá dàcácu nihnu ñaha-n xii-ndí —càchí-yu xáhá<sup>n</sup>-yu xii-gá.

<sup>34</sup> Te ní xáha<sup>n</sup> Jèsús xií-yu:

—Na càchí tnúhu ndáá-í xii-ndo sǎ nchàa ñáyiu quide nchaa sá cuèhé sá dúhá tàxi tnuní ñáhá-nǎ-xi xii-yu. <sup>35</sup> Te cue ñáyiu xinu cuechi te vá cúú ñ<sup>n</sup>-ná cuú-yu ndihi ñáyiu dii vèhe-xi xinu cuechí-yu, dico cue déhe ñáyiu dii vèhe-xi-á<sup>n</sup> chi ñ<sup>n</sup>-ni cùu ndihi ñaha-güexi xii-yu. <sup>36</sup> Te núu yúhú Yaá cúú Dèhe Yá Ndiöxí dàcácu nihnu ñaha-í xii-ndo núu nchàa yicá cuèchi-ndo, te ndáá sá nchòhó cácu nihnu ndisa-ndo. <sup>37</sup> Te yúhú sa xiní-í sá nchòhó cúú-ndó ñàní tnáhá ndïi Àbrahám, te dìcò-ni sá ñǎ tnàhá iní-ndó tnúhu càhá<sup>n</sup>-í núu xiǎ<sup>n</sup> cuìní-ndó càhni ñaha-ndo. <sup>38</sup> Te yúhú càhá<sup>n</sup>-í nàcuáa ní dánèhé ñáhá Tǎtà-í, te nchòhó quidé-ndó nàcuáa càhá<sup>n</sup> tǎtà-ndó —càchí-gá xáha<sup>n</sup>-gǎ xii-yu.

<sup>39</sup> Te ní xáhǎ<sup>n</sup>-yu:

—Ndíi Àbrahám cúú tǎtà-ndǐ —càchí-yu xáhǎ<sup>n</sup>-yu xii-gá.

Te ní xáha<sup>n</sup> Jèsús:

—Núu ndisa ñàní tnáhá ndïi Àbrahám cúú-ndó, te cada-ndo nàcuáa ní xóo cada ndíi ni cùu. <sup>40</sup> Te yúhú cuèi càhá<sup>n</sup>-í ñ<sup>n</sup> tnúhu ndáá nàcuáa càhá<sup>n</sup> Yǎ Ndiöxí càchí tnúhu-gá xii-í, te cuìní-ndó càhni ñaha-ndo. ¡Dico ndíi Àbrahám chi ñá túú dùca<sup>n</sup> ni quide ndíi! <sup>41</sup> Te nchòhó quidé-ndó nàcuáa quide tǎtà-ndó —càchí-gá xáha<sup>n</sup>-gǎ xii-yu.

Te ní xáhǎ<sup>n</sup>-yu:

—Nchúhú, ñá túú yàyacá<sup>n</sup> ndécú tǎtà-ndǐ, chi ñ<sup>n</sup>dìi Yá Ndiöxí cúú tǎtà-ndǐ —càchí-yu xáhǎ<sup>n</sup>-yu xii-gá.

<sup>42</sup> Te ní xáha<sup>n</sup> Jèsús:

—Núu dìcò Yǎ Ndiöxí ndisa cùu Tǎtà-ndó te cuu iní ñáhá-ndó xì-í ní cùu chi yúhú ní quee-í núu

ndécú-gă véxi-í ñuyíú-a. Te ñá túú vēxi-í sá cúú ìní mée-í, chi mee-gă ní tendaha ñaha-gá véxi-í. <sup>43</sup>Te ñá túú tècú tñuní-ndó tñũhu càhá<sup>n</sup>-í chi ñá túú tñahá ìní-ndó. <sup>44</sup>Te nchòhó chi tătá-ndó cùu yucu ñávãha núu cùdíí ìní-ndó quide-ndo nchaa nacúáa cùu ìní-xi, chi ndée òré ní ngáva ñuyíú duca<sup>n</sup>-ni ndècu-xi dacáhá<sup>n</sup>-xi ìní-ndó sàhni tñaha-ndo. Te ñá ìí<sup>n</sup> ndùu cáhá<sup>n</sup>-xi ìí<sup>n</sup> tñũhu ndáá chi ñá túú xìca-xi ichi ndáá, chi mee-ni ìchi tñũhu ndehnde xìca-xi chi duca<sup>n</sup> ìní-xi. Te dũu-xi dàcahu-xi ìní-ndó dàcuandehnde-ndo. <sup>45</sup>Te yúhú càhá<sup>n</sup>-í tñũhu ndáá te ñá túú cuìní-ndó quìndáá ìní ñáhá-ndó. <sup>46</sup>¿Te ndèdacàa nchohó xìní-ndó sá quidè-í ìí<sup>n</sup> sá cuèhé sá dúhá-í?, te yúhú ñá túú nã quidè-í chi càhá<sup>n</sup> ndáá-í, ¿te ná cuèndá ñá túú cuìní-ndó quìndáá ìní-ndó tñũhu càhá<sup>n</sup>-í? <sup>47</sup>Te nchaa ñáyiú ndècu ichi Yá Ndiõxí, ñáyiú-á<sup>n</sup> sácũndedóho-yu nchaa tñũhu càhá<sup>n</sup>-gá. Te nchòhó chi ñá díú ìchi Yá Ndiõxí ndécú-ndó núu ñá túú sácũndedóho-ndo tñũhu càhá<sup>n</sup>-gá —càchí-gá xáha<sup>n</sup>-gă xíí-yu.

*Díhna-gá Cristú sa ndècu dacúúxí ndĩ Abrahám*

<sup>48</sup>Te ní xáha<sup>n</sup> ñáyiú isràél:

—Váha-ni càhá<sup>n</sup>-ndí sá tẽe samaritánú cúú-n, te yucu ñávãha ndècu ndihí-n —cachí-yu xãhã<sup>n</sup>-yu xii-gá.

<sup>49</sup>Te ní xáha<sup>n</sup> Jèsús:

—Yúhú, ñá túú yùcu ñávãha ndècu ndihí-í, chi Tătá-í quidé càhnu-í, te nchòhó da cùu úhú ìní ñáhá-ndó xìi-í —càchí-gá xáha<sup>n</sup>-gă xíí-yu.

<sup>50</sup>Te xáha<sup>n</sup> tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndiõxí cuìní-gá sá cádá càhnu ñaha-ndo



xii-í. Te mee-gă cáhá<sup>n</sup>-gá nõu ndëdacàa-ndo quide váha, te ndëdacàa-ndo ñá túú quide váha. <sup>51</sup> Te na cächí tnúhu ndáá-í xii-ndo sã nchàa ñáyiu na tn̄i tnúhu cãhá<sup>n</sup>-í te vá cuíta nihnú-yu —cächí-gá xáha<sup>n</sup>-gã xií-yu.

<sup>52</sup> Te ní xáha<sup>n</sup> tùcu ñáyiu isràél:

—Vitna te ní xiní ndáá-ndí sá yùcu ñávãha ndècu ndihí-n, chi ndíi Àbrahám ndihí nchaa cue téé ní xóo cáhá<sup>n</sup> tnúhu Yá Ndióxi ndéé sanaha ñi xíhí-güedé, te yòhó cächí-tu-n sã ncháá ñáyiu na tn̄i tnúhu cãhá<sup>n</sup>-n te vá cùú-gá-yu. <sup>53</sup> ¿Náa ío-gá cãhnu cuu-ó dàcúúxí ñàní tnáhá-ndí ndíi Àbrahám-ã<sup>n</sup>? Téé-á<sup>n</sup> dai ní xíhí-dé ndihí cue téé ní xóo cáhá<sup>n</sup> tnúhu Yá Ndióxi ndéé sanaha. ¿Te yòhó nágá-tu cùu-n te vá cùú-n cãhá<sup>n</sup>-n-i? —cachí-yu xãhã<sup>n</sup>-yu.

<sup>54</sup> Te ní xáha<sup>n</sup> Jèsús:

—Te núu dicó mèe-í quidé cãhnu-í mèe-í ñá, te ñá túú nãndíhi sá quidè-í nõu duca<sup>n</sup>. Dico Tãtà-í quidé cãhnu ñaha-gá xii-í, te ñiu-ni Yaá-á<sup>n</sup> cächí-ndó cùu Ndióxi-ndó. <sup>55</sup> Te nchòhó chi ñá túú xìní-ndó-gã. Te yúhú chi xìní-í-gá. Te núu na cächí-í sá ñà túú xìní-í-gá te dàcuandehnde-í dàtná ndehnde mèe-ndo. Te yúhú chi xìní ndisa-í-gá te tn̄i-í nchaa tnúhu cãhá<sup>n</sup>-gá. <sup>56</sup> Te ndíi Àbrahám ñàní tnáhá-ndó ñi xíndecu ndéé sanaha ío ní cudíi ñni ndíi sá quini ñáhá ndíi xii-í, te ní sãá nduu ñi xiní ñáhá ndíi xii-í nõu ío ní cudíi ñni ndíi —cächí-gá xáha<sup>n</sup>-gã xií-yu.

<sup>57</sup> Te ní xáha<sup>n</sup> ñáyiu isràél xii Jèsús:

—Ni vãtã cùhú<sup>n</sup>-gã-n ùdico úxí cuíá-n te cächí-n sã ñi xiní-n ndíi Àbrahám, te ní cunaha vìhi ní xíhí ndíi-á<sup>n</sup> —cächí-yu xãhã<sup>n</sup>-yu xii-gá.

<sup>58</sup> Te ní xáha<sup>n</sup> Jèsús:

—Te na cächí tnúhu ndáá-í xii-ndo sã cùmání-gã cundecu ndí-án ñuyú-a te yúhú sa ndècu-gá-í — cächí-gá xáha<sup>n</sup>-gã xii-yu.

<sup>59</sup> Te sá dúcá<sup>n</sup> ñí cáhá<sup>n</sup>-gá nõu xíã<sup>n</sup> ní quehé<sup>n</sup>-yu yúú cuãha ñàhá-yu xii-gá ní cùu, te ní nguívãha-gá nõu-yu te ní quee-gá xití veñúhu cuáhá<sup>n</sup>-gá.

## 9

*Jèsús quidé tãtna-gá ñ<sup>n</sup> tée cuàá*

<sup>1</sup> Te núú xicá cùu Jesús ní naníhí-gã ñ<sup>n</sup> tée cuàá, te sa duca<sup>n</sup> tnàhí càa núú-dě ní cacu-dé. <sup>2</sup> Te ní xáha<sup>n</sup> cuè tée xica cuu ndihí-gá xii-gá:

—Mèstrú, ¿ná cuendá dàcá<sup>n</sup> cuàá tée-ã<sup>n</sup> ní cacu-dé? ¿sá cuendá nchaa yicá cuèchi tãtá-dě, ã<sup>n</sup> sã cuendá nchaa yicá cuèchi nãná-dě, ã<sup>n</sup> sá cuendá nchaa yicá cuèchi mee-dě dàcá<sup>n</sup> cáá-dě ní cacu-dé? —cächí-güedé xáha<sup>n</sup>-güedě xii-gá.

<sup>3</sup> Te ní xáha<sup>n</sup> Jèsús:

—Ni ñà díú sã cuendá nchaa yicá cuèchi mee-dě, te ni ñà díú sã cuendá nchaa yicá cuèchi tãtá-dě, te ni ñà díú sã cuendá nchaa yicá cuèchi nãná-dě, chi mee Yã Ndiõxí ní cuiní-gá sá dúcá<sup>n</sup> cunduu-dé sáá-dé ñuyú-a cuendá sá ñuyú-a quini ñáyu nása cada ñaha Yã Ndiõxí xii-dé ndúha núú-dě. <sup>4</sup> Te vitna ió-gá nduu cùyica sá cadà-í nchaa chiú<sup>n</sup> ní táhú Yáá ní tendaha ñaha xii-í véxi-í ñuyú-a, chi sáá nduu te vá ndácú-gã-í cada-í chiú<sup>n</sup>-gá. <sup>5</sup> Te ñini ndècu-gá-í ñuyú-a te dândixi túu-í iní nchaa ñáyu cuendá cutnùní iní-yu nacuáa nduu cuendá Yã Ndiõxí —cächí-gá xáha<sup>n</sup>-gã xii-güedé.

<sup>6</sup> Te sátá dúcá<sup>n</sup> nǐ cáhá<sup>n</sup>-gá, te ní sati-gá díí-gá núú ñúhú te ní dácá-gǎ luha ñuhu ní cuáha ndéhyú, te ndéhyú-ǎ<sup>n</sup> nǐ dácánùu-gá ndúú xio núú tǎe cuàá-á<sup>n</sup>.

<sup>7</sup> Te ní xáha<sup>n</sup>-gǎ xii-dé:

—Quíhí<sup>n</sup>-n nàquete-n núú-n ndùte tanquí Silòé —càchí-gá xáha<sup>n</sup>-gǎ xii-dé. Te Silòé-á<sup>n</sup> quée-xí tnùhu mèe-yu: Tée xica chiu<sup>n</sup>.

Te ní sáhá<sup>n</sup> tée cuàá-á<sup>n</sup> nǐ naquete-dé núú-dě, te òré ní ndexìo-dé te sa ndèhe-dě. <sup>8</sup> Te nchaa ñáyiu ndècu yatni núú ndécú-dě ndihì nchaa ñáyiu xìní ñáhá xii-dé núú xìcá<sup>n</sup> ndàhú-dé ní xítnàhá-yu:

—¿Náa ñá díú tǎe-ǎ<sup>n</sup> ní xóo cáca<sup>n</sup> ndàhú-dé? —càchí-yu xítnàhá-yu.

<sup>9</sup> Te davá-yu càchí-yu sá díú-dě, te davá-yu càchí-yu sá ñà díú-dě, dico duca<sup>n</sup> càa-dé, càchí-yu xítnàhá-yu.

Dico mee-dě ní xáha<sup>n</sup>-dě xií-yu sá díú-dě.

<sup>10</sup> Te ní xìcá<sup>n</sup> tnúhǔ-yu núú-dě, te xǎhǎ<sup>n</sup>-yu:

—¿Nása ní cuu núu ní ndúha núú-n ndèhe-n vitna? —cachí-yu xǎhǎ<sup>n</sup>-yu xii-dé.

<sup>11</sup> Te ní xáha<sup>n</sup>-dě:

—Tée nàni Jesús-ǎ<sup>n</sup> ní cadúha-dé luha ndéhyú te ní dácánùu-dé núù-í, te ní táúchíú<sup>n</sup>-dě ní sáhá<sup>n</sup>-í tànquí Silòé ní naquete-í núù-í, te òré-á<sup>n</sup> nǐ cuu cundehe-í —càchí-dé xǎha<sup>n</sup>-dě xií-yu.

<sup>12</sup> Te ní xìcá<sup>n</sup> tnúhú tùcú-yu núú-dě, te xǎhǎ<sup>n</sup>-yu:

—¿Te ndéé ndécú tǎe-á<sup>n</sup>? —càchí-yu xǎhǎ<sup>n</sup>-yu xii-dé.

Te ní xáha<sup>n</sup>-dě:

—Ñá túú xìní-í —càchí-dé xǎha<sup>n</sup>-dě xií-yu.

*Cue tée cùu fariséú ndátnùhu-güedé ndihì tée ní ndúha núú-xi*

<sup>13</sup> Te ndèca-güedé téé ní ndúha núú-xi-á<sup>n</sup> cuǎhá<sup>n</sup> núú cuè téé cùu fariséú. <sup>14</sup> Te cuèndá sá ndùu ndetatú-yu ní cadúha Jèsús ndéhyú nǐ dácánùu-gá núú tée-á<sup>n</sup> te ní ndúha, <sup>15</sup> xǎá<sup>n</sup> núu ní xícá<sup>n</sup> tnúhú cuè téé cùu fariséú núú-dě, te xǎha<sup>n</sup>-güedě:

—¿Nása ní cuu ní ndúha núú-n? —càchí-güedé xǎha<sup>n</sup>-güedě xii-dé.

Te ní xǎha<sup>n</sup>-dě xii-güedé:

—Í<sup>n</sup> téé ní dácánùu-dé ndéhyú núù-í te ní sáhá<sup>n</sup>-í ní naquete-í, te ní cuu ndèhe-í vitna —càchí-dé xǎha<sup>n</sup>-dě xii-güedé.

<sup>16</sup> Te dava cue téé cùu fariséú ní xítnáha-güedé:

—Ñá díú Yǎ Ndiǒxí ní tëndaha ñaha-gá xii téé-ǎ<sup>n</sup> véxi-dé núu duha quède-dé nchaa sá vǎ yǒo tnàhí ndàcu cada, te ñá túú sàndáá iní-dé canehe íí-dě nduu ndetatú-ó —càchí-güedé xítnáha-güedé.

Te dava-güedé ní xítnáha-güedé:

—¿Nása ndacu-dé cada-dé sá vǎ yǒo tnàhí ndàcu cada te núu cùu-dé téé yícá cuèchí? —càchí-güedé xítnáha-güedé.

Te ñá túú ní cùu ì<sup>n</sup>nuu-güedé tnúhu ní cáhá<sup>n</sup>-güedé. <sup>17</sup> Te ní xícá<sup>n</sup> tnúhú tùcu-güedé núú tée ní ndúha núú-xi-á<sup>n</sup>, te xǎha<sup>n</sup>-güedě:

—Te yòhó, ¿nása càchí-n cuèndá téé ní quide tátna núú-n te ní ndúha? —càchí-güedé xǎha<sup>n</sup>-güedě xii-dé.

Te ní xǎha<sup>n</sup>-dě:

—Yúhú càchí-í sá í<sup>n</sup> tée càhá<sup>n</sup> tnúhu Yá Ndiǒxí cúú-dé —càchí-dé xǎha<sup>n</sup>-dě xii-güedé.

<sup>18</sup> Dico cue téé isràél ñá ní sàndáá iní-güedé sá cuàá-dé ní cùu, chi cuèndá sa ní ndúha núú-dě ní xiní ñáhá-güedě, te xǎá<sup>n</sup> núu ní cana-güedé tátá-dě

ndihî năná-dě, <sup>19</sup> te ní xícá<sup>n</sup> tnúhú-güedě núú-yu, te xăha<sup>n</sup>-güedě:

—¿Diu tée-a déhe-ndo tée cächí-ndó cuàá-dé ní cacu-dé-ă<sup>n</sup>? ¿Te nása ní cuu ní ndúha núú-dě? — cächí-güedé xăha<sup>n</sup>-güedě xií-yu.

<sup>20</sup> Te ní xáha<sup>n</sup> tătá-dě ndihî năná-dě:

—Diu déhe-ndí cúú-dě te sa cuàá ndisa-dé ní cacu-dé, <sup>21</sup> dico ñá túú xìní-ndí nása ní cuu ní ndúha núú-dě, te ni ñà túú xìní-ndí yoo ní guide tátna. Chí cacă<sup>n</sup> tnúhú núú méé-dě xiă<sup>n</sup> núu sa sàcuéhé-dě, te na cáhá<sup>n</sup>-dé núu nása ní cuu ní ndúha núú-dě —cächí-yu xăhă<sup>n</sup>-yu xii-güedé.

<sup>22</sup> Duha ní cáhá<sup>n</sup> tătá-dě ndihî năná-dě ní xăhă<sup>n</sup>-yu xii-güedé cuëndá sá yúhú-yu cue tée cùnuu núú ñăyiu isrâél, chi cue tée-ă<sup>n</sup> sa ní ndatnúhu-güedé ní cuu ĩ<sup>n</sup>nuu-güedě sá núu ndédacàa ñăyiu na cáhá<sup>n</sup> sá Jêsús cúú-gă Crístú Yaá ní tendaha Yă Ndiöxí véxi ñuyíú-a, te vá dáñá-gă-güedé quíhu-yu veñúhu. <sup>23</sup> Núu xiă<sup>n</sup> ní xáha<sup>n</sup> tătá-dě ndihî năná-dě sá ná cacă<sup>n</sup> tnúhú-güedě núú méé-dě chi sa sacuéhé-dě.

<sup>24</sup> Te xiă<sup>n</sup> núu ní cana tucu-güedé tée ní ndúha núú-xi-á<sup>n</sup>, te ní xáha<sup>n</sup>-güedě:

—Cáhá<sup>n</sup>-n ĩ<sup>n</sup> tnúhu ndáá chi Yá Ndiöxí ndéhé ndĭ-gá nàcuáa ní cuu ní ndúha núú-n, chi nchúhú xìní-ndí sá dícó ĩ<sup>n</sup> tée ndècu yícá cuëchi-xi cùu tée cächí-n ñí guide tátna núú-n —cächí-güedé xăha<sup>n</sup>-güedě xii-dé.

<sup>25</sup> Te ní xáha<sup>n</sup>-dě:

—Yúhú, ñá túú xìní-í te núu tée ndècu yícá cuëchi-xi cùu-dé àdi ñáhá. Dícó-ni sá xìní-í sá cuàá-í ñí cùu te vitna ní cuu cundehe-í —cächí-dé xăha<sup>n</sup>-dě xii-güedé.

26 Te ní xícá<sup>n</sup> tnúhú tùcu-güedé núú-dě, te xăha<sup>n</sup>-güedě:

—¿Nása ní quide ñaha-dě xii-n te ní ndúha núú-n-í? —càchí-güedé xăha<sup>n</sup>-güedě xii-dé.

27 Te ní xáha<sup>n</sup>-dě:

—Yúhú sa ní cáhá<sup>n</sup>-í te ñá túú quide cuendá-ndó. ¿Te ná cuendá cuíní-ndó càchí tnúhu-ni tucu-í? ¿Á tnàhá-ndó cuíní-ndó quindáá iní-ndó tnúhu càhá<sup>n</sup>-dé? —càchí-dé xăha<sup>n</sup>-dě xii-güedé.

28 Te ní cudéé<sup>n</sup>-güedě núú-dě, te ní xáha<sup>n</sup>-güedě xii-dé:

—Te núu yòhó cuíní-n chinchícú<sup>n</sup>-n tée-ă<sup>n</sup> te cuàhá<sup>n</sup>, dico nchúhú chi canchicú<sup>n</sup> nihnu nahi-ni-ndí nàcuáa ní cáhá<sup>n</sup> ndíi Moisés. 29 Te nchúhú chi nàha-ndí sá Yă Ndiöxí ní cáhá<sup>n</sup> ndíhi-gá ndíi Moisés, dico tée càchí-n-ă<sup>n</sup> chi ni ñà túú xìní-ndí ndéé tée cùu-dé —càchí-güedé xăha<sup>n</sup>-güedě xii-dé.

30 Te ní xáha<sup>n</sup> tée ní ndúha núú-xi-á<sup>n</sup>:

—¿Te náa ñá díú nchòhó càchí-ndó să ïo túha-ndo? Te núu duca<sup>n</sup> càhá<sup>n</sup>-ndó să ñà túú xìní-ndó ndéé tée cùu-dé, te díu-dé ní quide tátna-dé núú-í ní ndúha —càchí-dé xăha<sup>n</sup>-dě xii-güedé.

Te xăha<sup>n</sup> tùcu-dé:

31 —Xìní-ó să Yă Ndiöxí ñá túú tédóho-gá tnúhu càhá<sup>n</sup> ñáyiu quide nchaa sá cuèhé sá dúhá, chi nchaa ñáyiu quide cahnu ñaha xii-gá te quidé-yu nchaa nàcuáa cùu iní-gá, te ñáyiu-á<sup>n</sup> tédóho-gá tnúhu càhá<sup>n</sup>-yu. 32 Te ñá íí<sup>n</sup> ndùu cáhá<sup>n</sup> ñáyiu cuendá íí<sup>n</sup> tée cada tátna núú íí<sup>n</sup> ñáyiu cuàá ndéé ní cacu-xi te ndúha. 33 Te núu ñá díú mèe Yă Ndiöxí ní tëndaha ñaha-gá xii tée-ă<sup>n</sup> véxi-dé ñá, te

vá ndácú-dě cada tátna-dé núù-í ní cùu —cachí-dé xǎha<sup>n</sup>-dě xii-güedé.

<sup>34</sup> Te ní xáha<sup>n</sup>-güedě:

—Dico yòhó ndèé yatni vài cuéchi sa ta quìde-n véxi, ¿te vitna nacanú ichi ñaha-n xii-ndí cáhá<sup>n</sup>-n-ǎ<sup>n</sup>? —càchí-güedé xǎha<sup>n</sup>-güedě xii-dé.

Te ní queñuhu ñaha-güedě xii-dé tnuú-güedé ñá túú ní dàña-gá-güedé níhí tnáhá ndìhi ñaha-dé xii-güedé.

*Ñáyiú ñá túú ndìxi túú iní cuendá nchaa sá cuèhé sá dúhá quidé-yu*

<sup>35</sup> Te ní níhí Jèsús tnúhu sá ñi queñuhu-güedé téé ní cuhú núú-xi-á<sup>n</sup> tnuú-güedé cuendá sá vǎ tnáhá tnúhu ndìhi ñaha-gǎ-dé xii-güedé, te ní naníhí ñáhá-gǎ xii-dé te ní xáha<sup>n</sup>-gǎ:

—¿Sàndáá iní-n Dèhe Yá Ndiöxí-ǎ<sup>n</sup>? —càchí-gá xáha<sup>n</sup>-gǎ.

<sup>36</sup> Te ní xáha<sup>n</sup> tée ní cuhú núú-xi-á<sup>n</sup>:

—Mèstrú, cachí tnúhu núu ndèé ndécú tée-á<sup>n</sup> cuendá quíndáá iní-í-dé —càchí-dé xǎha<sup>n</sup>-dě xii-gá.

<sup>37</sup> Te ní xáha<sup>n</sup> Jèsús:

—Sa xìní-n-dé chi ñu-dé cúú yǔhú téé ndàtnúhu ndìhi-n —càchí-gá xáha<sup>n</sup>-gǎ xii-dé.

<sup>38</sup> Te ní ngüíñí xítí-dě núú-gǎ, te ní xáha<sup>n</sup>-dě:

—Xítóhó Jesucristú, sàndáá iní ñáhà-í xii-n —càchí-dé xǎha<sup>n</sup>-dě xii-gá.

<sup>39</sup> Te ní xáha<sup>n</sup> tùcu Jèsús:

—Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quìde váha cùú-yu dàtná ñá ñáyiú cuáá, dico nchaa ñáyiú cùtnuní iní-xi sá ñà túú quìde váha, te núu na quíndáá iní-yu tnúhu càhá<sup>n</sup>-í, te cada iní-ndó sǎ dàtná sá ñi

nacaá<sup>n</sup> núŭ-yu chi tñí-yu tnúhu càhá<sup>n</sup>-í. Te ñáyiú cächí sá quidé vǎha vá núu núu-yu cuéchi-yu chi quesàhá-yu sá ïo ndáá quidě-yu, ñáyiú-á<sup>n</sup> cúŭ-yu ðàtná ì<sup>n</sup> ñáyiú cuàá, chi vá ndíxí túu iní-yu sá ñà túú quide váha-yu ndècú-yu, te vá tñí-yu tnúhu càhá<sup>n</sup>-í —cächí-gá xáha<sup>n</sup>-gǎ xii-dé.

<sup>40</sup> Te sá dúcá<sup>n</sup> ñí cáhá<sup>n</sup>-gá, núu ní cáhá<sup>n</sup> ì<sup>n</sup> úŭ cue téé cùu fariséú, te xáha<sup>n</sup>-güedě:

—¿Te náa tñàhá nchúhú cuàá-ndí cáhá<sup>n</sup>-n-ǎ<sup>n</sup>? —  
cächí-güedé xáha<sup>n</sup>-güedě xii-gá.

<sup>41</sup> Te ní xáha<sup>n</sup> Jèsús:

—Te núu ðicó nchòhó cuàá-ndó ñá, te vá cúndècu cuéchi-ndo ni cùu, dico cächí-ndó sǎ ndéhé-ndó ì<sup>n</sup> sá quidé-ndó te ñà ndàá, núu xǎ<sup>n</sup> ío ndècu cuéchi-ndo.

## 10

### *Jèsús càhá<sup>n</sup>-gá cuèndá cùrrálí mběé*

<sup>1</sup> Te na cächí tnúhu ndáá-í xii-ndo sǎ ì<sup>n</sup> téé ñà túú quíhu ndàa yuyehe ì<sup>n</sup> currálí mběé, te cùtexínu-ni na cuídó-dé, téé-á<sup>n</sup> cúú-dě ñádúhú. <sup>2</sup> Dico téé quíhu ichi yèhe currálí-güedi, téé-á<sup>n</sup> cúú-dě xítóhó-güedi. <sup>3</sup> Te téé ndéé yèhe currálí-güedi nàcaá<sup>n</sup>-dé te cuánguìhu xítóhó-güedi te ní cáhá<sup>n</sup>-dé, te ní nucúhu<sup>n</sup> ndudú ñáhá-güedi xii-dé. Te ní cáhá<sup>n</sup> díú-dě-güedi te ní queñuhu-dé-güedi cùrrálí. <sup>4</sup> Te sátá ñí quee-güedi cùrrálí, te ní ngódó núú-dě núú-güedi, te ní ngúita nchicú<sup>n</sup> ñáhá-güedi xii-dé chi ní nucúhu<sup>n</sup> ndudú ñáhá-güedi. <sup>5</sup> Te ñà túú chinchícú<sup>n</sup>-güedi ì<sup>n</sup> téé tàtú, chi núcúhu<sup>n</sup> ndudú-güedi sá ñà díú xítóhó-güedi cùu-dé, núu xǎ<sup>n</sup> xínú-güedi núú-dě —cächí-gá xáha<sup>n</sup>-gǎ xii-güedé.



6 Duha ní cáhá<sup>n</sup> Jèsús cuendá sá cuení-gá dacuàhá-yu tnúhu-gá ní cùu, dico ñá ní tècú tnùnì-yu nása ndùu tnúhu ní cáhá<sup>n</sup>-gá.

*Jèsús cúú-gǎ dàtná ì<sup>n</sup> toli*

7 Te ní xáha<sup>n</sup> tùcu Jesús xii-güedé:

—Na càchí tnúhu ndáá-í xii-ndo sǎ yúhú cúu-í dàtná ì<sup>n</sup> yèhe currálí núú ndìhu cue mbéé.

8 Te nchaa cue téé sa yòdo nuu-gá ní quixi ní dándàhú-güedé ñáyiù cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùnì iní-güedi sá ñà díú xítóhó-güedi cùu-güedé. 9 Te yúhú cúu-í dàtná yuyèhe currálí cue mbéé. Te duca<sup>n</sup> sǎtnahá-xi cùu-í chi nchaa ñáyiù na tùha ñaha xii-í te naníhí tàhú-yu. Te cùú-yu dàtná cue mbéé quiti xíquee cùrrálí-xi cuáhá<sup>n</sup>-güedi núú cáá ité caxi-güedi, te dàtnùnì cuándihu-ná-güedi cùrrálí, duca<sup>n</sup> sǎtnahá-xi cùú-yu.

10 'Ñádúhú òré véxi-dé chi dùhu-dé, sàhni-dé te dànaa-dé mbéé, dico yúhú chi véxi-í cuendá sá nánihí tàhú-ndó te ío cudí iní-ndó cùnu cuechi-ndo núú Dütú Ndiõxí ñi caa ñi quíhí<sup>n</sup>. 11 Te yúhú cúu-í dàtná ì<sup>n</sup> toli téé ío nèhe cuendá mbéé-xi, chi téé-á<sup>n</sup> cuèi na cùú-dé sá cúú-xí mbéé-dé cuendá-nǎ sá ná cǎcu-güedi. 12 Te núu ì<sup>n</sup> téé na còto ñaha xii-güedi, te téé-á<sup>n</sup> cuendá-ni sá ñúhú yǎhu-dé xító-dě-güedi. Te núu na quíní-dé sáá ì<sup>n</sup> quiti déé<sup>n</sup> te dàña-dé-güedi xínu-dé, te ndìhi-güedi xité nuu ñaha quiti déé<sup>n</sup>-ǎ<sup>n</sup>, chi ñá díú mèi xítóhó-güedi cùu-dé. 13 Chi cuendá-ni sá ñúhú yǎhu-dé xító-dě-güedi núu ñá túú nǎ ndìhú iní-dé cuèi na dàndìhi ñaha quiti cuihna. 14 Te yúhú

cùu-í dàtná ì<sup>n</sup> tée ío váha xìto mbéé-xi, chi tée-án da ì<sup>n</sup> da ì<sup>n</sup>-dì xìní-í-dé nàcuáa ndăa-dì, te duca<sup>n</sup> xìní ñáhá-güèdì xii-dé. Te duca<sup>n</sup> sãtnahá-xi cùu yúhú ndìhì nchaa ñáyiu sàndáá iní ñáhá xì-í, chi yúhú xìní-í-yu te duca<sup>n</sup> mée-yu xìní ñáhă-yu xii-í.

15 'Te ðiu-ni duca<sup>n</sup> cùu-í ndìhì Tătà-í, chi xìní ñáhá-gă xii-í te xìní-í-gá. Te sáá nduu cùu-í cuendá nchaa ñáyiu sàndáá iní ñáhá xì-í. 16 Te ndècu-gá ñáyiu vátá quìndáá iní ñáhá-gă xii-í. Te xìni ñuhu-xi cundedóho-yu tnúhu-í te quìndáá iní ñáhă-yu cuendá ì<sup>n</sup>-nă ichi cuú-yu, te duca<sup>n</sup> cùndecu ì<sup>n</sup>-ná tée coto ñaha xì-yu cuu-dé dàtná ì<sup>n</sup> tòlí-yu, te tée coto ñaha xì-yu-án cúú yúhú.

17 'Te Tătà-í ío cùdí iní ñáhá-gă xii-í cuendá sá sáá ì<sup>n</sup> nduu te cuú-í, te cuú-í chi duca<sup>n</sup> càchí iní-í, te ñá díú sã cúú iní ñáyiu ñuyíú-a cuú-í, te cuú-í dico ndoto-í. 18 Te vá yôo ì<sup>n</sup> te ndacu cahni ñaha xì-í, te núu ñá díú sã cúú iní mée-í cuú-í. Te dàtná-ni cùu iní-í sá cùú-í te ðiu-ni duca<sup>n</sup> ndòto-í chi duca<sup>n</sup> ñí cachí Tătà-í Dútú Ndióxi cunduu — càchí-gá xáha<sup>n</sup>-gă xii-güedé.

19 Te sá dúcá<sup>n</sup> ñí cáhá<sup>n</sup>-gá te ñá ní cùu ì<sup>n</sup>nuu tucu ñáyiu isràél. 20 Te davá-yu ní xítñahá-yu:

—¿Ná cuendá sàndáá-tu iní-ndó tnúhu càhá<sup>n</sup> tée-ă<sup>n</sup>, te yucu ñávăha ndècu ndìhì-dé, lúcú tée-ă<sup>n</sup>? —càchí-yu xítñahá-yu.

21 Te davá-yu ní xítñahá-yu:

—¿Náa xìní-ndó ì<sup>n</sup> tée ndècu ndìhì yucu ñávăha duha váha càhá<sup>n</sup>-dé? ¿Náa xìní-ndó núu ndàcu yucu ñávăha cađa tátna-xi núu ì<sup>n</sup> tée cuáá te ndúha? —càchí-yu xítñahá-yu.

*Ñáyiu isràél dáquèe tíhŭ-yu Jèsús*

22 Te ndi tnahá cuía ndádá càhnú-yu vico veñúhu càhnu sá ïo cùnuu ñuú Jerusalén, te mei yóo quidé v̄xi<sup>n</sup>-xi quidé-yu vico-á<sup>n</sup>. 23 Te corrèdór veñúhu-á<sup>n</sup> nání-xí Sàlomón, te xíá<sup>n</sup> xícá cùu Jesús. 24 Te ní chítú níhnú ñáyu isràél núú-gă, te ní xáhă<sup>n</sup>-yu:

—¿Ná ndéé òré cachí tnúhu ndáá-n, te núu sá Crístú Yaá ní tendaha Yă Ndiõxí véxi ñuyíú-a cùu-n, àdi ná téé cùu-n?, cáhá<sup>n</sup>-ni-n —càchí-yu xáhă<sup>n</sup>-yu xii-gá.

25 Te ní xáha<sup>n</sup> Jèsús:

—Sa ní cachí tnúhu-í te ñă sàndáá iní-ndó, te ndèhe-ndo sá vái nùú să quidè-í sá ñi táuchíú<sup>n</sup> Tătà-í cada-í, te cùu-xi ñ<sup>n</sup> sá cútnùní iní-ndó ñă téé cùu-í. 26 Dico nchòhó ñă sàndáá iní-ndó, chi ñă túú cùu-ndo ñáyu ní chitnahá ñáhá xì-í. 27 Chi nchaa ñáyu ní chitnahá ñáhá xì-í cùú-yu dàtná cue mbéé quitì x̄ndecu ndihì xítohó-xi chi nùcúhu<sup>n</sup> ndudú-güedi xítohó-güedi, te duca<sup>n</sup> nàquiní ñáhá-ní xítohó-güedi xii-güedi. Duca<sup>n</sup> sãtnahá-xi cùu nchaa ñáyu ní chitnahá ñáhá xì-í. 28 Te yúhú cada-í te nduu táhũ-yu cundecu ndihì ñàhá-yu xii-í ni caa ni quíhí<sup>n</sup> te vá ñ<sup>n</sup> ndùu-gá cuíta nihnú-yu, te ni vă yóo ñ<sup>n</sup> ndacu naquendéé ñáhá xii-yu ndaha-í. 29 Chi Tătà-í ní taxi cuendá ñáhá-gă xii-yu. Te ío cùnuu-gá nũu xíá<sup>n</sup> vá yóo ñ<sup>n</sup> ndacu naquendéé ñáhá xii-yu ndaha-gá. 30 Yúhú ndihì Tătà-í Dútú Ndiõxí ñ<sup>n</sup>-ni cùu-ndí —càchí-gá xáha<sup>n</sup>-gă xii-yu.

31 Te ní quehe<sup>n</sup> tucu ñáyu isràél yúú cuăha ñàhá-yu xii-gá ní cùu.

32 Te ní xáha<sup>n</sup>-gă xii-yu:

—Ío cuéhé să văha ní quide-í núú-ndó ñi chindee ñàha Tătà-í Dútú Ndiõxí. ¿Te ndèdacàa sá ñă tnahá

iní-ndó nõu cuení-ndó cuãha ñaha-ndo yúú xii-í-i?  
—càchí-gá xáha<sup>n</sup>-gã xií-yu.

<sup>33</sup> Te ní xáha<sup>n</sup> ñãyiu isràél:

—Ñá díú cuèndá nchaa sá vãha ni quide-n  
cuiní-ndí cuáha ñaha-ndí yúú xii-n, chi ì<sup>n</sup> dì-ni sá  
ío càhá<sup>n</sup> úhú-n cuèndá Yã Ndiõxí. Te dicó ì<sup>n</sup> tée  
ñuyíú-a cùu-n te càchí-n sá cùú-n Ndiõxí—càchí-yu  
xãhã<sup>n</sup>-yu xii-gá.

<sup>34</sup> Te ní xáha<sup>n</sup> Jèsús:

—Núú tütú Yã Ndiõxí sá ndécú ndìhì-ndo  
cáhá<sup>n</sup>-xi nàcuáa ní cáhá<sup>n</sup>-gá, te duha ní cachí-gá:  
“Nchòhó quidé-ndó nõù-í”, duha ní cachí-gá.  
<sup>35</sup> Te nàha-o sá vã cùú quèhndé nihnu-o tnũhu yòdo  
tnuní núú tütú Yã Ndiõxí, chi mee-gã ní cachí-gá sá  
cádã-yu núú-gã, te vá càchí-ó sã ñã ndáa. <sup>36</sup> Te núu  
duca<sup>n</sup> ñí cáhá<sup>n</sup>-gá sá nõú-gã quidé nchaa ñáyiu ní  
sándáá iní ñáhá xii-gá ñá, ¿te ná cuèndá cúdèé<sup>n</sup>-ndó  
nũú yũhú sá càchí-í sá cùú-í Déhe-gá? Te mee Yã  
Ndiõxí ní tendaha ñàha-gá xii-í véxi-í ñuyíú-a sá  
cádà-í chiu<sup>n</sup>-gá. <sup>37</sup> Te núu ñá túú quide-í nàcuáa  
ní táuchíú<sup>n</sup> Tãtà-í cada-í ñá, te vá quindáá iní  
ñáhá-ndó. <sup>38</sup> Te núu quide-í ñá, te cuèi vá quindáá  
iní ñáhá-ndó xii mee-í dico quindáá iní-ndó nchaa  
chiu<sup>n</sup> quide-í. Duca<sup>n</sup> te cutnùnì ndáá iní-ndó sã  
Yã Ndiõxí ndécú ndìhì-í te ì<sup>n</sup>-ni cùu-ndí—càchí-gá  
xáha<sup>n</sup>-gã xií-yu.

<sup>39</sup> Te ní cuiní-güedé tnì ñaha tucu-güedé xii-gá  
quíhí<sup>n</sup>-gá vecaá ní cùu, dico ní xinu núú ñáhá-gã  
xii-güedé.

<sup>40</sup> Te ní xica-gá cuáhá<sup>n</sup>-gá ndàa ìngá xio yúte  
Jòrdán núú ñí xóo dacuàndute ndí Juàá ñáyiu ndéé

díhna, yàcá<sup>n</sup> ní xíndecu-gá. <sup>41</sup> Te yàcá<sup>n</sup> ío vai ñáyiú ní sáhá<sup>n</sup> ní cáhá<sup>n</sup> ndíhi ñaha xii-gá, te ní xitnàhá-yu:

—Ndíi Juàá, cuèi ñá túú ní quide ndíi sá và yõo tnàhí ndàcu cada dico ndáá ní cáhá<sup>n</sup> ndíi, chi dàtná-ni ní cáhá<sup>n</sup> ndíi quide téa-a —càchí-yu xitnàhá-yu.

<sup>42</sup> Te yàcá<sup>n</sup> ío vai-yu ní sándáá iní ñáhă-yu xii-gá.

## 11

### *Ní xíhí té Lăzarú*

<sup>1</sup> Nnú Bètaniá ní xíndecu ì<sup>n</sup> té ní xínani-dě Lăzarú. Te càhú víhí ñí tnahá-dé ní cùhú-dé, te ní xíndecu ndíhi-dé cue cúha-dé tá Màriá ndíhi tá Mărta chi xía<sup>n</sup> ñúú-yu. <sup>2</sup> Te tá Màriá-á<sup>n</sup> cúú-xí xíchí ñí sódó àcití sáhá<sup>n</sup> tnámí sáhá Jèsús, te ní nadayìchí-xi sáhá-gă ndíhi idi díquí-xi. Te cuendá sá cùhú cúha-yu té Lăzarú, <sup>3</sup> núú ní tendàhá-yu ñáyiú nàha tnúhu cuáhá<sup>n</sup> núú Jèsús, te xăhă<sup>n</sup>-yu xii-gá:

—Mèstrú, téa ío cùu iní-n ìo càhú tnàhá-dé cùhú-dé —càchí-yu xăhă<sup>n</sup>-yu xii-gá.

<sup>4</sup> Te sá dúcá<sup>n</sup> càa tnúhu ní sáá, núú ní xáha<sup>n</sup> Jèsús xii-yu:

—Dico cuéhé-ă<sup>n</sup> chi vá cùú-dé sá cùú dúcá<sup>n</sup>-dě, chi Yá Ndiõxí cuèní-gá sá quèní-yu nchaa sá cádá-gă cuendá chiñuhu ñáhă-yu xii-gá, te ñiu-ni duca<sup>n</sup> chiñuhu ñáhă-yu xii yúhú Déhe-gá —càchí-gá xáha<sup>n</sup>-gă xii-yu.

<sup>5</sup> Te cuèi ío cùu iní ñáhă Jèsús xii té Lăzarú ndíhi cue cúha-dé <sup>6</sup> dico òré ní níhí-gă tnúhu, te ní cuyaa-gă úú-gá nduu núú ndécú-gă. <sup>7</sup> Te ní xáha<sup>n</sup>-gă xii cue téa xica cuu ndíhi-gá:

—Na quèhí<sup>n</sup> tucu-o ñìstrítú Jùdeá —càchí-gá xáha<sup>n</sup>-gă xii-güedé.

8 Te ní xáha<sup>n</sup> cuè téé xìca cuu ndìhi-gá xii-gá:

—Mèstrú, vitna-ni cuení cue téé isràèl xĩndecu yàcá<sup>n</sup> cuáha ñaha-güedë xii-n yúú ní cùu, ¿te cuení-ni tucu-n quíhí<sup>n</sup>-n-ú? —càchí-güedé xáha<sup>n</sup>-güedë xii-gá.

9 Te ní xáha<sup>n</sup> Jèsús:

—Úxúú òré cúú ì<sup>n</sup> nduu, te núu nduu na càca cuu-o, te ñá túú ñá candaundeé-ó chi cùtnuní núú-ó chi dító. 10 Dico núu niú ná càca cuu-o, te ío ná candaundeé-ó chi vá cùtnuní núú-ó —càchí-gá xáha<sup>n</sup>-gá xii-güedé.

11 Te ní xáha<sup>n</sup> Jèsús:

—Té Lăzarú téé ío váha tnàhá tnúhu ndìhi-o ñí xídí-dé dico quíhí<sup>n</sup>-ó chi ndocani-o-dë —càchí-gá xáha<sup>n</sup>-gá xii-güedé.

12 Te ní xáha<sup>n</sup>-güedë xii-gá:

—Mèstrú, te núu xídí-dé te váa sa ta ndúha-dé cuáhá<sup>n</sup> —càchí-güedé xáha<sup>n</sup>-güedë xii-gá.

13 Duha ní cáhá<sup>n</sup> Jèsús, chi té Lăzarú sa ní xíhí-dé te cue téé xìca cuu ndìhi-gá ní sani iní-güedé sá ñí xídí ndisa-dé. 14 Te Jèsús ní xáha<sup>n</sup> ndáá-gá xii-güedé:

—Sa ní xíhí té Lăzarú. 15 Váha-gá sá ñá ní sáhá<sup>n</sup>-í quíngoto-í-dé, chi ndècu ingá chiú<sup>n</sup> cada-í quiní-ndó, te quíndáá iní ñáhá-gá-ndó xii-í, te vitna na quíhí<sup>n</sup>-ó núú ndécú yìqui cuñú ndíi —càchí-gá xáha<sup>n</sup>-gá xii-güedé.

16 Te té Măxí téé xáha<sup>n</sup>-güedë cuáchí ní xáha<sup>n</sup>-dë xii dava-gá-güedé:

—Na quíhí<sup>n</sup>-ó nchàa-o chi yàcá<sup>n</sup> cuú-ó ndìhi-dé —càchí-dé xáha<sup>n</sup>-dë xii-güedé.

*Jèsús càhá<sup>n</sup>-gá sá cuěi na cùú ñáyiu dico ndotó-yu cundecú-yu ndihí-gá*

17 Te òré ní sáá Jèsús ñuú Bètaniá, te ní xáhă<sup>n</sup>-yu sá sà ní cuu cúmí nduu ní xíhí té Lăzarú. 18 Te ñuú-á<sup>n</sup> cáá yàtni-ni-gá ñuú Jerusàlén, dàtná cuádava-ná òré cuhu<sup>n</sup>-o ìchi te saá-ó. 19 Núu xǎ<sup>n</sup> vài ñáyiu isràél ní sáhá<sup>n</sup>-yu ní cáhá<sup>n</sup> ndihí-yu tá Mărta ndihí cùhú-xi tá Măriá, te ní sáñahá-yu tnúhu ndee ìní sá dúcá<sup>n</sup> nǐ xíhí cúha-yu. 20 Te ní níhí tă Mărta tnúhu sá ñúhú Jèsús ichi cuáhá<sup>n</sup>-gá núú ndécŭ-yu núu ní sáhá<sup>n</sup>-xi ní sátnahá-xi-gá, te cùhú-xi tá Măriá ní ndóo-xi vehe. 21 Te òré ní naníhí tă Mărta Jèsús, te ní xáha<sup>n</sup>-xi xii-gá:

—Mèstrú, te núu dìcó ní xǎndecu-n ìha te vá cùú cúha-ndí ní cùú. 22 Te cuěi vitna te núu ná sá ná càcá<sup>n</sup>-n nŭú Yă Ndiǒxí te taxi-gá xii-n —càchí-xi xăha<sup>n</sup>-xi xii-gá.

23 Te ní xáha<sup>n</sup> Jèsús:

—Vá ndihú ìní-n chi ndoto cúha-n —càchí-gá xáha<sup>n</sup>-gă xii-xi.

24 Te ní xáha<sup>n</sup> tă Mărta:

—Ndáá chi sa xìní-í sá ndótó-dě ná quǎtnahá nduu ndòto nchaa ñáyiu ní xíhí —càchí-xi xăha<sup>n</sup>-xi xii-gá.

25 Te ní xáha<sup>n</sup> Jèsús:

—Yúhú dandòto-í-yu cuèndá cundecú-yu ni caa ni quíhí<sup>n</sup> ná sàá nduu. Te nchaa ñáyiu na quíndáá ìní ñáhá xii-í, te cuěi na cùú-yu dico ndotó-yu cundecu-í ndihí-yu ni caa ni quíhí<sup>n</sup>. 26 Te nchaa ñáyiu ndècu vívú ñuyíú-a te núu na quíndáá ìní ñáhă-yu xii-í, te cundecu ndihí-í-yu ni caa ni quíhí<sup>n</sup>.

¿Sàndáá iní-n tnũhu-a ñă? —càchí-gá xáha<sup>n</sup>-gă xii tá Mărta.

<sup>27</sup> Te xăha<sup>n</sup>-xi:

—Mèstrú, sàndáá iní-í, te sàndáá tucu iní-í sá díú-n cùu-n Cristú Déhe Yá Ndiõxí, Yaá ní tendaha-gă véxi ñuyíú-a —càchí-xi xăha<sup>n</sup>-xi xii-gá.

*Jèsús ndàhí-gá núú nĩ nguĩndũxi té Lăzarú*

<sup>28</sup> Sátá dúcá<sup>n</sup> nĩ cáhá<sup>n</sup>-xi te ní sáhá<sup>n</sup> ngana-xi cùhú-xi tá Măriá, te dayuhu nĩ xáha<sup>n</sup>-xi:

—Yácá<sup>n</sup> ní quexì Mèstrú, te càna ñaha-dé xii-n —càchí-xi xăha<sup>n</sup>-xi.

<sup>29</sup> Te sá dúcá<sup>n</sup> xăha<sup>n</sup> cùhú tă Măriá sá cáná ñaha Jesús xii-xi, núu ndĩhi-ni ní xica-xi cuáhá<sup>n</sup>-xi núú ndécú-gă. <sup>30</sup> Te Jèsús vátá quĩhu-gá xití ñuú, chi ndècu-ni-gá núú nĩ sáhá<sup>n</sup> tnahá ñáhá tă Mărta.

<sup>31</sup> Te ñáyiu isràél ndécú sãñaha tnũhu ndee iní xii tá Măriá ndĩhi cùhú-xi ní sani iní-yu sá cuáhá<sup>n</sup>-xi núú yĩndũxi cúha-xi ndáhyú-xi ní cáhá<sup>n</sup>-yu, núu nchìcú<sup>n</sup>-yu-xi cuáhá<sup>n</sup>.

<sup>32</sup> Te ní sáá tá Măriá núú ndécú Jèsús te ní nguĩñí xítí-xí nũú-gă, te xăha<sup>n</sup>-xi xii-gá:

—Mèstrú, te núu dìcò ní xĩndecu-n ìha te vá cùú cúha-ndí ní cùu —cachí-xi xăha<sup>n</sup>-xi xii-gá.

<sup>33</sup> Te sá nĩ xiní Jèsús ndàhyú tá Măriá ndĩhi ñáyiu isràél nchìcú<sup>n</sup> ñáhá cuáhá<sup>n</sup>, xĩ<sup>n</sup> ío ní cuyica ìní-gá.

<sup>34</sup> Te ní xáha<sup>n</sup>-gă xií-yu:

—¿Ndèé ní taxi ndecu-ndo yìqui cuñú-dé-i? —càchí-gá xáha<sup>n</sup>-gă xií-yu.

Te ní xáhă<sup>n</sup>-yu:

—Mèstrú, néhé ná quĩhí<sup>n</sup>-ó te quiní-n —càchí-yu xáhă<sup>n</sup>-yu xii-gá.



<sup>35</sup> Te ní ndáhyú-gá tñàhá-gá. <sup>36</sup> Te ní xítñàha ñáyiú isràél:

—Súúní cùu iní-dé ndíi ní cùu —cachí-yu xítñàhá-yu.

<sup>37</sup> Te davá-yu xítñàhá-yu:

—Tée-a ní quide tátna-dé núú tée cuàá te ní ndúha. ¿Te nása ní cuu núu ñá túú ní quide tátna-dé té Lázará cuendá sá vǎ cùú-dé ní cùu-í? —cachí-yu xítñàhá-yu.

### *Jèsús dándòto-gá té Lázará*

<sup>38</sup> Te ío ní cuyica tùcu iní Jèsús òré ní quexìo-gá yuhu yàú núú ñí chihi-güedé yìqui cùñú té Lázará. Te yuhu yàú-á<sup>n</sup> ndèdí ì<sup>n</sup> yúú. <sup>39</sup> Te ní xáha<sup>n</sup> Jèsús xii-yu:

—Chí xócàni yúú-ǎ<sup>n</sup> —càchí-gá xáha<sup>n</sup>-gǎ xii-yu.

Te ní xáha<sup>n</sup> tǎ Mǎrta cúha tée ní xihí-á<sup>n</sup>:

—Mèstrú, sa tucu sàhá<sup>n</sup>-dé chí sa ní cuu cùmí nduu sá ñí xihí-dé —càchí-xi xáha<sup>n</sup>-xi xii-gá.

<sup>40</sup> Te ní xáha<sup>n</sup> Jèsús:

—¿Náa ñá díú ñí cachí-í sá nǔu na quíndáá iní-n, te quíní-n sǎ ïo càhnu cuu Yá Ndiǒxí? —càchí-gá xáha<sup>n</sup>-gǎ xii-xi.

<sup>41</sup> Te ní xócání-yu yúú ndèdí yuhu yàú-á<sup>n</sup>. Te ní ndacoto-gá andíu, te ní xáha<sup>n</sup>-gǎ xii Tǎtá-gǎ Dútú Ndiǒxí:

—Táu, ndàcá<sup>n</sup> táhù-í núú-n sǎ ñí tédoho-n tnúhu ní cáhá<sup>n</sup>-í. <sup>42</sup> Te yúhú sa nàha-í sá ncháá-ni òré ndèdóho ñaha-n xii-í, dico duha càhá<sup>n</sup>-í cuendá sá ná tècú dóho nchaa ñáyiú ndècu iha cuendá quíndáá iní-yu sá díú-n ñí tendaha ñàha-n xii-í véxi-í ñuyíú-a —càchí-gá xáha<sup>n</sup>-gǎ xii Dútú Ndiǒxí.

<sup>43</sup> Te sátá dúcá<sup>n</sup> ñí cáhá<sup>n</sup>-gá ndihì Yá Ndiöxí, te níhi ní cáhá<sup>n</sup>-gá xáha<sup>n</sup>-gǎ xii téé ní xíhí-á<sup>n</sup>:

—¡Lázaru, tandèe xía<sup>n</sup>! —càchí-gá xáha<sup>n</sup>-gǎ xii-dé.

<sup>44</sup> Te ní ndee téé ní xíhí-á<sup>n</sup> yaú-á<sup>n</sup>, te ndùtu dóó cuíñí ndàha-dé ndihì sáhá-dě, te dǎhu tucu ñ<sup>n</sup> dóó nǔú-dě. Te ní xáha<sup>n</sup> Jèsús xií-yu:

—Chí nándàxi-dé te dañà-ndo-dě ná cáca-dě —càchí-gá xáha<sup>n</sup>-gǎ xii-yu.

*Ndùcu-güedé nàcuáa cada-güedé cahni-güedé Jèsús*

*(Mt. 26:1-5; Mr. 14:1-2; Lc. 22:1-2)*

<sup>45</sup> Te nchaa ñáyiu nchìcú<sup>n</sup> ñáhá xii tá Màriá cuáhá<sup>n</sup> ío vài-yu ní sándáá iní-yu Jèsús sá ñí xiní-yu nàcuáa ní quide-gá. <sup>46</sup> Dico davá-yu ní sáhá<sup>n</sup>-yu núú cuè téé cùu fariséú, te ní caní-yu cuèndú núú-güedé nàcuáa ní quide Jèsús. <sup>47</sup> Te cue téé cùu fariséú ndihì cue dútú cúnùu ní natacá-güedé ní xóo-güedé jùndá, te ní xítnàha-güedé:

—¿Nása cada-o?, chi téé-ǎ<sup>n</sup> ío vài sá vǎ yǎo tnahí ndàcu cada quide-dé. <sup>48</sup> Te núu na dàña ío te nchaa ñáyiu quíndáá iní ñáhǎ-yu xii-dé, te quixi cue téé ñúú Rómá dangòyo-güedé veñúhu-o te danàa-güedé nchaa ñúú-ó —càchí-güedé xítnàha-güedé.

<sup>49</sup> Te ñ<sup>n</sup> cue téé-á<sup>n</sup> nání-dě Caifás, te cùnùu-gá-dé núú dàva-gá cue dútú cuíá-ǎ<sup>n</sup>, te ní xáha<sup>n</sup>-dě xii-güedé:

—Nchòhó ni lùha ñá túú cùtnuní iní-ndó. <sup>50</sup> Te ni ñǎ sàha-ndo cuèndá sá vǎha-gá tnahá-ó, te núu na cùú ñ<sup>n</sup>-ni téé cuèndá nchaa ñáyiu isràél, te ñá díú sǎ dánàa ñaha-güedé xií-yu —càchí-dé xáha<sup>n</sup>-dě xii-güedé.

<sup>51</sup> Dico té Caifás chi ñá díú sǎ cúú ìní mée-dě ní cǎhá<sup>n</sup>-dé, chi cuendá sá cuíá-ǎ<sup>n</sup> ñí cunuu-dě núú cuè dúú, núú xiǎ<sup>n</sup> Yǎ Ndiǒxí ní dácáhú ìní ñáhá-gǎ nàcuáa cáhá<sup>n</sup>-dé sá Jèsús cuú-gá sá cúú-xí nchaa ñáyiú isràél. <sup>52</sup> Te ñá díú cuendá mee-ni ñáyiú-á<sup>n</sup> cuú-gá, chi cuú-gá tnahá cuendá nchaa ñáyiú ní sándáá ìní ñáhá xii-gá, ñáyiú nchiténuu ñihí ñuyú, te ñí-nǎ cuú-yu ndihí-gá. <sup>53</sup> Núú ndéé nduu-ǎ<sup>n</sup> ñí ndatnúhu cue té cùnuu núú ñáyiú isràél nàcuáa cada-güedé cahni-güedé Jèsús.

<sup>54</sup> Te xiǎ<sup>n</sup> núú ñá ní xica cuu-gá Jèsús quini ñáhá ñáyiú isràél, te ní quee-gá cuáhá<sup>n</sup>-gá ñuú Efràín, ñí ñuú cáá yàtni yucu, yacá<sup>n</sup> ní ngüíñi-gá ndihí cue té xica cuu ndihí-gá.

<sup>55</sup> Te ta cùyatni nduu cadá-yu vico pascuá. Te cuéhé ñáyiú ní queé-yu ñuú-yu cuáhá<sup>n</sup>-yu ñuú Jerusàlén cuendá sá sà ndihí-yu nchaá-yu nduu íí, te tnahá nduu vico pascuá. <sup>56</sup> Te yacá<sup>n</sup> nándúcú-yu Jèsús ní cùu te ñá túú-gǎ òré-á<sup>n</sup>, te ní naníhí tnahǎ-yu xití veñúhu, te xitnahá-yu:

—¿Nása sàni ìní-ndó-í? ¿Quixi Jèsús vico ǎ<sup>n</sup> ñáhá?  
—càchí-yu xitnahá-yu.

<sup>57</sup> Te cue té cùu fariséú ndihí cue dúú cùnùu sa ní xáha<sup>n</sup>-güedé xii ñáyiú sá núú ndéda-ni càá-yu xini-yu núú ndécú Jèsús te na càhá<sup>n</sup>-ni-yu cuendá tñi ñaha-güedé xii-gá.

## 12

*Í<sup>n</sup> ñadìhí chíhí-á<sup>n</sup> Jèsús acití  
(Mt. 26:6-13; Mr. 14:3-9)*

<sup>1</sup> Íñú-gá nduu cùmání tnahá vico pascuá, te ní sáhá<sup>n</sup> Jèsús ñuú Bètaniá, ñuú té Lǎzarú té ní

dándótó-gă. <sup>2</sup> Te xía<sup>n</sup> nǐ cadúha-yu sá nǐ cudìni Jesús. Te tá Màrta ní sani-xi cóhó, te té Lăzarú yíhí-dě mèsá ndihì Jèsús, ndihì dava-gá-güedé xéxí-güedě. <sup>3</sup> Te tá Màriá néhé-xí cuădava lǐtrú acítì sàhá<sup>n</sup> tnámí sǎ ïo ndèyáhu, te acítì-á<sup>n</sup> nǐ cuáha mee-ni yücú nărdú, te ní sódó-xi sáhá Jèsús, te ní nadayìchí-xi ndihì idi díquí-xi sáhá-gă. Te nihìl xitì vehe ní xíté nuu dicó acítì-á<sup>n</sup>. <sup>4</sup> Te té Jùdás déhe té Xímú Iscarioté ñu-ni ï<sup>n</sup> tée xìca cuu ndihì-gá, tée cuáha cuendá ñáhá xì-gá núú cuè tée cùu úhú iní ñáhá nǐ xáha<sup>n</sup>-dě xii-gá:

<sup>5</sup> —¿Ná cuendá ñá ní cùyáhu acítì-a sá ùní ciendú díhú<sup>n</sup> denàriú cuu cuendá ñáyiu ndàhú? —càchí-dé xăha<sup>n</sup>-dě xii-gá.

<sup>6</sup> Dico sá dúcá<sup>n</sup> nǐ cáhá<sup>n</sup> té Jùdás chi ñá díú sǎ ndísá ñùhu iní-dé ñáyiu ndàhú chi dìcò-ni ï<sup>n</sup> ñádúhú cúú-dě, chi ñu-dé néhé cuendá-dé díhú<sup>n</sup>-güedě nchaa-güedé te ní xóo duhu ñàha-dé xii-güedé. <sup>7</sup> Te ní xáha<sup>n</sup> Jèsús:

—Daña, vá dásatú-n iní xíchí-a na tàxúha nahi-xi àcítì-a, chi nàndihì ndéé òré ná nguñdǔxi-í. <sup>8</sup> Chi nchòhó chi cuhu<sup>n</sup> tnahá-ni ñáyiu ndàhú tnuú-ndó, dico yúhú chi vá ncháá ndùu cundecu ndihì ñaha-í xii-ndo —càchí-gá xáha<sup>n</sup>-gă xii-dé.

*Tnàhá té Lăzarú cuiní-güedé cahni ñaha-güedě xii-dé*

<sup>9</sup> Te vài ñáyiu isràél ní níhǐ-yu tnúhu sá ndécú Jèsús ñuú Bètaniá. Te ní sáhá<sup>n</sup>-yu cuendá quiní-yu-gá, te quiní-yu tnàhá té Lăzarú tée ní dándótó-gă. <sup>10</sup> Te cue dútú cúnùu ní ndatnúhu-güedé ní cuu ï<sup>n</sup>nuu-güedě cuendá sá cáhni-güedě tnàhá té Lăzarú ní cùu, <sup>11</sup> chi ñu

cuendá téé-á<sup>n</sup> ñí cuu cuéhé ñăyiu isràél tá dàña nihnú-yu-güedé cuáhá<sup>n</sup> cuendá sá ñí sándáá iní-yu Jèsús.

*Jèsús cuánguihu-gá ñúú Jerusàlén*

*(Mt. 21:1-11; Mr. 11:1-11; Lc. 19:28-40)*

<sup>12</sup> Te nduu tnéé-á<sup>n</sup> vài ñáyiu ní quexìo ñúú Jerusàlén cuendá cundecú-yu vico, te ní níhí-yu tnúhu sá Jèsús sáá-gá tnàhá-gá cundecu-gá vico-á<sup>n</sup>,  
<sup>13</sup> núu ní xehndé-yu ndaha yùtnu ñúú, te nèhé-yu ní sáhá<sup>n</sup> ní sátnahá ñáhă-yu xii-gá. Te níhi ní cáhá<sup>n</sup>-yu, te càchí-yu:

—jío càhnu cuu Yá Ndiöxí! Te duca<sup>n</sup>-ni ño càhnu cuu Yaá ní tendaha-gă véxi quindaha ñàha xii-o — duha ní cachí-yu.

<sup>14</sup> Te Jèsús ní níhí-gă ñ<sup>n</sup> bürü, te yòdo-gá-di cuáhá<sup>n</sup>. Te duca<sup>n</sup> ñí cuu chi ní quee ndáá-xi nàcuáa càhá<sup>n</sup>-xi núu tùtú Yă Ndiöxí núu càchí-xi:

<sup>15</sup> Vá yùhú nchòhó cue ñáyiu ndècu ñúú Sìón,

chi iha véxi téé yindaha ñaha xii-ndo yodo-dé ñ<sup>n</sup> bürü.

Duha càchí-xi núu tùtú-gá. <sup>16</sup> Dico cue téé xìca cuu ndihí Jesús ñá ní ndàcu iní-güedé nàcuáa càhá<sup>n</sup>-xi núu tùtú Yă Ndiöxí nàcuáa cada Jèsús. Dico sátá cuãndaa-gá andiü càda cahnu ñaha Tátá-gă xii-gá, te ní ndacu iní-güedé sá dúcá<sup>n</sup> yòdo tnuní nàcuáa cada-gá, te duca<sup>n</sup> ñí cuu.

<sup>17</sup> Nchaa ñáyiu ní xíndecu ndihí Jèsús òré ní dándótó-gă té Lăzarú, ya yàcá<sup>n</sup> ní caní-yu cuendú núu ñáyiu nàcuáa ní quide ñaha-gă xii-dé. <sup>18</sup> Te vài-yu ní sáhá<sup>n</sup>-yu núu ndécú Jèsús cuendá sá ñí níhí-yu tnúhu ní quide-gá sá vă yòo tnàhí ndàcu cada. <sup>19</sup> Te cue téé cùu fariséú ní xítnàha-güedé:

—Ní xito-ndo nã ñá túú nàndìhi sá quidé-ó-vá, chi nchaa ñáyiú ní chinchícú<sup>n</sup> ñáhă-yu xii-dé — cächí-güedé xitnàha-güedé.

*Ñáyiú ñá túú cùu ñáyiú isràél nándücú-yu Jèsús*

<sup>20</sup> Te tnàhá ñáyiú ñá túú cùu ñáyiú isràél ní sáhá<sup>n</sup>-yu vico ñuú Jerusalén ní quide cahnú-yu Yá Ndiöxí. <sup>21</sup> Te ñáyiú-á<sup>n</sup> ñí sáhá<sup>n</sup>-yu núú tẽ Lìpé tée ñuú Bètsaidá, te ñuú-á<sup>n</sup> yíndèhu-xi distritú Galileá. Te ní xáhă<sup>n</sup>-yu xii-dé:

—Tátá, vá cündèe iní-n cächí tnúhu-n nũu ndèè ndécú Jèsús, chi cuñí-ndí cáhá<sup>n</sup> ndìhi-ndí-gá — cächí-yu xáhă<sup>n</sup>-yu xii-dé.

<sup>22</sup> Te té Lìpé ní naníhí-dě té Ndríxí te ní xáha<sup>n</sup>-dẽ nàcuáa cáhă<sup>n</sup>-yu, te ndì ndùú-güedé ní sáhá<sup>n</sup>-güedé ní xáha<sup>n</sup>-güedé xii Jèsús nàcuáa cáhă<sup>n</sup>-yu. <sup>23</sup> Te ní xáha<sup>n</sup> Jèsús xii-güedé:

—Vitna ní cuyatni òré cada cahnú ñaha Tátà-í xii-í, te quiní-yu sá ïo cahnú cuu yúhú Tée cùu ñaní tnáhă-yu nchaa-yu. <sup>24</sup> Te na cächí tnúhu ndáá-í xii-ndo sã nũu ì<sup>n</sup> tatá vá ngává-xí nũú ñúhú tẽhyú-xi ña, te ñuú-ni duca<sup>n</sup> cùnduu-xi cundecu-xi. Dico ì<sup>n</sup> tatá ná ngává nũú ñúhú xĩnu déhe-xi, te xiã<sup>n</sup> nádàcayá tnáhă-xí, te mee-xi tẽhyú-xi. <sup>25</sup> Te nchaa ñáyiú ío ñùhu iní-xi cundecu ñuyíú-a ñá túú ñùhu iní-yu Yá Ndiöxí, te ñáyiú-á<sup>n</sup> cuíta nihnú-yu. Te nchaa ñáyiú ío ñùhu iní ñáhă xii Yá Ndiöxí, ñáyiú-á<sup>n</sup> cundecú-yu ndìhi-gá ñi caa ñi quíhí<sup>n</sup>. <sup>26</sup> Te nchaa ñáyiú cuñí cunu cuechi nũú-í xini ñuhu-xi natuha ñahă-yu xii-í, te nduu táhũ-yu cundecú-yu núú nùhú-í cundecu-í. Te nchaa ñáyiú na cunu cuechi

nù-í, te cada càhnu ñaha Tàt-í xii-yu —càchí-gá xáha<sup>n</sup>-gã xii-güedé.

*Jèsús càhá<sup>n</sup>-gá sá cáhni ñaha-güedé xii-gá*

<sup>27</sup> Te ní xáha<sup>n</sup> tùcu-gá:

—Ío ndihú iní-í. Te cúñaha-ĩ xii Tàt-í taunihnu ñaha-gá nùu dícó sá cúú, dico vá cúú chi cuendá tñahí-a véxi-í —càchí-gá xáha<sup>n</sup>-gã xii-güedé.

<sup>28</sup> Te ní xáha<sup>n</sup>-gã xii Tàtá-gã Dútú Ndiöxí:

—Táu, cada nàcuáa ní sani iní-n cùnduu cuendá sá ná cádá càhnu ñaha ñáyiú xii-n —càchí-gá xáha<sup>n</sup>-gã.

Te duca<sup>n</sup> te ní tecú ní cáhá<sup>n</sup> Yă Ndiöxí ndéé andiú, te càchí-gá:

—Sa ní quide-í nàcuáa cachí ñáyiú sá ïo càhnu cuu-í. Te cada tucu-í cuendá cada càhnu ñaha-gá-yu xii-í —càchí Yă Ndiöxí xáha<sup>n</sup>-gã xii Déhe-gá.

<sup>29</sup> Te nchaa ñáyiú xĩndecu ní tecú dóho-yu ní cáhá<sup>n</sup>-gá, dico ñá túú ní sàni iní-yu sá méé-gã ní cáhá<sup>n</sup>, chi davá-yu ní xítñahá-yu sá ñũhu ní cáhá<sup>n</sup>, te davá-yu ní xítñahá-yu sá ì<sup>n</sup> espíritú xínú cuèchi núú Yă Ndiöxí ní cáhá<sup>n</sup>. <sup>30</sup> Te ní xáha<sup>n</sup> Jèsús xii-yu:

—Ñá díú cuendá yúhú ní cãhá<sup>n</sup> Yă Ndiöxí, chi ní cáhá<sup>n</sup>-gá cuendá sá nchòhó cundedóho-ndo. <sup>31</sup> Te vitna ní sáá nduu càda ndáá Yă Ndiöxí cuèchi nchaa ñáyiú ñuyíú-a, te duca<sup>n</sup> te vá cùnùu-gá yucu ñávãha. <sup>32</sup> Te na càta caa ñaha-güedé xii-í núú cùrúxí, te xía<sup>n</sup> cuú-í te níhí-yu tñuhu ni càa xico ñuyíú, te quindáá iní-yu tñuhu-í —càchí-gá xáha<sup>n</sup>-gã xii-yu.

<sup>33</sup> Duha ní cáhá<sup>n</sup>-gá cuendá cutnùní iní-yu nàcuáa ndoho-gá òré cuú-gá. <sup>34</sup> Te ní xáhá<sup>n</sup>-yu xii-gá:

—Nìhí-ndí tnúhu sá nũú tütú yódó tnùní tnúhu Yá Ndiõxí càhá<sup>n</sup>-xi sá Crìstú Yaá tendaha-gã quixi ñuyíú-a cundecu-gá ni caa ni quíhí<sup>n</sup>. ¿Te yòhó nása càhá<sup>n</sup>-tu-n sã ì<sup>n</sup> téé cùu ñaní tnáhá nchàa ñáyiú ñuyíú-a cahni ñaha-güedě núú cùrúxí? Te cachí tnúhu-n nã cúú tēe-á<sup>n</sup> —càchí-yu xãhã<sup>n</sup>-yu xii-gá.

<sup>35</sup> Te ní xáha<sup>n</sup> Jèsús:

—Yúhú cúu-í dàtná ì<sup>n</sup> ñuhú dáyèhé ñuyíú-a, dico sacú-ni nduu ndècu ndíhí ñaha-í xii-ndo. Te caca-ndo ichi ndáá vitna dáyehé-gá-í núú-ndó chi na cùnee te vá cútnùní-gá núú-ndó ndèé ichi quíhí<sup>n</sup>-ndó. <sup>36</sup> Quindáá iní ñáhá-ndó xii-í vitna ndècu ndíhí ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa nduu cuendá Yá Ndiõxí, te cuu-ndo dēhe-í —càchí-gá xáha<sup>n</sup>-gã xii-yu.

Te sátá dúcá<sup>n</sup> ñí cáhá<sup>n</sup> Jèsús, te ní quee-gá cuáhá<sup>n</sup>-gá ì<sup>n</sup> núú vã ná ñíhí ñáhã-yu xii-gá.

*Ñáyiú israhél ñá cuiní-yu quindáá iní-yu Jèsús*

<sup>37</sup> Te cuèi ío vãi sá vã yõo tnàhí ndàcu cada ní quide Jèsús ní xiní-yu, dico ni dùca<sup>n</sup> ñá túú ní sàndáá iní-yu-gá. <sup>38</sup> Te duca<sup>n</sup> ñí quidé-yu chi dacuítí ñí quee ndáá-xi nàcuáa ní chídó tnùní ndíi Chàíá ndíi ní cáhá<sup>n</sup> tnúhu Yá Ndiõxí ndéé sanaha núú tütú-gá núú càchí-xi:

Yòhó Yaá cúú Xítohó-í, vá yõo ì<sup>n</sup> sàndáá iní tnúhu càhá<sup>n</sup>-ndí.

Te vá yõo ì<sup>n</sup> cùtnuní iní-xi sá ño càhnu cuu-n.

Duha ní chídó tnùní ndíi Chàíá núú tütú-gá. <sup>39</sup> Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàíá núú tütú Yá Ndiõxí nàcuáa cáhá<sup>n</sup> Jèsús:



40 Mee Yă Ndiöxí ní quide-gá sá vă tècú tnùní-yu, chi ní dádăhu ndodo iní ñáhá-gă xií-yu, chi ío sàá iní-yu núu ñá ní cuìní-gá-yu quindáá iní ñáhă-yu xii-gá.

Te ni vă túhá ñáhá-yu xii yúhú cuendá dacăcu nihnu-í-yu.

41 Duha ní chídó tnùní ndí Chàíá nàcuáa cáhá<sup>n</sup> Jèsús chi ní xiní ndí sá ío càhnu cuu-gá.

42 Te cuèi duca<sup>n</sup> ñí cuu dico títí cue tée cùnuu núu ñăyiu isràél ní sándáá iní ñáhá-güedě xii-gá. Dico ñá túú ní xõ cáhá<sup>n</sup> ndáá-güedé chi ní xóo yúhú-güedé sá vă dáñá-gă cue tée cùu fariséu quíhu-güedé veñúhu. 43 Chi ní xóo cudí-gă iní-güedé sá cáhá<sup>n</sup> ñăyiu dàcúúxí tnùhu cáhá<sup>n</sup> Yă Ndiöxí.

*Ñăyiu ñá túú sándáá iní tnùhu Jèsús cuíta nihnú-yu*

44 Jèsús níhi ní cáhá<sup>n</sup>-gá, te càchí-gá:

—Nchaa ñăyiu na quindáá iní ñáhá xii-í, te ñá díú-ní mée-í quindáá iní-yu, chi tnàhá Tătà-í Yaá ní tendaha ñàha xii-í véxi-í ñuyíú-a quindáá iní-yu.

45 Te ñăyiu xiní ñáhá xii yúhú xiní-yu tnàhá Tătà-í.

46 Te yúhú véxi-í dandixi túu-í iní ñăyiu ñuyíú-a cuendá cutnùní iní-yu nàcuáa ndùu cuendá Yă Ndiöxí, te nchaa ñăyiu na quindáá iní ñáhá xii-í te vá cùndècu-gá-yu ichi cuèhé ichi duha. 47 Te núu ío davá-yu ndèdóho-yu nàcuáa cáhá<sup>n</sup>-í te ñá túú tnù-yu tnùhu-í, te ñá díú yùhú dàcuíta nihnu-í-yu, chi ñá túú véxi-í ñuyíú-a sá dăcuíta nihnu-í-yu, chi véxi-í sá dăcăcu nihnu-í-yu. 48 Te nchaa ñăyiu na cùyíchí iní ñáhá xii-í te ñá túú quide cuendá-yu

nàcuáa càhá<sup>n</sup>-í, te ñáyi<sup>u</sup>-á<sup>n</sup> ná sàá nduu te cuíta ni-hnú-yu chi ñá ní tñí<sup>u</sup>-yu tnúhu ní cáhá<sup>n</sup>-í. <sup>49</sup> Te yúhú ñá túú càhá<sup>n</sup>-í tnúhu véxi iní mée<sup>n</sup>-í, chi mee Tătà-í Yaá ní tendaha ñàha xii-í véxi-í ñuyíú-a ní cachí tnúhu-gá nàcuáa cunduu tnúhu cáhá<sup>n</sup>-í danèhé-í ñáyi<sup>u</sup>. <sup>50</sup> Te yúhú xini-í sá tñúhu ní táúchíú<sup>n</sup> Tătà-í cáhá<sup>n</sup>-í cúú-xí ñ<sup>n</sup> sá vǎha sá cúú xii-ndo chi nduu táhú-ndó cùndecu-ndo ndi<sup>hi</sup>-gá ni caa ni quí<sup>h</sup>í<sup>n</sup>, núu xíá<sup>n</sup> càhá<sup>n</sup>-í nchaa nàcuáa ní táúchíú<sup>n</sup>-gǎ —càchí-gá xáha<sup>n</sup>-gǎ xií-yu.

## 13

### *Jèsús náquète-gá sáhá cuè téé xica cuu ndi<sup>hi</sup>-gá*

<sup>1</sup> Te cùmání-gǎ tnahá vico pàscuá, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núú ndécú Tătá-gǎ. Te ío ní cuu iní-gá nchaa ñáyi<sup>u</sup> ní sándáá iní ñáhá xii-gá, te ní quide ndisa-gá sá ñí cuu iní ñáhá-gǎ xií-yu.

<sup>2-4</sup> Te ní quíhu yucu ñǎvǎha díquí tē Jùdás déhe té Xímú Iscarioté, te ní sani iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá mée Yǎ Ndiòxí Yaá cúú Tătá-gǎ ní sǎñaha-gǎ tnúhu ndee iní xii-gá sá cáda-gǎ núú-gǎ, te nàha-gá sá díú núú Tătá-gǎ ní queue-gá véxi-gá ñuyíú-a. Te sáá nduu nàsáá tucu-gá núú Tătá-gǎ. Te cùdini Jèsús ndi<sup>hi</sup> cue téé xica cuu ndi<sup>hi</sup>-gá ní cùu, te ní ndacuíñí-gá yuhu mèsá, te ní taunuu-gá ñ<sup>n</sup> dóó níhnú-gǎ, te ní quehe<sup>n</sup>-gá ñ<sup>n</sup> dóó ñí dácútú-gǎ núú yíquí-gǎ. <sup>5</sup> Te ní chihi-gá ndute ñ<sup>n</sup> tǎná, te xíá<sup>n</sup> ñí naquète-gá sáhá

cuè téé xìca cuu ndìhi-gá, te ndìhi dóó ndútú nǔú yíquí-gǎ-án nǐ nadayìchí-gá sáhá-güedě.

<sup>6</sup> Te òré naquete-gá sáhá tě Xímú, àdi Pelú, ní cùu ní xáha<sup>n</sup>-dě xii-gá:

—Mèstrú, ¿te yòhó naquete-n sǎhà-í-u? —  
càchí-dé xǎha<sup>n</sup>-dě xii-gá.

<sup>7</sup> Te ní xáha<sup>n</sup> Jèsús:

—Vitna ñá cútñuní iní-n sǎ quidè-í-a dico sáá nduu te cutñuní iní-n —càchí-gá xáha<sup>n</sup>-gǎ xii-dé.

<sup>8</sup> Te ní xáha<sup>n</sup> tě Pèlú:

—Yúhú chi vá íí<sup>n</sup> ndùu te naquete-n sǎhà-í —  
càchí-dé xǎha<sup>n</sup>-dě xii-gá.

Te ní xáha<sup>n</sup> Jèsús:

—Te núu vá náquète-í sáhá-n á<sup>n</sup>, te vá cádá-gǎ-n cuèndá sá ndécú ndìhi ñaha-í xii-n —càchí-gá xáha<sup>n</sup>-gǎ xii-dé.

<sup>9</sup> Te ní xáha<sup>n</sup> tě Pèlú:

—Te núu duca<sup>n</sup> te vá méé-ní sǎhà-í naquete-n,  
chi naquete-n tnàhá ndaha-í ndìhi díquí-í —  
càchí-dé xǎha<sup>n</sup>-dě xii-gá.

<sup>10</sup> Te ní xáha<sup>n</sup> Jèsús xii-dé:

—Téé íchí nǐ xìchì chi xìni ñuhu-xi sá sáhá-na-dě ndoo, te duca<sup>n</sup> te nduu ndoo-dé nìhí-dé. Te nchòhó sa càndoo-ndo cuéi ñá ncháá-ndó càndoo —  
cachí-gá xáha<sup>n</sup>-gǎ xii-dé.

<sup>11</sup> Te duca<sup>n</sup> nǐ cáhá<sup>n</sup> Jèsús chi sa nàha-gá sá íí<sup>n</sup> cuè téé-á<sup>n</sup> cuǎha cuèndá ñáhá-güedě xii-gá núú cuè téé cùu úhú iní ñáhá, xǐǎ<sup>n</sup> nǔu ní xáha<sup>n</sup>-gǎ sá ñà túú càndoo-güedé nchaa-güedé.

<sup>12</sup> Te sátá nǐ naquete-gá sáhá-güedě, te ní ndécuihnu-gá dóó-gǎ, te ní nucóo-gá yuhu mèsá, te ní xáha<sup>n</sup>-gǎ xii-güedé:

—¿Te ní cutnùní iní-ndó sǎ nǐ quide ñaha-ĩ xii-ndo-ǎ<sup>n</sup>? <sup>13</sup> Te nchòhó váha-ni càhá<sup>n</sup>-ndó sǎ cúnùu-í, te dànani ñaha tucu-ndo Mestrú xii-í, te ndáá càhá<sup>n</sup>-ndó. <sup>14</sup> Te núu yúhú cùu-í Mèstrú, te cùu tucu-í tée cùnùu te nàquete-í sáhá-ndó, te diu-ni duca<sup>n</sup> càda nchohó tucu naquete sáhá tnáhá-ndó. <sup>15</sup> Yúhú sànu ichi ñaha-í xii-ndo nàcuáa cada-ndo. <sup>16</sup> Te na càchí tnúhu ndáá-í xii-ndo sǎ nì ì<sup>n</sup> tée xìnu cuechí ñá túu cùnùu-dé dàcúúxí pàtróo<sup>n</sup>-dé, te nì ì<sup>n</sup> tée xìca chiu<sup>n</sup> ñá túu cùnùu-dé dàcúúxí tée tendaha ñaha xii-dé cuáhá<sup>n</sup>-dé chiu<sup>n</sup>. Te duca<sup>n</sup> sàtnahá-xì cùu yúhú ndìhì nchòhó. <sup>17</sup> Te núu ní cutnùní iní-ndó nàcuáa ní quide ñaha-ĩ xii-ndo ña, te duca<sup>n</sup> càda tnaha-ndo te cuu váha iní ñáhá Yǎ Ndiõxí xii-ndo.

<sup>18</sup> Yúhú, ñá túu càhá<sup>n</sup>-í cuendá-ndó nchàa-ndo, chi yúhú sa nàha-í nàcuáa sàni iní ì<sup>n</sup> ì<sup>n</sup> nchòhó cue tée ní nanducu nìhnu-í tnuú nchaa ñáyiu ñùhu ichi cuehé ichi duha ní cachí-í chitnahá ñáhá-ndó xii-í. Chi dacuítí sǎ quéé ndáá-xì nàcuáa càhá<sup>n</sup>-xì núu tütú Yǎ Ndiõxí núu càchí-xì: “Tée xèxi ndìhì ñaha xii-í ngóo-dé cuu úhú iní ñáhá-dé”, duha càchí-xì núu tütú-gá. <sup>19</sup> Te cùmání-gǎ sáá nduu càda ñaha-dé sá sání ìní-dé, núu xǎ<sup>n</sup> càchí tnúhu-í xii-ndo nàcuáa cada-dé, chi na sáá nduu-ǎ<sup>n</sup> te cutnùní iní-ndó sǎ yúhú cùu-í Crìstú Yaá ní tendaha Yǎ Ndiõxí véxi ñuyíú-a. <sup>20</sup> Te na càchí tnúhu ndáá-í xii-ndo sǎ nchàa ñáyiu na quehe<sup>n</sup> cuendá ñáhá xii cue tée tendaha-ĩ cáhá<sup>n</sup> tnúhu-í, te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyiu na quehe<sup>n</sup> cuendá ñáhá xii-í, te cada iní-yu sá tnàhá Tǎtà-í Dútú Ndiõxí Yaá ní tendaha ñaha xii-í véxi-í ñuyíú-a ní quehe<sup>n</sup> cuendá-yu —càchí-gá xáha<sup>n</sup>-gǎ xii-güedé.

*Jèsús càchí-gá sá tẽ Jùdás cuáha cuèndá ñáhá-dẽ xii-gá núú cuè téè cùu úhú iní ñáhá*

*(Mt. 26:20-25; Mr. 14:17-21; Lc. 22:21-23)*

<sup>21</sup> Te sátá dúcá<sup>n</sup> ñí cáhá<sup>n</sup> Jèsús te ío ní ndíhú iní-gá, te ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã díú-ní ì<sup>n</sup> nchohó cuáha cuèndá ñáhá-ndó xii-í núú cuè téè cùu úhú iní ñáhá —càchí-gá xáha<sup>n</sup>-gã xii-güedé.

<sup>22</sup> Te ní ngüíta cue téè xica cuu ndihi-gá ndéhe ì<sup>n</sup> ndehe ì<sup>n</sup> núú tnáhá-güedě, chi ñá ní cùtnuní iní-güedé ndédacàa-güedé cuèndá-güedé ní cáhá<sup>n</sup>-gá. <sup>23</sup> Te ì<sup>n</sup> téè-á<sup>n</sup> ìo cùdíí ìní ñáhá Jèsús, te ndècu yatni-dé dìñi-gá cùdini-dé ndihi-gá. <sup>24</sup> Te té Xímú, àdi Pelú chi úú dìu-dé, ní guide-dé sèñá núú tẽ ndècu yatni dìñi-gá-á<sup>n</sup> sá càcá<sup>n</sup> tnúhú-dě núú-gã nũu ndédacàa-güedé cuèndá-güedé ní cáhá<sup>n</sup>-gá. <sup>25</sup> Te téè-ã<sup>n</sup> ní sáhá<sup>n</sup> ndehe yatni-gá-dé dìñi Jesús, te ní xáha<sup>n</sup>-dẽ xii-gá:

—Mèstrú, ¿ndédacàa-ndí cuèndá-ndí ní cáhá<sup>n</sup>-n-i? —càchí-dé xáha<sup>n</sup>-dẽ xii-gá.

<sup>26</sup> Te ní xáha<sup>n</sup> Jèsús:

—Na chindóyo-í luha pàá, te téè na cuáha-í te téè-á<sup>n</sup> cúú-dě —càchí-gá xáha<sup>n</sup>-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscàrioté. <sup>27</sup> Te òré ní quehe<sup>n</sup>-dé pàá, te ní ngúndecu ndíhi ñaha dùu<sup>n</sup>-ná yucu ñãvãha xii-dé. Te ní xáha<sup>n</sup> Jèsús:

—Sá ñí sani iní-n càda-n te cada ndíhi-ni-n —càchí-gá xáha<sup>n</sup>-gã xii-dé.

<sup>28</sup> Te ní ì<sup>n</sup> cue téè cùdini ndihi-gá ñá ní tècú tnùní-güedé nása ndùu tnúhu ní xáha<sup>n</sup>-gã xii té Jùdás. <sup>29</sup> Te dava-güedé ní sani iní-güedé sá sã

cuendá sá ndécú ndìhi-dé sá ñúhú dǐhún, te vaa ìò ìn sá cuáá<sup>n</sup>-dě nàndìhi-güedé vico, àdi dǐhún cuǎha-dé ñáyiú ndàhú xáha<sup>n</sup>-gǎ ní cáhá<sup>n</sup>-güedě. <sup>30</sup> Te sa ní cundi<sup>i</sup>qu<sup>i</sup> ní quehe<sup>n</sup> cuendá té Jùdás pàá caxi-dé, te òré ní níhí-dě pàá-á<sup>n</sup> te ní quee-dé cuáhá<sup>n</sup>-dé.

*Jèsús càchí tnúhu-gá nàcuáa cada-o*

<sup>31</sup> Te sátá ñǐ quee té Jùdás cuáhá<sup>n</sup>-dé, te ní xáha<sup>n</sup> Jèsús xii dava-gǎ-güedé:

—Vitna te quiní-ndó ndìhi nchaa ñáyiú sá ìo càhnu cuu yúhú Tée cùu ñaní tnáhá-ndó nchàa-ndo, te òré-á<sup>n</sup> cutnùní iní-ndó sǎ ìo càhnu cuu tucu mee Yá Ndiòxí. <sup>32</sup> Te núu yúhú quidé càhnu-í Yá Ndiòxí, te òru-ni duca<sup>n</sup> càda cahnu ñaha-gǎ xii yúhú, te ñá túú-gǎ tǐtní nduu te duca<sup>n</sup> càda-gǎ. <sup>33</sup> Te nchòhó cue déhe-í na càchí tnúhu-í sá sàcú duha-ná nduu ndècu ndìhi ñaha-í xii-ndo. Te nchòhó nanducu ñàha-ndo xii-í dico vá ná ñihí ñáhá-ndó dàtná ní xáha<sup>n</sup>-í xii ñáyiú isràèl, te òru-ni duca<sup>n</sup> càhá<sup>n</sup>-í núú-ndó sǎ vǎ ndácú-ndó quíhí<sup>n</sup>-ndó nǔú quíhí<sup>n</sup>-í. <sup>34</sup> Te duha sànu ichi ñaha tucu-í xii-ndo nàcuáa cada-ndo sǎ cúú ìní tnáhá-ndó ìn ìn-ndo datná yúhú cúú ìní ñáhà-í xii-ndo. <sup>35</sup> Te núu na cùu iní tnáhá-ndó ìn ìn-ndo ña, te duca<sup>n</sup> te cutnùní iní nchaa ñáyiú sá cúú-ndó cuè téé ní chitnahá ñáhá xii-í —càchí-gǎ xáha<sup>n</sup>-gǎ xii-güedé.

*Jèsús càhá<sup>n</sup>-gǎ sá tǎ Pèlú vá nǔnuu-dé sá xicá cùu ndìhi ñaha-dé xii-gǎ*

*(Mt. 26:31-35; Mr. 14:27-31; Lc. 22:31-34)*

<sup>36</sup> Te ní xáha<sup>n</sup> tǎ Xǐmú, àdi Pelú chi úú òru-dé, xii Jèsús:

—Mèstrú, ¿ndèé quíhí<sup>n</sup>-n-í? —càchí-dé xáha<sup>n</sup>-dě xii-gǎ.

Te ní xáha<sup>n</sup> Jèsús:

—Vitna te vá ndácú-n cànchicú<sup>n</sup> ñáhá-n quĩhí<sup>n</sup> núú quĩhí<sup>n</sup>-í, dico na sàá nduu te dai sáá-n núú cùndècu-í —càchí-gá xáha<sup>n</sup>-gã xii-dé.

<sup>37</sup> Te ní xáha<sup>n</sup> tẽ Pèlú xii-gá:

—Mèstrú, ¿te ná cuendá núu vá ndácù-í cànchicú<sup>n</sup> ñáhá-í xii-n quĩhí<sup>n</sup> vitna-í? Chi yúhú ñá túú tnàhí yùhú-í cuèi na cùú-í sá cuendá-n —càchí-dé xáha<sup>n</sup>-dẽ xii-gá.

<sup>38</sup> Te ní xáha<sup>n</sup> Jèsús:

—¿Te ndáá sá xèhndé iní-n sã cuèi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáhá<sup>n</sup>-n sã ñá túú xìní ñáhá-n xì-í —càchí-gá xáha<sup>n</sup>-gã xii-dé.

## 14

*Jèsús dánèhé ñáhá-gã nàcuáa cada-o nàsáá-ó núú ndécú Yã Ndiõxí*

<sup>1</sup> Te ní xáha<sup>n</sup>-gã xii-güedé:

—Te ñá túú nã caní iní-ndó. Quìndáá iní-ndó Yã Ndiõxí, te quìndáá iní-ndó yùhú. <sup>2</sup> Chi núú ndécú Tàtá-í ío núne núú cùndècu-o, chi núu ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núú cùndècu-ndo. <sup>3</sup> Te dătnùní quixi tucu-í te candeca ñaha-ĩ xii-ndo quĩhí<sup>n</sup> cuendá ì<sup>n</sup>-ni xìchi cundecu-o. <sup>4</sup> Te sa nàha-ndo ndéé quĩhí<sup>n</sup>-í te sa xìní-ndó ìchi —cachí-gá xáha<sup>n</sup>-gã xii-güedé.

<sup>5</sup> Te ní xáha<sup>n</sup> tẽ Măxí xii-gá:

—Mèstrú, ñá túú xìní-ndí ndéé quĩhí<sup>n</sup>-n te da ichi-ná quini-ndí —càchí-dé xáha<sup>n</sup>-dẽ xii-gá.

<sup>6</sup> Te ní xáha<sup>n</sup> Jèsús:

—Yúhú cùu-í dàtná #<sup>n</sup> ichi te càhá<sup>n</sup>-í tnúhu ndáá, te yúhú cada-í te naníhí tàhú-ndó. Te #<sup>n</sup> dìi díi-ni yúhú cada-í te sáá-ndó núú Yá Ndiöxí cun-decu-ndo te núu na quíndáá iní ñáhá-ndó xii-í. <sup>7</sup> Te núu dìcò cútnùní ndisa iní-ndó yòo cuu-í-á<sup>n</sup>, duca<sup>n</sup> te cutnùní iní-ndó yòo cuu Tàtá-í ní cùu. Dico vitna dàtná sá ñí xiní núú-ndó Dütú Ndiöxí Yaá cúu Tàtá-í cada iní-ndó, chi ní xiní-ndó yùhú —càchí-gá xáha<sup>n</sup>-gă xii-dé.

<sup>8</sup> Te ní xáha<sup>n</sup> të Lìpé xii-gá:

—Mèstrú, danèhé ñáhá xii-ndí Dütú Ndiöxí chi na cùu váha iní-ndí —càchí-dé xáha<sup>n</sup>-dě xii-gá.

<sup>9</sup> Te ní xáha<sup>n</sup> Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vâi nduu ndecu ndihí ñaha-í xii-ndo, chi ñáyiu xini ñáhá xii-í te xini-yu tnáhá Tàtá-í. ¿Te ná cuendá yòhó càchí-n sã dánèhé ñáhà-í xii-ndo Tàtá-í? <sup>10</sup> ¿Náa ñá túú sândáá iní-ndó sã yùhú ndécù-í ndihí Tàtá-í? Te mee-gă ndécú ndihí ñaha-gá xii-í. Te nchaa tnúhu càhá<sup>n</sup>-í núú-ndó ñà túú càhá<sup>n</sup>-í sá vëxi iní mée-í, chi Tàtá-í Yaá ndécú ndihí ñaha xii-í chíndèe ñaha-gá quidè-í chiu<sup>n</sup>-gá. <sup>11</sup> Te quíndáá iní-ndó sã yùhú ndécù-í ndihí Tàtá-í, te duca<sup>n</sup> mée-gá ndécú ndihí ñaha-gá xii-í. Te núu ñá túú sândáá iní-ndó tnúhu càhá<sup>n</sup>-í-a, te dandàcu iní-ndó nchàa chiu<sup>n</sup> ta quide-í véxi, te quíndáá iní ñáhá-ndó. <sup>12</sup> Te na càchí tnúhu ndáá-í xii-ndo sã nchàa ñáyiu na quíndáá iní ñáhá xii-í, te cadá-yu chiu<sup>n</sup> quide-í te càhnu-gá chiu<sup>n</sup> cadá-yu chi yúhú núhú-í núú ndécú Tàtá-í cundecu-í nàcuáa níhí ndée-gă-yu cundécú-yu. <sup>13</sup> Te nchaa sá ná càcá<sup>n</sup>-ndó te taxi-í te núu na quíndáá iní ñáhá-ndó



xì-í, te nchaa cada-í cuèndá cutnùnì iní ñáyiú sá ïo càhnu cuu Tàtá-í Dútú Ndiöxí. <sup>14</sup> Te yúhú cada-í nchaa sá cuìní-ndó càcá<sup>n</sup> táhú-ndó nùù-í, te núu na quìndáá iní ñáhá ndisa-ndo xii-í.

*Jèsús càchí-gá sá téndàha-gá Espíritú Yă Ndiöxí quixi cundecu ndihí-o*

<sup>15</sup> Te núu nchòhó cúú ìní ñáhá-ndó xì-í te tñi-ndo nchàa tñúhu càhá<sup>n</sup>-í. <sup>16</sup> Te yúhú cacá<sup>n</sup> táhù-í núú Tàtá-í sá téndàha-gá Espíritú-gá quixi cundecu ndihí-ndo cànu ichi ñaha-xi xii-ndo nacuaá cundecu-ndo, te chindee ñaha-xi xii-ndo nì caa nì quíhí<sup>n</sup>. <sup>17</sup> Te nchaa ñáyiú ndècu ichi cuehé ichi duha ñá túú xìní-yu Espíritú Yă Ndiöxí te nì vă cúú cùndecu ndihí-yu. Dico nchòhó sa xìní-ndó Espíritú-gá te ndècu ndihí ñaha-xi xii-ndo. Te sáá ì<sup>n</sup> nduu te cunuu Espíritú-gá iní-ndó. <sup>18</sup> Te yúhú vá dáñá ñihnu ñaha-í xii-ndo, chi quixi tucu-í cundecu ndihí ñaha-ï xii-ndo. <sup>19</sup> Te sácú duha-ná nduu ndècu-í te vá quìní ñáhá-gă ñáyiú xii-í, dico nchòhó chi quìní ñáhá-ní-ndó xì-í. Te duca<sup>n</sup>-ni cùndecu-ndo ichi váha chi cundecu ndihí ñaha-ï xii-ndo nì caa nì quíhí<sup>n</sup>. <sup>20</sup> Te dàvá-á<sup>n</sup> cutnùnì iní-ndó sã ndécù-í ndihí Tàtá-í, te duca<sup>n</sup> nchòhó cundecu ndihí ñaha-ni-ndo xii-í. <sup>21</sup> Te nchaa ñáyiú dàcuaha tñúhu-í te tñi<sup>n</sup>-yu, ñáyiú-á<sup>n</sup> quidé ndisá-yu sá cúú ìní ñáhă-yu xii-í. Te duca<sup>n</sup> Tàtá-í cúú ìní ñáhá-gă xií-yu, te duca<sup>n</sup>-ni yúhú cúú ìní-í-yu tucu, te duca<sup>n</sup> te cùtnuní iní-yu sá ndécú ndihí-í-yu —càchí-gá xáha<sup>n</sup>-gă xii-dé.

<sup>22</sup> Te ní cáhá<sup>n</sup> ì<sup>n</sup> tée nàni Judás dico ñá díú tẽ Jùdás déhe té Xímú Iscàrioté ní cáhá<sup>n</sup>, chi ìngá té Jùdás ní xáha<sup>n</sup>-dẽ xii-gá:

—Mèstrú, ¿nása cada-n cuendá cutnùní iní-ndí sá cùndècu ndihí ñaha-n xii-ndí, te ñáyiú ñùhu ichi cuehé ichi duha vá cùndècu ndihí-n-yu-i? — càchí-dé xǎha<sup>n</sup>-dě xii-gá.

<sup>23</sup> Te ní xáha<sup>n</sup> Jèsús xii-güedé:

—Nchaa ñáyiú cùu iní ñáhá xii-í te tnǎ-yu tnúhu càhá<sup>n</sup>-í, te ñáyiú-á<sup>n</sup> cúú ìní ñáhá Tǎtà-í xií-yu, te yúhú ndihí Tǎtà-í ndécú-ndǎ ndihí-yu. <sup>24</sup> Te nchaa ñáyiú ñá túú cùu iní ñáhá xii-í te ñá túú tnǎ-yu tnúhu càhá<sup>n</sup>-í. Te nchaa tnúhu ní cáhá<sup>n</sup>-í ní xíndèdóho-ndo chi Tǎtà-í Yaá ní tendaha ñaha xii-í véxi-í ñuyúú-a ní dácáhú ìní ñáhá-gǎ xii-í, te ñá díú mèe-í ní càhu iní-í tnúhu cáhá<sup>n</sup>-í.

<sup>25</sup> Duha ndùu tnúhu càhá<sup>n</sup>-í núú-ndó vìtna ndecu ndihí ñaha-gá-í xii-ndo. <sup>26</sup> Dico Yá Ndiǒxí tendaha-gǎ Espíritú-gá quixi-xi cada-xi núu-í taxi-xi tnúhu ndee ìní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cúmǎní quini-ndó, te ñu-ni-xi dandàcu iní ñáhá-xí xii-ndo nchaa nacuaá ní cáhá<sup>n</sup>-í.

<sup>27</sup> Te yúhú chindee chítuu ñaha-í xii-ndo ìo váha cuu iní-ndó cùndecu-ndo datná yúhú ío váha cùu iní-í ndécú-í, chi sa ta cùyatni nduu núhú-í. Te yúhú càchí tnúhu ndáá-í sá chíndèe ñaha-í xii-ndo, te vá cadà-í dàtná quidé ñáyiú ñùhu ichi cuehé ichi duha. Te ni vǎ ndihú iní-ndó, te ni vǎ yúhú-ndó. <sup>28</sup> Te sa ní xíndèdóho-ndo ní cáhá<sup>n</sup>-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tǎtà-í, te cudǎ ìní-ndó ní cùu, chi ío càhnu cuu-gá dàcúúxí yúhú. <sup>29</sup> Te sa ní cachí tnúhu-í sá nùhú-í, te na sàá òré núhú-í núú ndécú Tǎtà-í, te quíndáá iní ñáhá-ndó xii-í.

30 'Te ñá túú-gă vâi tnúhu ndatnúhu ndihî ñaha-ĩ xii-ndo chi sa véxi yucu ñăvâha sá táxí tnùní ñuyíú-a, dico vá táxí tnùní ñáhá-xí xì yúhú. 31 Te cada-í nchaa nâcuáa ní táúchíú<sup>n</sup> Tătà-í cuendá cutnùní iní nchaa ñáyiu ñuyíú-a sá yúhú ío cùu iní-í-gá. Te vitna chí ndácuíñî ná quihî<sup>n</sup>-ó — càchí-gá xáha<sup>n</sup>-gă xii-güedé.

## 15

### *Cuendá yoho yàha stilé ndihî nchaa dité-xi*

1 Te ní xáha<sup>n</sup> tùcu-gá xii-güedé:

—Yúhú cúu-í dàtná yoho yàha stilé, te Tătà-í cúú-gă dàtná ì<sup>n</sup> téé xìto yoho yaha stilé-á<sup>n</sup>. 2 Te nchaa ñáyiu ní sándáá iní ñáhá xì-í cúú-yu dàtná dité nchaa yoho yàha stilé-á<sup>n</sup>. Te téé xito yoho yaha stilé-á<sup>n</sup> xèhndé-dé nchaa dité-xi sá ñă cuìní-gá-xi cuu<sup>n</sup> ndéhé-xi, te ndàda ndoo-dé nchaa dité-xi sá cúú<sup>n</sup> cuendá cuu<sup>n</sup>-gá. 3 Te duca<sup>n</sup> sãtnahá-xi cùu nchohó, chi sa ní xócuíñî nchaa sá cuèhé sá dúhá ndècu ndihî-ndo, chi ní sándáá iní-ndó tnúhu ní cáhá<sup>n</sup>-í. 4 Te cuu ì<sup>n</sup>nuu-ndo cùndecu ndihî ñaha-ndo xii-í, te núu duca<sup>n</sup> na càda-ndo, te cundecu ndihî ñaha-ĩ xii-ndo. Chi núu ì<sup>n</sup> yutnu vídí ná quèndéé dité-xi, te dité-xi sá ñî quèndéé-á<sup>n</sup> vâ cúú<sup>n</sup>-gă sávidí-xi chi duu<sup>n</sup> duu<sup>n</sup> ní xíta-xi. Duca<sup>n</sup> sãtnahá-xi cùu nchohó chi vá ndácú-ndó càda-ndo chiu<sup>n</sup>-í, te núu vá cùndècu ndihî ñaha-í xii-ndo.

5 'Chi yúhú cúu-í dàtná yutnu vídí-á<sup>n</sup>, te nchohó cúú-ndó dàtná nchaa dité-xi. Te nchaa ñáyiu cùu ì<sup>n</sup>nuu ndihî ñaha xii-í, te ndècu ndihî-í-yu, te ndácú-yu quidè-yu chiu<sup>n</sup>-í. Te núu vá cúú ì<sup>n</sup>nuu ndihî ñahá-yu xii-í, te vá ndácú-yu cadá-yu chiu<sup>n</sup>-í.

6 Te nchaa ñáyiu vá cúú ì<sup>n</sup>nuu ndihî ñaha xii-í, te

yáha-yu dàtná yáha ì<sup>n</sup> dité yutnu vǐdí sá ñà túú cùu<sup>n</sup> sávìdí-xi, chi xèhndé-güedé yìchí-xi, te sàhmi-güedé.

7 'Cuu ì<sup>n</sup>nuu ndìhi ñaha-ndo xii-í, te vá nácuànaa-ndo nacuáa ní cáhá<sup>n</sup>-í. Te núu duca<sup>n</sup> na càda-ndo, te nání cuìní-ndó cǎcá<sup>n</sup>-ndó núu-í te taxi-í. 8 Te núu nchòhó ná cádá vǎha-ndo cùndecu-ndo, te ío cada càhnu-ndo Tǎtà-í, te duca<sup>n</sup> cùtnuní sá ndísá cùu-ndo cue téé ní chitnahá ñáhá xii-í. 9 Te yúhú ío cùu iní ñáhà-í xii-ndo dàtná cúú iní ñáhá Yǎ Ndiöxí xii-í. Te cada-ni-ndo mèe-ni sá vǎha cuendá cudíí iní ñáhá-gǎ-í xii-ndo. 10 Te núu na quìndáá iní-ndó càda-ndo nchaa nacuáa ní cáhá<sup>n</sup>-í, te ío cuu iní ñáhà-í xii-ndo, chi yúhú duca<sup>n</sup> ìo sàndáá iní-í Tǎtà-í quidè-í nchaa nàcuáa ní cáhá<sup>n</sup>-gǎ, te xǎ<sup>n</sup> núu ío cùu iní ñáhá-gǎ xii-í.

11 'Duha càhá<sup>n</sup>-í núu-ndó cuendá cudíí ndísa iní-ndó dàtná cúdíí iní mèe-í. 12 Te duha ndùu tnúhu càhá<sup>n</sup>-í cuendá sá cúú iní tnáhá-ndó ì<sup>n</sup> ì<sup>n</sup>-ndo datná cúú iní ñáhà-í xii-ndo. 13 Te núu ní xihó sǎ cúú-xí ì<sup>n</sup> téé ío váha tnáhá tnúhu ndìhi-o, te xǎ<sup>n</sup> cutnùní iní ñáyiu sá ìo cùu iní-ó-dě. 14 Te nchòhó cuu-ndo cuè téé ío váha tnahá tnúhu ndìhi-í te núu na càda-ndo nchaa nacuáa càhá<sup>n</sup>-í. 15 Te vá cǔñaha-gǎ-í xii-ndo sǎ cúú-ndó cuè téé xìnu cuechi núu-í, chi ni ì<sup>n</sup> téé xìnu cuechi ñá túú xìní-dé ná quidé pǎtróo<sup>n</sup>-dě. Te yúhú cǎchí-í xii-ndo sǎ cúú-ndó cuè téé ío váha tnáhá tnúhu ndìhi-í, chi ní cǎchí tnúhu-í nchaa nàcuáa ní cáhá<sup>n</sup> Tǎtà-í. 16 Te ñá díú nchòhó ní càhá<sup>n</sup> ñáhá-ndó xii yúhú, chi yúhú ní cáhá<sup>n</sup> ñáhà-í xii-ndo. Te yúhú tauchìu<sup>n</sup>-í quíhí<sup>n</sup>-ndó càda-ndo nchaa nacuáa ní cáhá<sup>n</sup>-í, chi tnúhu-á<sup>n</sup> vǎ ndíhí nìhnu-xi. Te duca<sup>n</sup> nchàa sá ná cǎcá<sup>n</sup>-ndó núu Tǎtà-í Yǎ Ndiöxí te taxi-gǎ, te núu na quìndáá iní

ñáhá-ndó xì-í. <sup>17</sup> Te yúhú càhá<sup>n</sup>-í dóho-ndo sǎ cúú ìní tnáhá-ndó ì<sup>n</sup> ì<sup>n</sup>-ndo.

*Ñáyiú ndècu ichi cuehé ichi duha cùu úhú iní-yu Jèsús ndìhi nchaa ñáyiú sàndáá iní tnúhu-gá*

<sup>18</sup> 'Te nchaa ñáyiú ndècu ichi cuehé ichi duha ñá cúú quìní ñáhǎ-yu xii-ndo, te sa nàha-ndo sá dǐhna-gá yúhú ní ngüíta-yu duca<sup>n</sup> ñà cúú quìní ñáhǎ-yu xii-í. <sup>19</sup> Te núu dicó tnàhá nchòhó ndécú-ndó ichi cuehé ichi duha ña, te cuu iní ñáhǎ-yu xii-ndo dàtná cúú ìní tnáhǎ-yu ndì mèé-yu ni cùu. Te yúhú ní nanducu ñìhnu ñaha-í xii-ndo tnúú ñáyiú ndècu ichi cuehé ichi duha, núu xiǎ<sup>n</sup> ío cùu úhú iní ñáhǎ-yu xii-ndo cuèndá sá ñà túú-gǎ chítnàhá-ndǒ-yu. <sup>20</sup> Te dandàcu iní-ndó nàcuáa ní cáhá<sup>n</sup>-í sá ñì ì<sup>n</sup> téé xìnu cuechi ñá túú cùnūu-dé dàcúúxí pàtróó<sup>n</sup>-dé. Te yúhú cúú úhú iní ñáhǎ-yu, te ñìu-ni duca<sup>n</sup> càda ñahá-yu xii nchòhó. Te núu dicó ní tnǎ<sup>n</sup>-yú tnúhu ní cáhá<sup>n</sup>-í ñá, te ñìu-ni duca<sup>n</sup> tnǎ<sup>n</sup>-yú tnúhu cáhá<sup>n</sup>-ndó nǔǔ-yu ni cùu. <sup>21</sup> Te duca<sup>n</sup> càda ñahá-yu xii-ndo sǎ cuèndá-í, chi ñá xìní-yu Tǎtà-í Yaá ní tendaha ñàha xii-í véxi-í ñuyú-a.

<sup>22</sup> 'Te vǎa vǎ cùndècu cuéchi-yu ni cùu, te núu ñá túú yǔhú ní cǎhá<sup>n</sup>-í nǔǔ-yu, te vitna vǎ cúú tnàhí cachí-yu sá ñà túú cuéchi-yu. <sup>23</sup> Chi nchaa ñáyiú cùu úhú iní ñáhǎ xì-í, te cùu úhú iní-yu tnàhá Tǎtà-í. <sup>24</sup> Te vǎa ni ì<sup>n</sup> cuéchi-yu vǎ cùndècu ni cuu, te núu dicó ñá túú ní xìní-yu nchaa sá ñǐ quide-í sá vǎ yǒo tnàhí ndàcu cada. Te cuèi ní xìní-yu dico dai cùu úhú iní ñáhǎ-yu xii-í ndìhi Tǎtà-í. <sup>25</sup> Te duha quidé-yu chi dacu:íí quèè ndáá-xi nàcuáa yòdo tnuní núú tütú Yǎ Ndiǒxí sá dácuàhá-yu, chi

càchí-xi sá ñà túú nă cuéchi-í te cuu úhú iní ñáhă-yu xii-í.

<sup>26</sup> 'Te Espíritú Tătà-í Dútú Ndiöxí sá ndécú nŭú-gă tendaha-í quixi chindee ñaha-xi xii-ndo, te canu ichi ñaha-xi năcuáa cundecu-ndo, te Espíritú-á<sup>n</sup> cǎhá<sup>n</sup> ndáá-xi cuendá cutnùní iní nchaa ñáyu yoo cùu-í. <sup>27</sup> Te nchòhó tnàhá-ndó cǎhá<sup>n</sup> váha-ndo cuendá-í cuendá cutnùní iní-yu yoo cùu-í, chi nàha-ndo sá ndèé òré ní ngúita-í quidè-í chiù<sup>n</sup> Tătà-í ní chitnahá ñáhá-ndó xii-í —càchí-gá xáha<sup>n</sup>-gă xii-güedé.

## 16

<sup>1</sup> Te ní xáha<sup>n</sup> tùcu-gá xii-güedé:

—Duha cǎhá<sup>n</sup>-í cuendá ná nanchòcáya iní-ndó nŭhú-ndó ichi cuhé ichi duha. <sup>2</sup> Chi vá dáñá-gă-güedé quihu-ndo vèñúhu, te ni vǎ cúú-gǎ quini ndeé ñáhá-güedě xii-ndo. Te sáá ì<sup>n</sup> nduu te cahni ñaha-güedě xii-ndo, te xǎ<sup>n</sup> cuu caha<sup>n</sup>-güedě sá quidé-güedě chiù<sup>n</sup> Yá Ndiöxí. <sup>3</sup> Te duca<sup>n</sup> càda-güedé chi ñá túú xini-güedé Tătà-í, te ni ñà túú xini ñáhá-güedě xii yúhú. <sup>4</sup> Te duha ndùu tnúhu cǎhá<sup>n</sup>-í núú-ndó, chi na sáá òré te ndacu iní-ndó nchaa tnúhu sá sà ní cachí tnúhu-í xii-ndo năcuáa cada ñaha-güedě xii-í.

### *Nchaa chiù<sup>n</sup> quide Espíritú Yă Ndiöxí*

'Te ñá túú ní càchí tnúhu-í xii-ndo ndèé díhna chi ndècu ndìhi ñaha-í xii-ndo. <sup>5</sup> Dico vitna sa ta cùyatni nduu núhú-í núú ndécú Tătà-í Yaá ní tendaha ñaha xii-í véxi-í ñuyú-a. Te ni ì<sup>n</sup> nchohó ñá túú xicá<sup>n</sup> tnúhú-ndó nŭú-í nŭu ndèé quíhí<sup>n</sup>-í. <sup>6</sup> Chi mee-ni sǎ ndìhú iní-ndó sǎ dúcá<sup>n</sup> nǎ cǎhá<sup>n</sup>-í. <sup>7</sup> Te na càchí tnúhu ndáá-í xii-ndo sǎ vǎha-gá sá cúú-xí-ndó nŭu

núhú-í, chi tendaha-ĩ Espíritú Yă Ndiõxí quixi cundecu ndìhi-ndo chìndee ñaha-xi, chi núu vá nùhú-í te vá quíxí Espíritú-gá cundecu ndìhi-ndo chìndee ñaha-xi xii-ndo. <sup>8</sup> Te na quìxi Espíritú-gá te dandìxi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhá-xí sã ndécú ì<sup>n</sup> ichi váha ichi ndáá. Te Espíritú-gá-á<sup>n</sup> cada-xi nàcuáa cutnùní iní-yu sá Yă Ndiõxí cada ndáá-gá cuéchi-yu. <sup>9</sup> Te duca<sup>n</sup> te cutnùní iní-yu sá ndécú cuéchi-yu, chi ñá túú sàndáá iní ñáhã-yu xii-í. <sup>10</sup> Te duca<sup>n</sup> te cutnùní iní-yu nàcuáa ndùu cuendá ichi váha ichi ndáá, chi yúhú núhú-í núú ndécú Tătà-í, te nchòhó vá quíní ñáhá-gã-ndó. <sup>11</sup> Te duca<sup>n</sup> te cutnùní iní-yu sá Yă Ndiõxí cada ndáá-gá cuéchi-yu, chi sa ní cáhá<sup>n</sup>-gá sá yúcú ñävãha sá táxí tnùní ñuyíú-a quíhí<sup>n</sup>-xi núú ùhú núú ndàhú.

<sup>12</sup> Te vài-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. <sup>13</sup> Te na quìxi Espíritú Yă Ndiõxí, Espíritú càhá<sup>n</sup> ndáá cuítì, te Espíritú-á<sup>n</sup> danèhé ñáhá-xí nchàa tnúhu váha tnúhu ndáá. Te vá dacàhu iní ñáhá-xí xii-ndo sá vèxi iní méé-xí chi dacàhu iní ñáhá-xí nchàa sá càhá<sup>n</sup> Yă Ndiõxí, te cachí tnúhu-xi nchaa nàcuáa cada-xi ndéé núú cuáhá<sup>n</sup> núú vèxi-gá. <sup>14</sup> Te Espíritú-gá-á<sup>n</sup> cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo. <sup>15</sup> Te nchaa sá ndécú ndìhi Tătà-í ndécú ndìhi-í tnàhá-í, núu xiá<sup>n</sup> càhí-í sá Espíritú-gá danèhé ñáhá-xí nchàa tnúhu-í xii-ndo.

*Nchaa ñáyiu ndìhú iní-xi nduu dǎ iní-yu na quixi tucu Jesús*

16 'Te ìí<sup>n</sup> úú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tùcu-ndo xii-í, te duca<sup>n</sup> chi núhú-í núú ndécú Tǎtà-í —càchí-gá xáha<sup>n</sup>-gǎ xii-güedé.

17 Te sá dúcá<sup>n</sup> nǐ cáhá<sup>n</sup>-gá nǔu ní ngüíta ìí<sup>n</sup> úú cue téé xìca cuu ndìhi-gá xǐtnàha-güedé:

—¿Nása ndùu-tu tnúhu càhá<sup>n</sup>-gá sá càchí-gá sá ìí<sup>n</sup> úú-nǎ nduu ndècu-gá te vá quìní-gá-ó-gǎ, dico núú sàcú-ni nduu te quìní tucu-o-gǎ-i?, chi núhú-gá núú ndécú Tǎtá-gǎ —càchí-güedé xǐtnàha-güedé.

18 Te xǐtnàha tucu-güedé:

—¿Nása cuáhá<sup>n</sup>-tu tnúhu-ǎ<sup>n</sup> sá sàcú-ni nduu? Te ñá tècú tnùn-í-ó nása ndùu tnúhu càhá<sup>n</sup>-gá —càchí-güedé xǐtnàha-güedé.

19 Te Jèsús ní cutnùn-í iní-gá sá cuìní-güedé cácá<sup>n</sup> tnúhú-güedé núú-gǎ nása ndùu tnúhu ní cáhá<sup>n</sup>-gá, núú ní xáha<sup>n</sup>-gǎ:

—Cuèndá sá nǐ cachí-í sá ìí<sup>n</sup> úú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tùcu-ndo xii-í ní cachí-í, ¿xí<sup>n</sup> ndúcú tnúhu núú tnáhá-ndó-ǎ<sup>n</sup>? —càchí-gá xáha<sup>n</sup>-gǎ xii-güedé.

20 Te ní xáha<sup>n</sup> tùcu-gá:

—Te na càchí tnúhu ndáá-í xii-ndo sǎ nchòhó ndíhú víhí iní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudíí iní-yu. Dico nchòhó ñáyiú ndáhyú chi sáá nduu te nduu díí iní-ndó. 21 Chi dàtná cuìní-ndó cùu ìí<sup>n</sup> ñadíhí ñaha ní tnahá nduu cacu déhe-xi vai sani iní-a<sup>n</sup> sá quidé úhú ñáhá-xí. Dico na yǎha cacu déhe-a<sup>n</sup>, te ñá túú-gǎ ndácú iní-a<sup>n</sup> sá nǐ quide úhú ñáhá-xí xii-a<sup>n</sup> chi mee-nǎ sá cúdíí iní-a<sup>n</sup> déhe-a<sup>n</sup>. 22 Duca<sup>n</sup>



sătnahá-xi cùu nchohó vitna chi ndìhú iní-ndó sã nùhú-í, dico quixi tucu-í quixi coto ñaha-í xii-ndo, te òré-á<sup>n</sup> te cudíí ndìsa iní-ndó, te vá yõo ì<sup>n</sup>-gá dandìhú iní ñáhá xii-ndo davá-á<sup>n</sup>.

<sup>23</sup> 'Te dàvá-á<sup>n</sup> ñà túú-gã ná nducu tnũhu-ndo nũù-í. Te na càchí tnũhu ndáá-í xii-ndo sã Tătà-í taxi-gá nchaa sá ná càcá<sup>n</sup>-ndó nũú-gã nũu na quìndáá iní ñáhá-ndó xii-í. <sup>24</sup> Te ndéé vitna vátá dúcá<sup>n</sup>-gã cada-ndo càcá<sup>n</sup>-ndó. Dico càcá<sup>n</sup>-ndó nũú-gã nũu ná cuìní-ndó te taxi-gá cuendá cudíí ndìsa iní-ndó —càchí-gá xáha<sup>n</sup>-gã xii-güedé.

*Xítóhó Jesucristú ní cunuu tnũhu-gá núú yucu ñávãha*

<sup>25</sup> Te xáha<sup>n</sup> tucu-gá xii-güedé:

—Mee-ni ñí chidáhu ndodo-í tnũhu ní cáhá<sup>n</sup>-í núú-ndó, dico sáá nduu te vá chidãhu-gá-í tnũhu cáhá<sup>n</sup>-í, chi cáhá<sup>n</sup> ndáá-na-í cuendá Tătà-í. <sup>26</sup> Te dàvá-á<sup>n</sup> càcá<sup>n</sup>-ndó núú Tătà-í nũu ná cuìní-ndó te taxi-gá, te núu na quìndáá iní ñáhá-ndó xii yúhú Déhe-gá. Te ñá túú-gã xini ñũhu-xi sá yũhú càcá<sup>n</sup>-í núú-gã cuendá-ndó chi càcá<sup>n</sup> méé-ñã-ndó. <sup>27</sup> Chi mee Tătà-í ío cùu iní ñáhá-gã xii-ndo cuendá cúú iní ñáhá-ndó xii-í, te sàndáá iní-ndó sã nũú-gã ní quee-í véxi-í. <sup>28</sup> Te yúhú ní quee-í núú Tătà-í véxi-í ñuyíú-a, te vitna dándóo-í ñuyíú-a te núhú-í núú ndécú-gã —càchí-gá xáha<sup>n</sup>-gã xii-güedé.

<sup>29</sup> Te ní xáha<sup>n</sup> cuè téé xica cuu ndìhi-gá:

—Vitna chi càhá<sup>n</sup> ndáá-ñã-n, ñá túú-gã chidãhu-n tnũhu càhá-n. <sup>30</sup> Te vitna ní xini-ndí sá ïo váha cùtnuní iní-n nchàa nacuaá cùu, te cùtnuní iní-n nchàa nacuaá sàni iní nchaa ñáyiu. Te ñá túú xini ñũhu-xi nágá nducu tnũhu-yu núú-n chi nchaa

sa ní dátũu-n nũũ-yu. Te xíǎ<sup>n</sup> nũũ sàndáá iní-ndí sá nũú Yǎ Ndiǒxí ní quee-n vëxi-n —càchí-güedé xǎha<sup>n</sup>-güedë xii-gá.

<sup>31</sup> Te ní xáha<sup>n</sup> Jèsús:

—¿Te vitna sàndáá iní-ndó-ǎ<sup>n</sup>? <sup>32</sup> Vitna ní sáá nduu nǐ sáá òré sá ncháá nchòhó cuténuu-ndo cǎa ñ<sup>n</sup> caa úú cuu-ndo, te dándóo mee ñàha-ndo xii-í. Dico ñá díú mèe dii-í quendóo chi ndècu ndihí-í Tǎtà-í. <sup>33</sup> Duha càhá<sup>n</sup>-í cuendá cuu váha iní-ndó cùndecu-ndo, chi ñuyíú-a cuu úhú iní ñáhǎ-yu xii-ndo, dico ni vǎ yùhú-ndó chi yùhú sa ní dáquéé tǐhù-í nchaa sá cuèhé sá dúhá ió ñuyíú-a —càchí-gá xáha<sup>n</sup>-gǎ xii-güedé.

## 17

*Jèsús xicá<sup>n</sup> táhú-gǎ núú Tǎtà-gǎ Dútú Ndiǒxí cuendá cue téé xica cuu ndihí-gá*

<sup>1</sup> Te sátá dúcá<sup>n</sup> nǐ cáhá<sup>n</sup> Jèsús te ní ndacoto-gá andiú, te ní xáha<sup>n</sup>-gǎ xii Tǎtà-gǎ Dútú Ndiǒxí:

—Táu, vitna ní sáá nduu càda cahnu ñaha-n xii-í cuendá duca<sup>n</sup> càda cahnu ñaha-í xii-n. <sup>2</sup> Chi mee-n nǐ cachí-n sǎ táxí tñuní-í nchaa ñáyiú ñuyíú-a, te dàcacu nihnu-í nchaa ñáyiú ní cachí-n nàníhí tàhú.

<sup>3</sup> Te cundecu ndihí-ǒ-yu ni caa ni quíhí<sup>n</sup>, chi sàndáá iní ñáhǎ-yu sá ñ<sup>n</sup> dìi díi-ni yòhó cúú-n Ndiǒxí ndisa, te duca<sup>n</sup> xini ñáhǎ-yu xii yùhú Jesucristú téé ní tendaha-n vëxi ñuyíú-a.

<sup>4</sup> Te yùhú ní chiñuhu ñaha-í xii-n ñuyíú-a, te ní xínu chiú<sup>n</sup> ní cachí-n càda-í. <sup>5</sup> Táu, vitna na nàsáá-í núú-n te cada cahnu ñaha-n xii-í dàtná ní xóo cada cahnu ñaha-n xii-í ndéé cùtnàhá vátá ngǎva-gá ñuyíú.



dánèhé-í-yu tnúhu-n, dico nchaa ñáyiú ndècu ichi cuehé ichi duha cùu úhú iní ñáhă-yu xií-yu cuendá sá ñà túú-gă ndécŭ-yu ichi cuèhé ichi duha-án dâtná yúhú ñá túú ndècu-í ichi-án. <sup>15</sup> Te ñá túú càchí-í sá xócàní-n-yu ñuyíú-a, dico càhá<sup>n</sup> ndàhú-í núú-n sã dácăcu ñìhnú-n-yu núú yucu ñăvăha. <sup>16</sup> Te yúhú ñá túú ndècu-í ichi cuèhé ichi duha, te duca<sup>n</sup> mée-yu ñá túú-gă ndécŭ-yu ichi cuèhé ichi duha. <sup>17</sup> Te ío na cùndecu yìhì ñihu-gá-yu núú-n dàcuahá-yu tnúhu-n, chi cùu-xi ñ<sup>n</sup> tnúhu ndáá. <sup>18</sup> Te dâtná ní tendaha ñàha-n xii yúhú véxi-í tnuú nchaa ñáyiú ndècu ichi cuehé ichi duha, duca<sup>n</sup> càda-í tendaha-í-yu quíhí<sup>n</sup>-yu cáhá<sup>n</sup>-yu tnúhu-í tnuú nchaa ñáyiú ndècu ichi cuehé ichi duha. <sup>19</sup> Te yúhú ndécú yìñuhu-í núú-n, te cada ñàha-n xì-í nàcuáa cùu iní-n sã cuendá-yu, te duca<sup>n</sup> te cundecu yìñùhú-yu núú-n dàcuahá-yu tnúhu-n.

<sup>20</sup> Te ñá díú cuendá mee-ni ñăyiú sa ní sándáá iní-xi càhá<sup>n</sup> ndàhú-í núú-n, chi tnàhá cuendá nchaa ñáyiú na quíndáá iní ñáhá xì-í ndéé idá-gá ñuú na cùndedóho-yu tnúhu cáhá<sup>n</sup> ñáyiú na tendaha-í. <sup>21</sup> Te xicá<sup>n</sup> táhù-í núú-n sã ncháă-yu ñ<sup>n</sup>-nă ichi na cùu-yu, te ñ<sup>n</sup>-nă cani iní ndihì ñàhá-yu xii-o dâtná cúu nchòo ñ<sup>n</sup>-ni cuu-o. Te duca<sup>n</sup> ñ<sup>n</sup>-ná cuu-o ndihí-yu cuendá sá ná quíndáá iní nchaa ñáyiú ndècu ichi cuehé ichi duha sá díú-n ñí tendaha ñàha-n xii-í véxi-í ñuyíú-a. <sup>22</sup> Te nchaa sá văha ní taxi-n ndècu ndihí-í ní dánèhé-í-yu cuendá sá ñ<sup>n</sup>-nă cuú-yu cundecú-yu dâtná ndécú nchòo. <sup>23</sup> Te yúhú cundecu ndihí-í-yu, te yòhó cundecu ndihì ñàha-n xì yúhú cuendá ñ<sup>n</sup>-nă cuu ndisá-yu cundecú-yu. Te duca<sup>n</sup> te cutnùní iní nchaa ñáyiú ndècu ichi cuehé

ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúú ìní ñáhá-n xìi yúhú.

<sup>24</sup> 'Táu, mee-n ñí taxi cuendá-n-yu, te cuiní-í sá cùndècú-yu núú cùndècu-í cuendá quini-yu sá quidé càhnu ñaha-n xii-í chi duca<sup>n</sup>-ni cùu iní ñáhá-n xìi yúhú ndéé cùtnàhá vátá ngăva-gá ñuyíú. <sup>25</sup> Táu, yòhó ío yíñùhu ndecu-n. Te ñáyiu ndècu ichi cuehé ichi duha ñá túú xìní ñáhă-yu xii-n, dico yúhú chi xìní ñáhà-í xii-n, dico ñáyiu ní sándáá iní ñáhá xii-í sa xìní-yu sá díú-n ñí tendaha ñàha-n xii-í véxi-í ñuyíú-a. <sup>26</sup> Te sa xăha<sup>n</sup>-í xií-yu yoo cùu-n, te ñiu-ni duca<sup>n</sup> càda-í cuendá cuu iní tnáhă-yu dàtná cúú ìní ñáhá-n xii-í, te duca<sup>n</sup> cùndecu-í ndihí-yu —càchí-gá xáha<sup>n</sup>-gă xii Tătá-gă Dútú Ndiöxí.

## 18

*Ní tnî-güedé Jèsús ndécá ñàha-güedé cuáhán*  
(Mt. 26:47-56; Mr. 14:43-50; Lc. 22:47-53)

<sup>1</sup> Te sátá dúcá<sup>n</sup> ñí cáhá<sup>n</sup> Jèsús, te ní quee-gá ndihí cue téé xica cuu ndihí-gá cuáhán-güedé ndàa ingá xio yuhu yùú Cèdrón. Te yàcá<sup>n</sup> cáá ñí<sup>n</sup> lahuertá, te xití lahuertá-án cuănguïhu Jèsús ndihí cue téé xica cuu ndihí-gá. <sup>2</sup> Te té Jüdás déhe té Xímú Iscàrioté téé ní sáha cuendá ñáhá xii-gá núú cué téé cùu úhú iní ñáhá sa xìní-dé lahuertá-án chi titní xito ní sáhán Jèsús ndihí-güedé xía<sup>n</sup>. <sup>3</sup> Núu ndáá ichi xía<sup>n</sup> ñí sáá té Jüdás ndihí vâi sandadú, ndihí cue téé quide cuendá veñúhu ní techi<sup>n</sup> ñàha cue dútú cùnùu, ndihí cue téé cùu fariséú. Te xînehe-güedé machití ndihí ñí<sup>n</sup> ũú-gá sá dĕé<sup>n</sup>, te yòtnúú-güedé lintérná ndihí ití ní sáá. <sup>4</sup> Te Jèsús sa nàha-gá nchaa

nàcuáa cada ñaha-güedě xii-gá nõu ní sáhá<sup>n</sup> tuha ñaha-gă xii-güedé, te ní xáha<sup>n</sup>-gă:

—¿Yoo nànducu-ndo? —cachí-gá xáha<sup>n</sup>-gă xii-güedé.

<sup>5</sup> Te ní xáha<sup>n</sup>-güedě:

—Jèsús tée ñuú Nazàrét nándücu-ndí —càchí-güedé xáha<sup>n</sup>-güedě xii-gá.

Te ní xáha<sup>n</sup> Jèsús:

—Yúhú duca<sup>n</sup> nàni-í, te náu-í ndécú-á te núu yúhú nándücu-ndo —cachí-gá xáha<sup>n</sup>-gă xii-güedé.

Te tnàhá té Jüdás tée ní sáha cuèndá ñáhá xì-gá ndìhi-güedé. <sup>6</sup> Te òré ní xáha<sup>n</sup> Jèsús sá díú-gă cúu tée nànducu-güedé, te ní nacaca dùma-güedé te ní nduá-güedé ndéé ñuhu. <sup>7</sup> Te ní xícá<sup>n</sup> tnúhú tùcu Jèsús núu-güedě yoo nànducu-güedé. Te ní xáha<sup>n</sup> tùcu-güedé sá Jèsús tée ñuú Nazàrét nándücu-güedé, <sup>8</sup> núu ní xáha<sup>n</sup>-nă Jèsús:

—Sa ní cáhá<sup>n</sup>-í sá díú yúhú duca<sup>n</sup> nàni-í, te núu yúhú nándücu-ndo, te dañà-ndo nchàa cue tée iha na nùhú-güedé —càchí-gá xáha<sup>n</sup>-gă xii-güedé.

<sup>9</sup> Duha ní cuu chi ní quee ndáá-xi nàcuáa ní cáhá<sup>n</sup> méé Jèsús chi ní cachí-gá sá ncháá ñăyiu ní sáha cuèndá ñáhá Yă Ndiõxí cundecu ndìhi-gá vá cuíta nihnú-yu. <sup>10</sup> Te té Xímú, àdi Pelú chi úú diù-dé, néhé-dě ì# machìtí, te ní tava-dé machìtí-á<sup>n</sup> ñ#-xi te ní xehndé-dé lóho xio cùha ì# téé nàni Malcú ní quéndeé duu<sup>n</sup>. Te téé-á<sup>n</sup> xínú cuèchi-dé núu dütú cúnùu-gá. <sup>11</sup> Te ní xáha<sup>n</sup> Jèsús xii té Pèlú:

—Nataxúha machìtí-á<sup>n</sup> nõú ñúhú-xí, chi dacuítí să ndóhò-í nàcuáa ní cachí Tătà-í cunduu —càchí-gá xáha<sup>n</sup>-gă xii-dé.

*Jèsús ndécú-gă núú dütú cúnùu-gá  
(Mt. 26:57-58; Mr. 14:53-54; Lc. 22:54)*

<sup>12</sup> Te cue sandàdú ndihì cue tée cùnùu-gá núú-güedě, ndihì cue tée quide cuendá veñúhu ní tñii-güedé Jèsús, te ní dácútú ñàha-güedé. <sup>13</sup> Te ndèca ñaha-güedé xii-gá cuáhá<sup>n</sup> núú ndécú tě Ànás, te té Ànás-á<sup>n</sup> cúú-dě tătă ñadìhí té Caiřás. Te té Caiřás-á<sup>n</sup> ñi cuu-dé dütú cúnùu-gá cuiá-ă<sup>n</sup>. <sup>14</sup> Te diu-ni tée-á<sup>n</sup> ñi xáha<sup>n</sup>-dě xii ñáyiù isràél sá vâha-gá sá íí<sup>n</sup>-ní tée na cùú-dé sá cuendá-yu nchaá-yu.

*Té Pèlú càhá<sup>n</sup>-dé núú ñăyiù sá ñà túú xìní-dé Jèsús  
(Mt. 26:69-70; Mr. 14:66-68; Lc. 22:55-57)*

<sup>15</sup> Te té Pèlú, àdi Xímú chi úú diù-dé, ndihì ingá tucu-dé nàcuáa xica cuu ndihì-güedé Jèsús nchìcú<sup>n</sup> ñáhá-güedě xii-gá cuáhá<sup>n</sup>. Te íí<sup>n</sup> tée-á<sup>n</sup> xìní tnáhá-dě ndihì dütú cúnùu-á<sup>n</sup> nùu nchìcú<sup>n</sup>-dé tnáhá-dé Jèsús cuánguihu ndée núú cáá vèhe tée cùnùu-á<sup>n</sup>. <sup>16</sup> Dico té Pèlú ní ndóo-dé yuyèhe ndaa quehé, núu ní ndee tée ndihì té Pèlú-á<sup>n</sup> ñi càhá<sup>n</sup> ndihì-dé ñaha ndée yuyèhe, te ndèca-dé té Pèlú cuánguihu. <sup>17</sup> Te ní xáha<sup>n</sup> ñàha ndée yuyèhe-á<sup>n</sup> xii té Pèlú:

—¿Náa ñá díú yòhó tnáhá-n xica cuu ndihì-n tée ndèca-güedé cuánguihu-a? —càchí-a<sup>n</sup> xáha<sup>n</sup>-a<sup>n</sup> xì-dé.

Te ní xáha<sup>n</sup> tě Pèlú:

—Ñáhá, ñá túú tée-ă<sup>n</sup> xicá cùu ndihì-ú —càchí-dé xáha<sup>n</sup>-dě xii-a<sup>n</sup>.

<sup>18</sup> Te ío víxi<sup>n</sup> quide-xi núu cue tée xìnu cuechi, ndihì cue tée quide cuendá veñúhu ní dátñáhá-güedé ñuhú, te xínutñí teté-güedé ndihì té Pèlú.

*Dútú cúnùu nducu tnúhu-dé núú Jèsús  
(Mt. 26:59-66; Mr. 14:55-64; Lc. 22:66-71)*

<sup>19</sup> Te dútú cúnùu ní xíca<sup>n</sup> tnúhú-dě núú Jèsús nùu nándi cùu cue tée xíca cuu ndihi-gá, te nándi sá dánèhé ñáhá-gă xii-güedé. <sup>20</sup> Te ní xáha<sup>n</sup>-gă:

—Yúhú càhá<sup>n</sup> ndodo-í núú nchaa ñáyiu cuëi xití veñúhu càhnu sá ïo cùnùu, te cuëi xití nchaa dava-gá veñúhu núú tàcá nchaa ñáyiu isràél duca<sup>n</sup>-ni dànèhé-í-yu, te ñá túú dàyuhu cáhá<sup>n</sup>-í. <sup>21</sup> Núu vá càcá<sup>n</sup> tnúhú-n nùu-í. Cúcá<sup>n</sup> tnúhú núú nchaa ñáyiu sàcúndedóho tnúhu càhá<sup>n</sup>-í, te na càhá<sup>n</sup>-yu núu nása ndùu tnúhu càhá<sup>n</sup>-í chi xìní-yu —càchí-gá xáha<sup>n</sup>-gă xii-dé.

<sup>22</sup> Te sá dúcá<sup>n</sup> ñí cáhá<sup>n</sup> Jèsús nùu ì<sup>n</sup> tée quide cuendá veñúhu nùtní-dé tnàhá-dé te ní cani-dé ì<sup>n</sup> déhndé nùu-gă. Te ní xáha<sup>n</sup>-dè:

—¿Ná cuendá duca<sup>n</sup> càhá<sup>n</sup>-n nùú dútú cúnùu-i?  
—cachí-dé xáha<sup>n</sup>-dè xii-gá.

<sup>23</sup> Te ní xáha<sup>n</sup> Jèsús xii-dé:

—Te núu nèhé ní cáhá<sup>n</sup>-í te cáhá<sup>n</sup>-n nása ndùu tnúhu ní cáhá<sup>n</sup>-í, te yúhú càhá<sup>n</sup> váha-í te duca<sup>n</sup> càniha-n —cachí-gá xáha<sup>n</sup>-gă xii-dé.

<sup>24</sup> Te ndùtu yoho-ni Jesús ní dánùhú ñáhá tẽ Ànás xii-gá ndaha té Caifás dútú cúnùu-gá.

*Té Pèlú càhá<sup>n</sup> tucu-dé núú ñáyiu sá ñà túú xìní-dé  
Jèsús*

*(Mt. 26:71-75; Mr. 14:69-72; Lc. 22:58-62)*

<sup>25</sup> Te té Pèlú nùtní teté-ni-dé, te ní xáha<sup>n</sup>-güedé xii-dé:

—¿Náa ñá díú tnàhá yòhó xíca cùu ndihi tée ndèca-ndí véxi-ã<sup>n</sup>? —càchí-güedé xáha<sup>n</sup>-güedé xii-dé.



Te ní xáha<sup>n</sup> tẽ Pèlú:

—Ñáhá, ñá túú tẽe-á<sup>n</sup> xícá cùu ndìhi-ú —càchí-dé xǎha<sup>n</sup>-dẽ xii-güedé.

<sup>26</sup> Te ì<sup>n</sup> ñani tñáhá tẽe ní xehndé té Pèlú lóho-xi-á<sup>n</sup> xínú cuèchi-dé tñáhá-dé núú dütú cúnùu. Te tẽe-á<sup>n</sup> nĩ xáha<sup>n</sup>-dẽ xii té Pèlú:

—¿Náa ñá díú tñáhá-n ndìhi-n-dé ní xiní ñáhà-í òré ní tñi-ndí-dé xití lahuèrtá? —càchí-dé xǎha<sup>n</sup>-dẽ xii-dé.

<sup>27</sup> Te té Pèlú ní xáha<sup>n</sup> tùcu-dé sá ñà díú-dẽ, te òré-á<sup>n</sup> nĩ cana ì<sup>n</sup> lĩhi.

*Jèsús ndécú-gǎ núú tẽ Pilatú*

*(Mt. 27:1-2, 11-14; Mr. 15:1-5; Lc. 23:1-5)*

<sup>28</sup> Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáhá<sup>n</sup> vechiù<sup>n</sup> tée cùu gobiernú. Te sa ta cùdító-ni-gá cuáhá<sup>n</sup> nũ ñá ní cuíní cue tée isràél quíhu-güedé xití vechiù<sup>n</sup> tée cùu gobiernú-á<sup>n</sup>. Te núu nì quíhu-güedé vechiù<sup>n</sup>-á<sup>n</sup> ñá, te vá cúú-gǎ quíhu-güedé cudìni-güedé vico pàscuá ní cùu chi duca<sup>n</sup> tñahí quìde-güedé. <sup>29</sup> Núu té Pilatú tée cùu gobiernú ní quee-dé vechiù<sup>n</sup>-dé ní cáhá<sup>n</sup> ndìhi ñaha-dẽ xii-güedé, te ní xáha<sup>n</sup>-dẽ:

—¿Ná cuèchi ní quide tée-a núu ndèca-ndo-dé véxi? —càchí-dé xǎha<sup>n</sup>-dẽ xii-güedé.

<sup>30</sup> Te ní xáha<sup>n</sup>-güedẽ:

—Te núu dicó ñá túú cuèchi-dé-á<sup>n</sup> te vá cándèca-ndí-dé quixi núú-n ní cùu —cachí-güedé xǎha<sup>n</sup>-güedé xii-dé.

<sup>31</sup> Te ní xáha<sup>n</sup> tùcu té Pilatú xii-güedé:

—Chí cándèca-dé cuánùhú, te cada ndáá-ndó cuèchi-dé nàcuáa càa leí méé-ndó —càchí-dé xǎha<sup>n</sup>-dẽ xii-güedé.

Te ní xáha<sup>n</sup>-güedẽ:

—Dico nchúhú ñáyiú isràél chi ñá túú dùca<sup>n</sup> taxi tñuní lèi sá cáhní-ndí —càchí-güedé xáha<sup>n</sup>-güedé xii-dé.

<sup>32</sup> Te duca<sup>n</sup> ñí cuu chi dacu<sup>tí</sup> ñí quee ndáá-xi nàcuáa ní cáhá<sup>n</sup> méé Jèsús cada-xi cuú-gá. <sup>33</sup> Te cuándihu té Pìlatú vechi<sup>u</sup>-dé, te ní cana-dé Jèsús ní xicá<sup>n</sup> tñuhú-dě núú-gă, te xáha<sup>n</sup>-dě:

—¿Yòhó yíndàha-n ñáyiú isràél-ă<sup>n</sup>? —càchí-dé xáha<sup>n</sup>-dě xii-gá.

<sup>34</sup> Te ní xáha<sup>n</sup> Jèsús:

—¿Te xiă<sup>n</sup> càhá<sup>n</sup>-n sã vëxi iní méé-n, àdi ió ñí ñáyiú ní cachí tñuhu xii-n cuendá-í? —càchí-gá xáha<sup>n</sup>-gă xii-dé.

<sup>35</sup> Te ní xáha<sup>n</sup> tē Pìlatú xii-gá:

—Ñá díú tēe isràél cúu-í nũ duca<sup>n</sup> cáhá<sup>n</sup>-n, chi cue ñaní tñáhá-n cuè tēe isràél ndíhi cue dútú cúnũu ní taxi cuendá ñáhá-güedé xii-n ìha. ¿Te ná ní quide-n? —càchí-dé xáha<sup>n</sup>-dě xii-gá.

<sup>36</sup> Te ní xáha<sup>n</sup> Jèsús:

—Ñá díú tēe ñuyíú-a cùu-í te ni ñà túú vëxi-í taxi tñuní-í ñuyíú-a, chi núu dicó iha tàxi tñuní-í á<sup>n</sup> te cue tēe xica cuu ndíhi-í nàá-güedé ndíhi cue tēe isràél cuendá sá vă tñí ñàha-güedé xii-í ní cùu, dico ñá túú vëxi-í sá táxi tñuní-í ñuyíú-a —càchí-gá xáha<sup>n</sup>-gă xii-dé.

<sup>37</sup> Te ní xáha<sup>n</sup> tē Pìlatú:

—¿Te tēe yíndaha ñáyiú cùu-ó vání? —càchí-dé xáha<sup>n</sup>-dě xii-gá.

Te ní xáha<sup>n</sup> Jèsús:

—Te dàtná càchí-n-ă<sup>n</sup> yíndaha ndisa-í ñáyiú, chi yúhú véxi-í ñuyíú-a te iha ní cacu-í te càhá<sup>n</sup>-í mee-ni tñuhu ndáá. Te nchaa ñáyiú na cùd<sup>í</sup> ìní-xi

tnúhu ndáá, te tedóho-yu nchaa tnúhu càhá<sup>n</sup>-í —  
càchí-gá xáha<sup>n</sup>-gã xii-dé.

<sup>38</sup> Te ní xáha<sup>n</sup> tẽ Pìlatú:

—¿Te ná cúu-tu tnúhu ndáá-ái<sup>n</sup>? —càchí-dé  
xáha<sup>n</sup>-dẽ xii-gá.

*Càchí-güedé sá cáhni-güedẽ Jèsús*

*(Mt. 27:15-31; Mr. 15:6-20; Lc. 23:13-25)*

Te sáta nĩ yáha ní xícá<sup>n</sup> tnúhú tẽ Pìlatú núú Jèsús,  
te ní quee tucu-dé quehé, te xáha<sup>n</sup>-dẽ xii cue téé  
isràél:

—Ñá túú nã cuéchi téé-a. <sup>39</sup> Te váha-ni chi duca<sup>n</sup>  
tnàhí quide nchohó sá ndì tnahá nduu vico pascuá  
cuiní-ndó sã dácácu-í ì<sup>n</sup> téé yìhi vecaá. Te núu  
cuiní-ndó te na dácácu-í téé yìndaha ñaha xii-ndo  
—cachí-dé xáha<sup>n</sup>-dẽ xii-güedé.

<sup>40</sup> Te sá dúcá<sup>n</sup> nĩ cáhá<sup>n</sup>-dé, núu nchaa-güedé níhi  
ní cáhá<sup>n</sup>-güedé, te xáha<sup>n</sup>-güedé:

—¡Vá dácácu-n tẽe-á<sup>n</sup>, té Barrábás dácácu-n! —  
càchí-güedé xáha<sup>n</sup>-güedé xii-dé.

Te té Barrábás-á<sup>n</sup> nĩ cuu-dé ì<sup>n</sup> ñadúhú.

## 19

<sup>1</sup> Te té Pìlatú ní táuchíu<sup>n</sup>-dẽ ní tnì ñaha cuè  
sandadú xii Jèsús, te ní caniha-güedé xii-gá ndìhi  
ñìi. <sup>2</sup> Te ñiu-ni cue téé-á<sup>n</sup> nĩ cadúha-güedé ì<sup>n</sup>  
coróná iñu ní chihí-güedé díquí-gã, te ní dáquũ nuu  
ñaha-güedé xii-gá ì<sup>n</sup> dóó tícuèhé víhí. <sup>3</sup> Te ní sáhá<sup>n</sup>  
ndehe yatni-gá-güedé núú-gã, te ní xáha<sup>n</sup>-güedé:

—¡Ío càhnu cuu yohó téé yìndaha ñaha xii ñáyiu  
isràél! —càchí-güedé xáha<sup>n</sup>-güedé cúdíquí ndeé  
ñáhá-güedé xii-gá.

Te ní cani-güedé déhndé núú-gã.

<sup>4</sup> Te ní quee tucu té Pilatú quehé te ní xáha<sup>n</sup>-dě xii nchaa ñáyiú xĩndecu quehé:

—Te cundehe-ndo-dě ná ndéé ñùhu-í-dé iha, chi yúhú sǎha-í cuendá sá ñà túú cuěchi-dé —càchí-dé xǎha<sup>n</sup>-dě xií-yu.

<sup>5</sup> Te ní ndeñuhu ñaha té Pilatú xii Jèsús xití vechiù<sup>n</sup>-dé te ñùhu ì<sup>n</sup> coroná iñu díquí-gǎ, te ñihnu-gá dóó tícuèhé víhí-ǎ<sup>n</sup>. Te ní xáha<sup>n</sup> tǎ Pilatú xií-yu:

—¡Nái-dé-a! —càchí-dé xǎha<sup>n</sup>-dě xií-yu.

<sup>6</sup> Te ní xiní ñáhá cuè dútú cúnùu ndìhi cue téé quide cuendá veñúhu. Te ní cuáá-güedé, te xǎha<sup>n</sup>-güedé:

—¡Cata caa-dé! ¡Cata caa-dé núú cùrúxí! —càchí-güedé xǎha<sup>n</sup>-güedé xii-dé.

Te ní xáha<sup>n</sup> tǎ Pilatú:

—Váha-gá ñùu candeca mee-ndo-dě quíhí<sup>n</sup> cata caa-ndo-dě núú cùrúxí, chi yúhú cútnùní iní-í sá ñà túú na cuěchi-dé —càchí-dé xǎha<sup>n</sup>-dě xii-güedé.

<sup>7</sup> Te ní xáha<sup>n</sup> cuè téé isràél:

—Léí ndécú ndìhi nchúhú càchí-xi sá dài cuú-dé, chi càchí-dé sá Dǎhe Yá Ndiǒxí cúú-dě —càchí-güedé xǎha<sup>n</sup>-güedé xii-dé.

<sup>8</sup> Te sá dúcá<sup>n</sup> ñí xáha<sup>n</sup>-güedé xii té Pilatú, te vaa-gá ní yúhú-dé. <sup>9</sup> Núu cuándìhu tucu-dé vechiù<sup>n</sup>-dé, te ní xáha<sup>n</sup> tùcu-dé xii Jèsús:

—¿Te yòhó ndèé téé cùu-n-i? —cachí-dé xǎha<sup>n</sup>-dě xii-gá.

Dico Jèsús ñá túú ní cǎhá<sup>n</sup>-gá.

<sup>10</sup> Núu ní xáha<sup>n</sup> tǎ Pilatú xii-gá:

—¿Te vá càchí tnúhu-n ñùu ndèé téé cùu-n-u? ¿Náa ñá túú xìní-n sǎ yúhú táxí tnùní-í, te cuu-ni tauchiù<sup>n</sup>-í cata caa ñaha-güedé xii-n núú cùrúxí

cuú-n, te cuu-ni dàcácu ñaha-ĩ xii-n-ǎn? —càchí-dé xǎha<sup>n</sup>-dě xii-gá.

<sup>11</sup> Te ní xáha<sup>n</sup> Jèsús:

—Yòhó ñá túú sǎ táxí tnùní ñáhá-n xii yúhú ní cùu núu ñá túú Yǎ Ndiǒxí ní cuení-gá sá dúcá<sup>n</sup> cùnduu, te téé ní taxi cuendá ñáhá xii-í núu-n tǎe-á<sup>n</sup> ïo-gá ndècuéchi-dé dàcúxí yòhó —càchí-gá xáha<sup>n</sup>-gǎ xii-dé.

<sup>12</sup> Te òré-á<sup>n</sup> ñǎ ngüíta té Pilatú ndúcú-dě nàcuáa cada-dé dàcácu-dé Jèsús ní cùu, dico cue téé isràél ní ngüíta-güedé ní cuáá-güedé, te xǎha<sup>n</sup>-güedé:

—Te núu na dàcácu-n tǎe-á<sup>n</sup>, te ñá díú tǎe tnàhá tnúhu ndihí té Cèsár cúú-n. Chi ndéda-ni cǎa téé na càchí sá cúú-dě téé yìndaha ñaha xii ñáyiu cùu úhú iní-dé té Cèsár. Te té Jèsús-á<sup>n</sup> càchí-dé sá táxí tnùní-dé —càchí-güedé xǎha<sup>n</sup>-güedé xii-dé.

<sup>13</sup> Te sá dúcá<sup>n</sup> ñǎ xáha<sup>n</sup>-güedé xii té Pilatú núu ní quee-dé ndihí Jèsús cuáhá<sup>n</sup> ndihí ñaha-dě corrèdór núú ñǎ quee mee-ni yúú vǎha núú ñúhú, te xía<sup>n</sup> nání-xí Gǎbatá tnúhu hèbreú. Te xía<sup>n</sup> ndécú xilé sácóo nchihí té Pilatú xèhndé-dé cuéchi ñáyiu, núu ní nucóo-dé núú xilé-dé òré ní quexìo-dé ndihí Jèsús. <sup>14</sup> Te cùu-xi datná cuádava nduu, nduu vèspré vico pàscuá. Te ní xáha<sup>n</sup> tǎ Pilatú xii ñáyiu isràél:

—¡Nái téé yìndaha ñaha xii-ndo-a! —cachí-dé xǎha<sup>n</sup>-dě xii-yu.

<sup>15</sup> Te ní cuáá-yu, te xǎhǎ<sup>n</sup>-yu:

—¡Cahni-dé! ¡Cahni-dé! ¡Cata caa-dé núú cùrúxí! —càchí-yu xǎhǎ<sup>n</sup>-yu.

Te ní xáha<sup>n</sup> tǎ Pilatú:

—¿Te yúhú cata caa-í téé yìndaha ñaha xii-ndo-u? —cachí-dé xǎha<sup>n</sup>-dě xii-yu.

Te cue dútú cúnùu ní xáha<sup>n</sup>-güedé:

—Nchúhú ñá túú-gă té yìndaha ñaha xii-ndí, chi ì#ndì-ni té Cèsár yìndàha ñaha-dé xii-ndí — cächí-güedé xǎha<sup>n</sup>-güedě xii-dé.

<sup>16</sup> Te té Pilatú ní xáha<sup>n</sup>-dě ní quehe<sup>n</sup> cuendá-güedé Jèsús ndécá ñaha-güedé cuáhá<sup>n</sup> cata caa ñaha-güedě núú cùrúxí.

*Sàta caa-güedé Jèsús núú cùrúxí*

*(Mt. 27:32-44; Mr. 15:21-32; Lc. 23:26-43)*

<sup>17</sup> Te ní quee Jèsús nchídó-gă cùrúxí cuáhá<sup>n</sup> ì#n xichi núú nání Yìquì Díquí Ndíyì. Te tnúhu hèbreú queé-xí Gōlgotá. <sup>18</sup> Te yàcá<sup>n</sup> ní sata caa ñaha-güedě xii-gá núú cùrúxí-á<sup>n</sup>. Te xio xio dǎñi-gá ní sata caa-güedé úú cue té ndècu ndisa cuéchi-xi ði-u-ni núú cùrúxí tucu. <sup>19</sup> Te ní táúchíú<sup>n</sup> tǎ Pilatú ní taxi ndecu-güedé ì#n sá ndéé lètrá núú cùrúxí tá cǎa-gá, te duha cächí lètrá-á<sup>n</sup>: “Jèsús téé ñuú Nazàrét, téé yìndaha ñaha xii ñáyiú isràél”, duha cächí-xi. <sup>20</sup> Te vài ñáyiú isràél ní xiní-yu nàcuáa cǎhá<sup>n</sup> lètrá-á<sup>n</sup>, chi yatni-ni yuhu ñuú ní sata caa ñaha-güedě xii-gá núú cùrúxí. Te lètrá-á<sup>n</sup> cǎhá<sup>n</sup>-xi tnúhu hèbreú, te cǎhá<sup>n</sup>-xi tnúhu griégú, te cǎhá<sup>n</sup>-xi tnúhu làtín. <sup>21</sup> Te ní xáha<sup>n</sup> cuè dútú cùnùu xii té Pilatú:

—Vá táuchìu<sup>n</sup>-n tee-güedé lètrá cǎhá<sup>n</sup>-xi “Tée yìndaha ñaha xii ñáyiú isràél” ní cùu, váha-gá tauchìu<sup>n</sup>-n tee-güedé lètrá cǎhá<sup>n</sup>-xi “Tée cächí yìndàha ñaha xii ñáyiú isràél ní cùu” —cachí-güedé xǎha<sup>n</sup>-güedě xii-dé.

<sup>22</sup> Te ní xáha<sup>n</sup> tǎ Pilatú:

—Nàcuáa ní táuchíu<sup>n</sup>-í ní tee-güedé te duca<sup>n</sup> quèndóo-xi —cächí-dé xǎha<sup>n</sup>-dǎ xii-güedé.

<sup>23</sup> Te sátá ñí sata caa ñaha cuè sandadú xii Jèsús núú cùrúxí, te cúmí xichi ní quide-güedé dóó-gă,

te ì<sup>n</sup> ì<sup>n</sup> xichi dóó-gă ní cáhñu cue sandadú-á<sup>n</sup>. Te ndècu ì<sup>n</sup> dóó-gă dóó cání ñà túú ní t̃cu. <sup>24</sup> Te cuendá dóó-ă<sup>n</sup> ní xitnàha cue sandadú-á<sup>n</sup>:

—Vá ndátá-ó d̃ó-a, váha-gá ñu na còto ndéé-ó cuendá quini-ó ndèdaca-a-o cuu cuendá-ó — cächí-güedé xitnàha-güedé.

Te duca<sup>n</sup> ñ̃ quide-güedé chi ní quee ndáá-xi nàcuáa cãhá<sup>n</sup>-xi núú t̃tú Yă Ndiõxí núú cächí-xi: “T̃t̃ní xichi ní cáhñu-güedé dóò-í. Te ní xito ndéé-güedé cuendá cutññí iní-güedé ndèdaca-a-güedé níhí-güedé dóò-í”, duha cächí-xi núú t̃tú-gá. Te sá dúcá<sup>n</sup> cãhá<sup>n</sup>-xi núú t̃tú Yă Ndiõxí ñu x̃ã<sup>n</sup> duca<sup>n</sup> ñ̃ quide cue sandadú-á<sup>n</sup>.

<sup>25</sup> Te yatni d̃ñ̃i curúxí núú t̃càa Jesús ñutñi ñaná-gă, ndih̃i cùhú-xi, ndih̃i tá Màriá ñ̃ad̃h̃i té Clèofás, ndih̃i tá Màriá Magdalèná. <sup>26</sup> Te ní xiní Jèsús ñaná-gă ñutñi-a<sup>n</sup> d̃ñ̃i ì<sup>n</sup> tée ní xica cuu ndih̃i-gá, tée ío cùu iní-gá, te ní xáha<sup>n</sup>-gă xii ñaná-gă:

—Ñáá, tée ñutñi-á<sup>n</sup> nduu-dé d̃atñá déhe mee-n —cächí-gá xáha<sup>n</sup>-gă xii-a<sup>n</sup>.

<sup>27</sup> Te ní xáha<sup>n</sup>-gă xii tée ní xica cuu ndih̃i-gá-á<sup>n</sup>:

—Ñaha-á<sup>n</sup> nduu-a<sup>n</sup> d̃atñá ñaná méé-n —cächí-gá xáha<sup>n</sup>-gă xii-dé.

Núú ndéé dàvá-á<sup>n</sup> ñ̃ nduu ñaná ñ̃áhá t̃e-á<sup>n</sup> xii ñaná-gă.

### *Ní xihí Jèsús*

*(Mt. 27:45-56; Mr. 15:33-41; Lc. 23:44-49)*

<sup>28</sup> Te ní cutññí iní Jèsús sá ñ̃ ndih̃i chi<sup>n</sup> ní táhú T̃t̃á-gă Dútú Ndiõxí ní quide-gá ñu ní cachí-gá:

—Yìchí-í ndute —cächí-gá.

Te duha ní cáhá<sup>n</sup>-gá chi ní quee ndáá-xi nàcuáa cãhá<sup>n</sup>-xi núú t̃tú Yă Ndiõxí.

29 Te ndècu ìn lítu ñùhu ndudí íá. Te sá dúcá<sup>n</sup> ñí cáhá<sup>n</sup>-gá sá yìchí-gá ndute, núu xíá<sup>n</sup> ní quehe<sup>n</sup>-güedé cächí te ní chindóyo-güedé xítí ndudí íá-á<sup>n</sup>, te ní chinenu-güedé díquí ìn díté yutnu nàni hisópó, te ní ndocani-güedé ní chihi-güedé yuhu-gá. 30 Te sátá ñí xihí-gá ndudí íá-á<sup>n</sup>, te cächí-gá:

—Vitna ní dáyínu cava-í nchaa chù<sup>n</sup> ní cachí Tātá-í cada-í —duha ní cachí-gá.

Te ní xócuíta dúcú<sup>n</sup>-gã ndàa núú-gã, te ní xihí-ni-gá.

*Ìn sandàdú ní caá<sup>n</sup>-dé yiqui naha Jèsús ndihí ìn pùyá yíhí caá núú-xi*

31 Te cuendá sá ndùu vispré vico pàscuá cúú-xí núu ñá ní cuíní cue tée isràél cundecu-ni yiqui cùñú-gá núú cùrúxí ndihí yiqui cùñú cue tée ní sata caa-güedé dñi-gá, chi cuendá nduu tnée-á<sup>n</sup> cúú-xí ndùu ndetatú ñáyíu, te ío quide cahnú-yu nduu-á<sup>n</sup>, núu ní xáha<sup>n</sup>-güedě xii té Pilatú sá táuchù<sup>n</sup>-dé quíhí<sup>n</sup> cue tée cáhnú-güedé díhí<sup>n</sup> Jèsús ndihí díhí<sup>n</sup> cue tée tàcaa ndihí-gá, te xocàni-güedé yiqui cùñú-gá ndihí yiqui cùñú-güedé yàcá<sup>n</sup>. 32 Te sátá dúcá<sup>n</sup> te ní sáhá<sup>n</sup> cue sandàdú ní sáhnú-güedé díhí<sup>n</sup> cue tée tàcaa xio xio dñi Jesús. 33 Te òré ní cuyatni-güedé núú-gã, te ní xiní-güedé sá sà ní xihí-gá núu ñá ní sáhnú-güedé díhí<sup>n</sup>-gá.

34 Dico ìn sandàdú-á<sup>n</sup> ñí cúxi-dé pùyá néhé-dě ìn xio yiqui naha-gã, te yìhí caá núú-xi núu ní caá<sup>n</sup>-xi yiqui naha-gã ní quee níñí ndihí ndute cuí. 35 Te yúhú té Juàá tée ní cadúha tutú-a ní xiní-í nàcuáa ní cuu ní xihí Jèsús, te xíá<sup>n</sup> núu càhá<sup>n</sup>



ndáá-í cuendá quíndáá iní-ndó. <sup>36</sup> Te duca<sup>n</sup> ñí cuu ñá ní sǎhnú-güedé díh<sup>i</sup><sup>n</sup> Jèsús, chi ní quee ndáá-xi nàcuáa càhá<sup>n</sup>-xi núú tütú Yǎ Ndiǒxí núú càchí-xi: “Vá càhnú-güedé ni ì<sup>n</sup> yìqui-gá”, duha càchí-xi. <sup>37</sup> Te duca<sup>n</sup> ñí quide-güedé Jèsús ní caá<sup>n</sup>-güedé yìqui naha-gǎ, chi ìngá xichi núú tütú Yǎ Ndiǒxí càchí-xi: “Sáá nduu te quini-güedé ì<sup>n</sup> téé ní dǎncuèhé-güedé”, duha càchí-xi.

### *Chìndúxi-güedé Jèsús*

*(Mt. 27:57-61; Mr. 15:42-47; Lc. 23:50-56)*

<sup>38</sup> Te sǎtá dúcá<sup>n</sup> ñí cuu, te té Chèé téé ñúú Arimàtea tñàhá-dé ní sǎndáá iní-dé tñúhu Jèsús dico dayuhu, chi ní xóo yùhú-dé cue téé cùnuu núú ñǎyiu isràél. Te téé-á<sup>n</sup> ñí xáha<sup>n</sup>-dè xii té Pilatú ñúu vá dáñá-dè canehe-dé yìqui cùñú Jèsús quíh<sup>i</sup><sup>n</sup> chindúxi-dé, te té Pilatú ní xáha<sup>n</sup>-dè xii-dé sá cúú cànehe-dé yìqui cùñú Jèsús quíh<sup>i</sup><sup>n</sup>, núú ní sáhá<sup>n</sup>-dè ní nuu nehe-dé yìqui cùñú-gá núú cùrúxí nchídó-dè cuáhá<sup>n</sup>. <sup>39</sup> Te té Nicòdemú téé ní sáhá<sup>n</sup> niú ní cáhá<sup>n</sup> ndih<sup>i</sup>-dè Jèsús ndéé díhna, téé-á<sup>n</sup> néhé-dè ócó úxí kílú yuchi ní cuáha mee-ni yúcú sǎ nání mìrrá ndih<sup>i</sup> yúcú sǎ nání àloés. Te ío váha tñàmi sahá<sup>n</sup>. <sup>40</sup> Te ní naníhí tñàhá-dè ndih<sup>i</sup> té Chèé, te ní chidúcú<sup>n</sup>nuu-güedé yìqui cùñú Jèsús mee-ni dǒó vǎha, te nàcuáa ta dùcu<sup>n</sup> nuu-güedé yìqui cùñú-gá dóó-ǎ<sup>n</sup>, te duca<sup>n</sup> ta chido-güedé yuchi sáhá<sup>n</sup> tñámí-ǎ<sup>n</sup> ñúú dǒó-ǎ<sup>n</sup> chi duca<sup>n</sup> tñáhí quide ñǎyiu isràél òré chìndúxi tñàhá-yu. <sup>41</sup> Te yatní núú ñí sata caa-güedé Jèsús cáá ì<sup>n</sup> lahuertá. Te xití lahuertá-á<sup>n</sup> nchìì ì<sup>n</sup> yaú cava duha cuáhá<sup>n</sup> ndáá-xi, te vátá yóo ì<sup>n</sup>-gá nguíndúxi xíá<sup>n</sup>. <sup>42</sup> Te cuendá sá ñí cuyatni tñàhá nduu ndètátú ñǎyiu isràél ñúu xíá<sup>n</sup>

yaú cava nchíí yatni-ni xía<sup>n</sup> ñí chihi-güedé yiqui cùñú Jèsús.

## 20

*Jèsús ní ndoto-gá*

*(Mt. 28:1-10; Mr. 16:1-8; Lc. 24:1-12)*

<sup>1</sup> Te ndumìngú tacuìhndá-gá cuáhá<sup>n</sup> tá Màriá Magdalèná cuáhá<sup>n</sup> ngoto-xi yaú núú ñí chihi-güedé yiqui cùñú Jèsús, te ní sáá-xi ní xiní-xi sá ñà túú-gã ndèdí yúú yèhe yaú-á<sup>n</sup>. <sup>2</sup> Núu xínu-xi cuánuhú núú ndécú tẽ Xímú, àdi Pelú chi úú dèu-dé, ndìhi ìngá téé ní xica cuu ndìhi-gá téé ío cùu iní-gá, te ní xáha<sup>n</sup>-xi xì-güedé:

—Nèhe-güedé yiqui cùñú Jèsús cuáhá<sup>n</sup>, te ñá xíní-ó ndéé ní taxi ndecu-güedé —càhí-xi xãha<sup>n</sup>-xi xì-güedé.

<sup>3</sup> Te ní quee té Pèlú ndìhi ìngá téé-á<sup>n</sup> cuáhá<sup>n</sup> ndéhe-güedé yaú núú ñí chihi-güedé yiqui cùñú-gá.

<sup>4</sup> Te ndùú-güedé xínú-güedé cuáhá<sup>n</sup> ní cùu, dico ìngá téé-á<sup>n</sup> ñí cuu níhi-gá sáhá-dé cuáhá<sup>n</sup>-dé ñúu díhna-gá-dé ní sáá-dé yuhu yaú núú ñí chihi-güedé yiqui cùñú Jèsús ní cùu. <sup>5</sup> Te ní ngáundeyi-dé xító ñìhni-dé xítí yaú-á<sup>n</sup>, te ní xiní-dé mee-ñá dóó vãha sá ñí xíducú<sup>n</sup> nuu-gá yúú, dico ñá ní quíhu-dé. <sup>6</sup> Te sáta ñí sáá té Pèlú te cuánguihu-dé xítí yaú-á<sup>n</sup>, núu tñáhá-dé ní xiní-dé nchaa dóó ñí xíducú<sup>n</sup> nuu-gá yúú-ã<sup>n</sup>. <sup>7</sup> Te ní xiní-dé sá dõó ñí xíndútú dǐquí-gã ñá túú càtuu jundú-xi ndìhi dóó ñí xíducú<sup>n</sup> nuu-gá chi ní nadúcú<sup>n</sup>nuu-ná càtùu ì<sup>n</sup> xio. <sup>8</sup> Te nchícú<sup>n</sup> tucu téé ní sáá díhna-gá-á<sup>n</sup> cuánguihu xítí yaú-á<sup>n</sup>, te ní xiní-dé sá dõó-ñá yúú, te ñá túú-gã yiqui cùñú

Jèsús nũu ní sándáá iní-dé sá nĩ ndoto-gá. <sup>9</sup> Chi vátá tècú tnùnì-gá-güedé nàcuáa càhá<sup>n</sup>-xi núú tütú Yá Ndiõxí núú càchí-xi sá Jèsús ndoto-gá. <sup>10</sup> Te ní xícó ndì ndúú cue téé ní sángoto yaú núú nĩ chihi-güedé yiqui cùñú Jèsús ní cùu cuánuhú-güedé vehe-güedé.

*Jèsús ní naníhí tnáhá-gă ndíhi tá Màriá Magdalèná*

*(Mr. 16:9-11)*

<sup>11</sup> Te ní sáá tucu tá Màriá yuhu yaú núú nĩ chihi-güedé yiqui cùñú Jèsús te ní ngüita-xi ndàhyú-xi, te ní ngáundeyi-xi xìto nihni-xi xití yaú-á<sup>n</sup>. <sup>12</sup> Te xití yaú-á<sup>n</sup> nĩ xiní-xi úú espíritú xínú cuèchi núú Yá Ndiõxí xĩxíhnu-xi mee-ni dõó cuèxí<sup>n</sup> xĩndecu-xi núú ní cáa yiqui cùñú-gá. Te ì<sup>n</sup>-xi nùcõo núú nĩ cáa díquí-gă, te ì<sup>n</sup>-xi nùcõo núú nĩ cáa sáhá-gă. <sup>13</sup> Te espíritú-á<sup>n</sup> nĩ xáha<sup>n</sup>-xi xì tá Màriá:

—¿Ná cuendá ndàhyú-n? —càchí-xi xáha<sup>n</sup>-xi.

Te ní xáha<sup>n</sup> tă Màriá:

—Ndàhyú-í chi nèhe-güedé yiqui cùñú Yaá cúú Xĩtohó-í cuáhá<sup>n</sup>, te ñá túú xiní-í ndèé ní taxi ndecu-güedé —càchí-xi xáha<sup>n</sup>-xi xì cue espíritú-á<sup>n</sup>.

<sup>14</sup> Te tnúhu-ni-á<sup>n</sup> nĩ cáhá<sup>n</sup>-xi te ní nchócótó-xí ì<sup>n</sup> xio, te ní xiní-xi Jèsús nútní-gá dico ñá túú ní cùtnuní iní-xi sá díú mèe-gá. <sup>15</sup> Te ní xáha<sup>n</sup> Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáha<sup>n</sup>-gă xii-xi.

Te mee-xi nĩ sani iní-xi sá tēe xìto lahuertá-á<sup>n</sup> cúú tēe-á<sup>n</sup>, núu ní xáha<sup>n</sup>-xi:

—Tăta, te núu yòhó néhé-n yìquì cuñú Jèsús cuáhá<sup>n</sup>, te cáhá<sup>n</sup>-n ndèé ní taxi ndecu-n chi cuendá naquehe<sup>n</sup>-í canehe-í núhú —càchí-xi xáha<sup>n</sup>-xi.

16 Te ní cáhá<sup>n</sup> díú ñàha-gá xii-xi, te xáha<sup>n</sup>-gă:

—¡Màriá! —càchí-gá xáha<sup>n</sup>-gă xii-xi.

Te ní ndacoto-xi núú-gă, te ní cáhá<sup>n</sup>-xi tnúhu hèbreú, te xáha<sup>n</sup>-xi:

—¡Rabòní! —càchí-xi xáha<sup>n</sup>-xi. Te tnúhu-á<sup>n</sup> quée-xí Mèstrú.

17 Te ní xáha<sup>n</sup> Jèsús:

—Daña vá ngání ñàha-n chi vátá ndáá-gă-í núú ndécú Tàtá-í. Te núhú-n cǔñaha-n xii cue téé ío váha ní tnahá tnúhu ndihí-í sá ndáá-í núú ndécú Tàtá-í Dútú Ndiòxí, te ñu-gá cúú Tàtá-ndó nchàa-ndo, te ñu-ni-gá cúú Ndiòxí-ndó —càchí-gá xáha<sup>n</sup>-gă xii-xi.

18 Te ní natnii tá Màriá Magdalèná ichi cuánuhú-xi cúñaha-xi xii cue téé ní xica cuu ndihí-gá sá ñí xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gă xii-xi.

*Ní quexìo Jesús núú xñdecu cue téé ní xica cuu ndihí-gá*

*(Mt. 28:16-20; Mr. 16:14-18; Lc. 24:36-49)*

19 Te ñu-ni ndumìngú sandiquí<sup>n</sup> ní nataká cue téé ní xica cuu ndihí-gá, te xñdedí nihnu-güedé vehe sá xǔyùhú-güedé cue téé cùnuu núú ñǎyiu isràél. Te ní quíhu Jèsús ndéé tnuú-güedé ní ngúnutnii-gá, te ní xáha<sup>n</sup>-gă:

—Yá Ndiòxí chíndèe ñaha-gá xii-ndo ño váha cùu iní-ndó ndècu-ndo —cachí-gá xáha<sup>n</sup>-gă xii-güedé.

20 Te ní dánèhé ñáhá-gă ndaha-gá ndihí yiquí naha-gă xii-güedé. Te ío ní cudíí iní-güedé sá díú ndìsa-gá ní xiní ñáhá-güedé. 21 Te ní xáha<sup>n</sup> tùcu Jesús xii-güedé:

—Yá Ndiöxí chíndèè ñaha-gá xii-ndo ïo váha cùu iní-ndó ndècu-ndo. Te dàtná ní tendaha ñaha Tátà-í Dútú Ndiöxí xii-í véxi-í ñuyíú-a, te duca<sup>n</sup> tëndaha ñaha-í xii-ndo quíhí<sup>n</sup>-ndó cǎhá<sup>n</sup>-ndó tnùhu-í núú ñáyiú —càchí-gá xáha<sup>n</sup>-gǎ xii-güedé.

<sup>22</sup> Te ní chiyócó-gǎ núú-güedě, te ní xáha<sup>n</sup>-gǎ:

—Chí ndúú tàhú Espíritú Yǎ Ndiöxí cundecu ndìhi-ndo. <sup>23</sup> Te nchaa ñáyiú na quíndáá iní-xi tnúhu-í te cúñaha-ndo xii-yu sá ní quide càhnu iní Yǎ Ndiöxí nchaa cuéchi-yu. Te nchaa ñáyiú vá quíndáá iní tnúhu-í te cúñaha-ndo xii-yu sá vǎ cǎdá càhnu iní-gá cuéchi-yu —càchí-gá xáha<sup>n</sup>-gǎ xii-güedé.

### *Té Mǎxí cǎhá<sup>n</sup> ndìhi-dé Jèsús*

<sup>24</sup> Te núú ùxúú cue téé ní xica cuu ndìhi-gá, te ì<sup>n</sup>-dé nání-dě Mǎxí téé ní xóo danàni-güedé Cuǎchí, te téé-á<sup>n</sup> ñà túú-dě ndécú ndìhi-güedé òré ní sáhá<sup>n</sup> Jèsús. <sup>25</sup> Te dava-gá cue téé ní xica cuu ndìhi-gá ní xáha<sup>n</sup>-güedě xii-dé:

—Ní xiní-ndí Jèsús —càchí-güedé xǎha<sup>n</sup>-güedě.

Te ní xáha<sup>n</sup> tǎ Mǎxí:

—Te vá quíndáá iní-í, chi ndéé quíní-í ndaha-gá núú ní quée nduyú, te dàquíhu-í díquí ndáhà-í núú ní caá<sup>n</sup> nduyú-á<sup>n</sup>, te dàquíhu ndàha-í yíquí naha-gǎ núú ní caá<sup>n</sup>, duca<sup>n</sup> te quíndáá iní-í —càchí-dé xǎha<sup>n</sup>-dě xii-güedé.

<sup>26</sup> Te núú ùná tucu nduu ní nataká tucu cue téé ní xica cuu ndìhi Jèsús ì<sup>n</sup> vehe, te nduu-ǎ<sup>n</sup> tnàhá té Mǎxí ndécú ndìhi-güedé. Te cuèi ndèdí nihnu-güedé vehe-á<sup>n</sup>, te ní quíhu Jèsús ndéé tnuú-güedé, te ní xáha<sup>n</sup>-gǎ:

—Yá Ndiöxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáha<sup>n</sup>-gã xii-güedé.

<sup>27</sup> Te ní xáha<sup>n</sup>-gã xii té Mǎxí:

—Cundehe ndàha-í te dàquíhu-n dĩquí ndáhá-n nǔú ñí quée nduyú, te dàquíhu-n ndàha-n yiqui naha-í-a cuèndá quíndáá iní-n te vá cání ñ<sup>n</sup> cani úú iní-n —càchí-gá xáha<sup>n</sup>-gã xii-dé.

<sup>28</sup> Te ní xáha<sup>n</sup> tǎ Mǎxí xii-gá:

—¡Yòhó cúú-n Xìtohó-í! ¡Yòhó cúú-n Ndiöxì-í! —càchí-dé xáha<sup>n</sup>-dǎ xii-gá.

<sup>29</sup> Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdíí-gá iní nchaa ñáyiu ñá túú ní xiní núú ñáhá xii-í, te ní sándáá iní-yu —càchí-gá xáha<sup>n</sup>-gã xii-dé.

*Quíndáá iní-ó tnǔhu yòdo tnuní núú tütú-a*

<sup>30</sup> Te vai-gá sá vǎ yòo tnàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihí-gá. <sup>31</sup> Dico dava-gá ní ngódó tnùní núú tütú-a cuèndá sá quíndáá iní-ndó sǎ Jèsús cúú-gã Cristú Déhe Dútú Ndiöxí, te naníhí tàhú-ndó te núu na quíndáá iní-ndó-gã.

## 21

*Úsá cue téé ní xica cuu ndihí Jèsús ní xiní ñáhá-güedǎ xii-gá*

<sup>1</sup> Te ingá nduu tucu xǐndecu cue téé ní xica cuu ndihí Jèsús yuhu làgúná ñuú Tìberías, te ní sáhá<sup>n</sup>-gá núú xǐndecu-güedé-á<sup>n</sup>. Te duha ní cuu ní xiní ñáhá-güedǎ xii-gá. <sup>2</sup> Te ndècu té Xímú, àdi Pelú chi úú dǐu-dé, ndihí té Mǎxí téé ní xóo cúñaha-güedǎ

Cuăchí, ndihí té Natanàél téé ñuú Cànaá, te ñuú-án yíndèhu-xi distritú Galileá, te tnàhá ndi nduú déhe té Zebèdeú, ndihí úú-gá tucu cue téé ní xica cuu ndihí-gá. <sup>3</sup> Te ní xáha<sup>n</sup> tē Pèlú xii-güedé:

—Quíhí<sup>n</sup>-í quítñi-í chácá —càchí-dé xăha<sup>n</sup>-dě xii-güedé.

Te ní xáha<sup>n</sup>-güedě:

—Tnàhá nchúhú canchicú<sup>n</sup> ñáhá-ndí xii-n quíhí<sup>n</sup> tucu —càchí-güedé xăha<sup>n</sup>-güedě xii-dé.

Te ní xica-güedé cuáhá<sup>n</sup>-güedé ní sáá-güedé núú ndécú bàrcú, te ní quée-güedé xití bàrcú-án cuáhá<sup>n</sup>-güedé. Te niú-án ñă ní ñhí tnàhí-güedé chácá. <sup>4</sup> Te sa ta cùditó-ñă cuáhá<sup>n</sup> ní xiní-güedé Jèsús yuhu làgúná, dico ñá ní cùtnuní iní-güedé sá díú-gă. <sup>5</sup> Te ní xáha<sup>n</sup>-gă xii-güedé:

—Cue téé cuechi, ¿ní ñhí-ndó chácá caxi-o ñă? —càchí-gá xáha<sup>n</sup>-gă xii-güedé.

Te ní xáha<sup>n</sup>-güedě:

—Vědana chácá ñà túú ní ñhí-ndí —càchí-güedé xăha<sup>n</sup>-güedě xii-gá.

<sup>6</sup> Te ní xáha<sup>n</sup> Jèsús:

—Chí dáquěe ñunu-ndo ndàa xio cuha barcú chi ñhí-ndó-dí —càchí-gá xáha<sup>n</sup>-gă xii-güedé.

Te duca<sup>n</sup> ñi quide-güedé, te òré nātáva-güedé ñunu xití ndute, te ñá cùndèe-gá-güedé natava-güedé cuendá sá ñi chítú chácá xití-xi.

<sup>7</sup> Te téé ní xica cuu ndihí-gá téé ío cùu iní-gá ní xáha<sup>n</sup>-dě xii té Pèlú:

—¡Diu Xítóhó Jesucrístú! —càchí-dé xăha<sup>n</sup>-dě xii-dé.

Te sá ñi tecú dóho té Pèlú sá dúcá<sup>n</sup> càhá<sup>n</sup>-dé nũu ní ndíúnuu-dé dóó-dě, chi dóó să yímàa-ni-dé

níhnú-dě ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dé núú ndute-án ñĩ quene-dé ndéé ñuhu yìchí. <sup>8</sup> Te dava-gá cue téé ndìhì té Pèlú òu-ni cue téé ní xica cuu ndìhì Jèsús ní quendóo-güedé dàtná ì<sup>n</sup> cièndú-gá mètrú te quene-güedé yuhu ndùte. Te tàñuhu-ni-güedé ñunu-güedé chitu chǎcá ñĩ quene-güedé ndéé yuhu ndùte. <sup>9</sup> Te òré ní quene-güedé ñuhu yìchí, te ní xiní-güedé càyú ñuhú, te núú ñùhú-án ñùhú ì<sup>n</sup> chácá ndìhì ì<sup>n</sup> pàá. <sup>10</sup> Te ní xáha<sup>n</sup> Jèsús xii-güedé:

—Quíhí<sup>n</sup> nguehe<sup>n</sup>-ndo ì<sup>n</sup> úú chácá quitì íchí ñĩ tnì<sup>n</sup>-ndo —càchí-gá xáha<sup>n</sup>-gǎ xii-güedé.

<sup>11</sup> Núu té Pèlú ní sáhá<sup>n</sup>-dé núú ndécú bàrcú, te ní quéé-dé xití-xi ní cándéé-dé ñunu ñùhu chácá táñùhu-dé ní quene ndéé ñuhu yìchí, te chitu chǎcá náhnú, te ñùhu ì<sup>n</sup> cièndú údico úxí úní-di xití ñunu-án, te cuèi duca<sup>n</sup> vài-di ñuhu dico ñǎ ní ndǎtá ñunu-án. <sup>12</sup> Te ní xáha<sup>n</sup> Jèsús:

—Chí nèhé cadí iní-ndó —càchí-gá xáha<sup>n</sup>-gǎ xii-güedé.

Dico ñĩ ì<sup>n</sup> cue téé ní xica cuu ndìhì-gá-án ñǎ ní xicá<sup>n</sup> tnùhú-güedé núú-gǎ ñùu yoo cùu-gá, chi sa ní cutnùnì iní-güedé sá díú Jèsús cúu-gǎ. <sup>13</sup> Te Jèsús ní sáhá<sup>n</sup>-gá ní quehe<sup>n</sup>-gá pàá ní sáñaha-gǎ xii-güedé caxi-güedé, te dàtnùnì ní quehe<sup>n</sup> tucu-gá chácá ñĩ sáñaha-gǎ xii-güedé.

<sup>14</sup> Vitna cùu únì xito sá xìnì ñǎhá cue téé ní xica cuu ndìhì-gá sátá ñĩ ndoto-gá.

### *Jèsús càhá<sup>n</sup> ndìhì-gá té Pèlú*

<sup>15</sup> Te sátá ñĩ túhú cóhó-güedé ní sadí iní-güedé te ní xicá<sup>n</sup> tnùhú Jèsús núú tǎ Xímú, àdi Pelú chi úú diù-dé, te xáha<sup>n</sup>-gǎ:



—Xĩmú, déhe té Jònás, ¿cùu iní-gá-n yǔhú dàcúúxí dàva-gá cue téa-ã ñă? —càchí-gá xáha<sup>n</sup>-gă xii-dé.

Te ní xáha<sup>n</sup> tǎ Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dě xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé lĩhli-í —càchí-gá xáha<sup>n</sup>-gă xii-dé.

Te cue mbéé-án cúu-güèdì ñáyiu cùu cuendá-gá.

<sup>16</sup> Te ní xáha<sup>n</sup> tùcu-gá xii té Pèlú:

—Xĩmú, déhe té Jònás, ¿cùu iní ñáhá-n xii-í-u? —càchí-gá xáha<sup>n</sup>-gă xii-dé.

Te ní xáha<sup>n</sup> tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáha<sup>n</sup>-dě xii-gá.

Te ní xáha<sup>n</sup>-gă:

—Te núu duca<sup>n</sup>, te coto-n cuè mbéè-í —càchí-gá xáha<sup>n</sup>-gă xii-dé.

<sup>17</sup> Te xito cùu uní ní xáha<sup>n</sup> tùcu-gá xii té Pèlú:

—Xĩmú, déhe té Jònás, ¿cùu iní ñáhá-n-ã<sup>n</sup>? —càchí-gá xáha<sup>n</sup>-gă xii-dé.

Te té Pèlú ío ní cundìyí-dé sá dúcá<sup>n</sup> ñĩ cuu úní xito xìcá<sup>n</sup> tnúhú-gă núú-dě nũu ndisa sá cúu ìní ñáhá-dě xii-gá, te ní xáha<sup>n</sup>-dě:

—Mèstrú, yòhó nchaa sa xìní-n, te sa cùtnuní iní-n sã cúu ìní ñáhà-í xii-n —càchí-dé xáha<sup>n</sup>-dě xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéè-í. <sup>18</sup> Te na càchí tnúhu ndáá-í xii-n sã cǔtnáhá cuechi-gă-n ñĩ xóo ndécũĩhnu mee-n dǔó-n, te ní xóo quĩhí<sup>n</sup>-n nděni ní xóo cachí iní-n, dico na yĩ-n te dacáá-n

ndàha-n, te ìngá tée dacùhnu ñaha xii-n dóó-n te cada yica-dě candeca ñaha-dě xii-n quĩhí<sup>n</sup> ì<sup>n</sup> núú ñà túú tnàhá iní-n —càchí-gá xáha<sup>n</sup>-gã xii-dé.

19 Te sá dúcá<sup>n</sup> ñí cáhá<sup>n</sup> Jèsús cúú-xí sã ñí dátècú tnúhu ñaha-gã xii té Pèlú nàcuáa cada-xi cuú-dé, te duca<sup>n</sup> càda cahnu-dé Yã Ndiöxí, te ní xáha<sup>n</sup>-gã xii-dé:

—¡Canchicú<sup>n</sup> ñáhá-n xii-í! —càchí-gá xáha<sup>n</sup>-gã xii-dé.

### *Tée ío cùu iní-gá*

20 Te ní nchócótó tẽ Pèlú ndàa sátá-dě, te ní xiní-dé sá nchìcú<sup>n</sup> ñáhá ìngá tée xica cuu ndihí-gá cuáhá<sup>n</sup>, tée ío cùu iní-gá tée ní xínucóo òrè ní cudini ndihí ñaha-gá xii-güedé, te òu-ni tée-á<sup>n</sup> ñí xicá<sup>n</sup> tnúhú-dě núú-gã dàvá-á<sup>n</sup> nũu nděda càa tée cuáha cuendá ñáhá xii-gá núú cuè tée cùu úhú iní ñáhá. 21 Te òrè ní xiní té Pèlú sá nchìcú<sup>n</sup> ñáhá tẽ-á<sup>n</sup>, te ní xicá<sup>n</sup> tnúhú-dě núú Jèsús, te xáha<sup>n</sup>-dě:

—Mèstrú, te tẽ-á<sup>n</sup>, ¿ná cúú sã yãha-dé-i? —càchí-dé xáha<sup>n</sup>-dě xii-gá.

22 Te ní xáha<sup>n</sup> Jèsús:

—Te núu yúhú cuení-í sá cundecu-ni-dé ndéé ná quixi tucu-í ñuyíú-a, ¿te yòhó ná cuendá-n nũu xicá<sup>n</sup> tnúhú-n? Yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gã xii-dé.

23 Te ní xinu tnúhu núú nchàa ñáyiu sàndáá iní tnúhu-gá sá tẽ-á<sup>n</sup> vã cùú-dé. Dico Jèsús ñà túú dùca<sup>n</sup> ní xáha<sup>n</sup>-gã sá vã cùú-dé, chi ní xáha<sup>n</sup>-gã: “Núu yúhú cuení-í sá tẽ-á<sup>n</sup> cundecu-ni-dé ndéé ná quixi tucu-í ñuyíú-a, ¿te yòhó ná cuendá-n?”, duha ní xáha<sup>n</sup>-gã xii té Pèlú.

<sup>24</sup> Te diu-ni yúhú té Juàá téé ní sani iní-yu sá vǎ cùú càhá<sup>n</sup> ndáá-í nchaa nàcuáa ní cuu, te duca<sup>n</sup> nǎ tee-í núú tütú-a, te cùtnuní iní-ndó sǎ tnǎhu ndáá cùú-xí.

<sup>25</sup> Te ndècu vai-gá núú sǎ nǎ quide Jèsús. Te núú dícó ní ngǎndee nchaandi túhú ñá, te váa ni te nǎhì ñuyíú te vá tnàhá núú-xi cundecu librú, te núú dícó ní ngǎndee nchaa. Te duca<sup>n</sup> na cùnduu. Te ío chí cádá ndèe iní-nǎ vitna.

**Tnúhu ní cáhá<sup>n</sup> yǎ ndiǒxí xito cùu uú**  
**New Testament in Mixtec, Peñoles (MX:mil:Mixtec,**  
**Peñoles)**

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

**Copyright Information**

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Peñoles

**© 2002, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

872f7754-0986-5ecd-a059-925a708a6939